



上編

現代交際尺牘大全

商務印書館發行

游省園著

現代交際尺牘大全
上編

商務印書館發行



3 0475 2942 9

52937

序

揚子雲有言：彌綸天下之事，記久明遠，著古昔之嗜嗜，傳千里之恣恣者，莫如書。自春秋聘遺執訊，下逮兩漢，紛紜槃桓，翩翩之致，各臻其妙；其源流藻績，得失品題，東莞舍人，言之暢矣。嘗念禰正平爲黃祖作書，輕重疏密，各得體宜；阮元瑜爲曹公作書，公欲有所定，而竟不能損益。夫其簡書如雨，紙落如雲，粲然耀眼者，豈惟修辭立誠而已哉！蓋必通會世務，周密知微，然後能達其意而極其工。吾始年二十有一，熊秉三京卿（希齡）電請度遼，爲掌記室。爾後久居中祕，筆札亦多，平生意志疏闊，昔賢牋啓，都未究心，偶見賀縣于氏書牘景本一部，以爲周知世務，各得體宜，而文采斐然，又足以副之。顧其書刊布不廣，非盡人所能得，亦非盡人所能學也。去年滬上友人，請爲應世尺牘若干篇，辭不獲已，輒以暇日，艸成此編，視晦若之稟，不逮遠甚，然平易而近人也。昔鄭人有寫金者，始爲常器，甚拙，爲鬲甗簠簋，小工；爲鐘鼎敦槃，更工；或稱道之。鄭人愀然曰：器無定形，寫金一也。子之稱道，殆見鷓鴣饕餮之肖耳！

吾豈真擅廟堂之器哉！二十年前，易中碩作數斗血歌，傳至海上，諸名士以爲深者不屑，淺者不能。樊嘉父笑曰：我能之，遂作後數斗血歌，吾之爲此，固遠引鄭人而近援樊山也。噫嘻！

中華民國二十五年四月省園主人自序

現代交際尺牘大全上編目次

甲 通候類

一 上國民政府主席(一).....	一
二 上國民政府主席(二).....	四
三 上國民政府主席(三).....	七
四 致行政院院長(一).....	一〇
五 致行政院院長(二).....	一三
六 致行政院院長(三).....	一六
七 致內政部部长(一).....	一八
八 致內政部部长(二).....	二一
九 致外交部部长(一).....	二四
十 致外交部部长(二).....	二七

一一 致軍政部部长(一).....	三〇
一二 致軍政部部长(二).....	三二
一三 致海軍部部长(一).....	三四
一四 致海軍部部长(二).....	三八
一五 致財政部部长(一).....	三九
一六 致財政部部长(二).....	四三
一七 致實業部部长(一).....	四六
一八 致實業部部长(二).....	四八
一九 致教育部部长(一).....	五一
二〇 致教育部部长(二).....	五四
二一 致交通部部长(一).....	五七
二二 致交通部部长(二).....	六〇
二三 致鐵道部部长(一).....	六二
二四 致鐵道部部长(二).....	六五

二五	致蒙藏委員會委員長(一).....	六七
二六	致蒙藏委員會委員長(二).....	七一
二七	致僑務委員會委員長(一).....	七五
二八	致僑務委員會委員長(二).....	七八
二九	致振務委員會委員長(一).....	八一
三〇	致振務委員會委員長(二).....	八三
三一	致農村復興委員會委員長.....	八六
三二	致全國航空建設會常務委員.....	八九
三三	致立法院院長(一).....	九二
三四	致立法院院長(二).....	九五
三五	致司法院院長(一).....	九八
三六	致司法院院長(二).....	一〇二
三七	致司法行政部部長(一).....	一〇六
三八	致司法行政部部長(二).....	一〇九

三九	致最高法院院長	一一二
四〇	致行政院院長	一一五
四一	致考試院院長	一一八
四二	致銓敘部部長	一二二
四三	致監察院院長	一二四
四四	致審計部部長	一二八
四五	致軍事委員會委員長	一三一
四六	致全國經濟委員會常務委員	一三四
四七	致參謀總長	一三八
四八	致訓練總監	一四二
四九	致軍事參議院院長	一四五
五〇	致中央研究院院長	一四八
五一	致建設委員會委員長	一五一
五二	致省政府主席	一五四

五三	致民政廳廳長	一五七
五四	致財政廳廳長	一六〇
五五	致教育廳廳長	一六三
五六	致建設廳廳長	一六七
五七	致公安局局長	一六九
五八	致行政督察專員	一七二
五九	致縣長	一七七
六〇	致市長	一八〇
六一	致綏靖主任	一八三
六二	致勦匪總司令或總指揮	一八六
六三	致軍長或師長	一八九
六四	致領軍將校	一九二
六五	致駐外大使或公使	一九五
六六	致駐外總領事或領事	一九八

六七 致校長或教授·····	二〇一
六八 上業師·····	二〇四
六九 致報館主筆·····	二〇七
七〇 致公司董事或經理·····	二一〇
七一 致銀行董事或經理·····	二二三
七二 致留學畢業初歸者·····	二二六
七三 致家居者·····	二二〇
七四 致未晤面者·····	二二三
七五 致同學·····	二二六
七六 致同鄉·····	二二九

現代交際尺牘大全上編

甲 通候類

一 上國民政府主席（一）

主席鈞鑒：執中垂拱，淵沖爲至道之原；
抱蜀不言，濬哲洽大庭之治。伏維
仁涵五族，

德耀三明。宜四表之蒙庥，詎萬方之多難。敵國外患，誠知
宵旰之憂勞，熙載奮庸，猶冀



明良之喜起。翹詹

乾曜。式協頌忱。某某教授武昌，再歷寒暑。每覺洛伽之爽氣。輒思

玄化之朝暉。本年六月入都，詣

府修謁，深荷

優禮。時雨旣降，仁風扇和。豈惟

謙光自牧之懷，益見

學道愛人之實。至於梓里之情，通家之誼，同茲

覆幬。抑更厚焉。永矢厥心，無任感戢。謹因國慶，特肅蕪牋，恭候

起居，並陳謝悃。敬頌

鈞綏。伏惟

鑒鑒不莊。

商榷



註釋

一國元首，精創甚尊，上垂措詞，理應莊肅。頌揚之語，尤宜斟酌。不可模擬專制語彙。是篇通候之文，除一二事實語外，皆可擬用。

① 尙書大禹謨：「人心惟危，道心惟微，惟精惟一，允執厥中。」孔傳云：「危則難安，微則難明，故戒以精一，信執其中。」

② 尙書武成：「垂拱而天下治。」旨垂衣拱手，天下無爲而治也。

③ 管子形勢篇：「抱蜀不言，而廟堂既修。」蜀，桐器也。人主抱持桐器，雖靜默不言，而政以修也。

④ 尙書舜典：「濬哲文明。」孔氏傳：「濬，深也。哲，智也。」

⑤ 詩譜序：「大庭軒轅，遷於高辛。」大庭，謂神農氏也。沈炯奏通天臺表：「稽山之祠可尋，大庭之跡無泯。」

⑥ 古今注：「巴羅間，董仲舒曰：自古何謂稱三皇五帝？曰：三皇，三才也。五帝，五常也。三王，三明也。五霸，五顯也。」按三明，謂日月星也。

⑦ 尙書魯典：「光被四表，格于上下。」孔穎達疏：「四表，謂四方之外也。」

⑧ 爾雅釋言：「麻，庶廢也。」

⑨ 禮記：「內亂不與焉，外患弗辟也。」孟子：「入則無法家拂士，出則無敵國外患者，國恆亡。」

⑩ 李德裕丹庭六箴，其一曰：「管衣謂天未明而衣也。左傳：「楚之君臣，其肝食乎。」謂欲食而未進也。管衣肝食者，言人主動於政事也。」

⑪ 尙書卷：「有能奮庸，熙帝之載。」孔氏傳：「奮，起也。庸，功也。載，事也。」

⑫ 尙書卷：「元首明哉，股肱良哉。」又：「股肱喜哉，元首起哉。」

⑬ 元史：「月之遺留右行，明同貞子乾曜。」乾曜，謂日光也。

⑭ 普陀山在浙江定海縣東海中，梵名補陀洛迦，譯言小白華也。湖北武昌有羅家山者，形勢甚峻，武漢大學新舍在焉。當局因改

羅家山曰洛迦山。

⑤晉書王徽之傳：「徽之爲桓沖騎兵參軍，沖嘗謂徽之曰：『卿在府日久，比當相料理。』徽之初不酬答，直高視以手版拄頰云：『西山朝來，致有爽氣。』」清黃道讓撰瀛海語：「東南爽氣來衡嶽，日夜江聲下洞庭。」

⑥古今樂錄：「玄化者，晉脩文訓武，則天而行，仁澤流洽，天下喜樂。」

⑦史記秦本紀：「代王乘傳詣長安。」論，至也。

⑧尚書洪範曰：「肅時雨若。」孟子：「有如時雨化之者。」

⑨晉書：「袁宏爲東陽郡，謝安取扇贈行，答曰：『輒當奉揚仁風，慰彼黎庶。』」

⑩周易：「謙察而光。」孔穎達疏：「謂尊者有禮而更光明也。」

⑪周易：「謙謙君子，卑以自牧也。」孔穎達疏：「言謙而又謙之君子，恆以謙卑自養其德。」

⑫論語：「君子學道則愛人，小人學道則易使也。」

⑬後漢書孔融傳：「十歲造李膺門曰：『我是李君之通家子弟。』通家，謂異世相友善也。」

⑭中庸：「譬如天地之無不持載，無不覆餗。」轉，亦覆也。

⑮毛詩衛風：「永矢勿諼。」鄭箋：「矢，誓也。」

⑯陶潛乞食詩：「銜戢知何謝，冥報以相貽。」張居正答荆守徐太宰書：「辱華翰，感戴厚情。」銜戢，感戴，均感戴也。

⑰楚辭卜居：「吾寧悃悃款款，朴以忠乎？」悃，誠信也。志純一也。

二 上國民政府主席(二)

主席鈞鑒。允文允武。而協和萬邦。

宜民宜人。而啣嫗。五族屬。在艱難之會。益章。

宵旰之勤。

盛德遠邁乎時賢。頌忱彌殷乎日稷。仰維

精一。敬效呼三。前日某祕書過訪。言鄙著華北外交芻議。仰邀

睿鑒。且辱

嘉招。某某屬辭比事。固非專對之才。棟折榱崩。實有將壓之懼。熟察事

勢。貢此芻蕘。乃遘

虛谷之懷。欲爲

前席之問。撫衷循髮。旣感且慚。病目兼旬。去翳。刮膜。敬謹展謁。當俟下

弦。先啓奉陳。餘請某祕書轉達。肅頌

崇安。伏祈

垂鑒。

註釋

- ①毛詩魯頌：「允文允武，昭格烈祖。」允，實也，信也。
- ②尚書堯典：「協和萬邦，黎民於變時雍。」孔穎達疏：「使之合會，調和天下萬國。」
- ③毛詩：「宜民宜人，受祿于天。」
- ④淮南子原道篇：「酌適覆育。」禮樂部：「天地所合，陰陽相得，滋適覆育萬物。」商賈通用。
- ⑤左傳成公二年：「下臣不幸，屬當戎行。」屬，適也，近也。
- ⑥徐正釋議：「三方鼎峙，九有未父，聖賢拯救之秋，列士樹功之會。」會，時也。
- ⑦漢書：「宜章盛德，以示天下。」章，表白也，與彰通。
- ⑧註見第一稿④。
- ⑨尚書中候：「禮備，至于日愆。」謂日仄也。禮，通仄。
- ⑩尚書大禹謨：「人心惟危，道心惟微，惟精惟一，允執厥中。」孔穎達疏：「將欲明道，必須精；心將欲安民，必須一意。」
- ⑪漢書武帝紀：「親登臨高，開呼萬歲者三。」
- ⑫毛詩大雅：「胸子芻蕘。」刈草曰芻，折薪曰蕘。張既文：「自惟芻蕘，十不一從。」
- ⑬尚書洪範：「睿作聖。」睿，通明也，深也。
- ⑭簡牘詩：「微身輕蝶翼，弱冠益嘉招。」

◎禮記：「屬辭比事，春秋時代，行人多尚辭令，屬辭比事者，謂聚合會同之辭，比類而善喻也。」

◎論語：「使於四方，不能專對。」專對，謂隨問肆應，不泥成命也。

◎左傳：「棟折榱崩，僑將歷焉。」僑，鄭子產自名也。言國家綱紀崩潰，有將亡之懼，所謂：「時日曷喪，予與汝偕亡！」

◎三國志孫權傳：「晉文帝遺孫休書，孫休街命齋書，陳事勢利害，以申監臨。」漢書：「事勢不兩大。」事勢，謂凡事之趨勢也。

◎老子：「上德若谷。」言能虛其心也。

◎史記：「商微見秦孝公，公與語，不自知膝之前於席也。」又漢書：「載文帝召問賈生事亦同。」李商隱詩：「賈生夜半虛前席，不聞蒼生問鬼神。」

◎循髮猶云鬢首也。揚億文：「循髮迴頭，累日不決。」

◎蘇賦：「瞻眼發王生彥者詩：『感頭如夢世，氣出如車軸。運絨如運斤，去醫如拆屋。』」

◎天中記：「魏武帝病眼，令華佗以金篦刮膜。」黃庭堅次韻范元實病眼詩：「如何有物食明月，淚隨隨絲衣袖滿，金篦刮膜音曾有，湯髮取效術誠短。」

◎陰曆每月二十二三日，月光下缺其半，故謂下弦。

三 上國民政府主席(三)

主席鈞鑒：獻歲發春，陽和煦物，敬維

玄化淵穆。

甲 通候類 三 上國民政府主席(三)

乾運健剛。引企

光華，曷勝頌禱。上年十二月，家君六十生日，伏蒙

寵錫聯語，並唐子畏。畫無量壽佛一軀。

瓊瑋莊嚴，下拜登受。躋堂賓客，禮讚同懽。仰賴

鈞座之褒榮，實篤寒家之私慶。本支百世，永矢弗諼。家君廿載棲遲，久

違朝市，謹命某某以新刻三禮發微、石帆詩集，各一部。某某新著國際政治史綱

一部，專足賚呈敬祈

鈞誨。所有長幼感戢之忱，容俟某某下月入都，詣

府恭謝。專肅虔頌

崇綬，伏惟

垂鑒。

商榷

上兩篇通候而能言事，斟酌損益，在乎其人。獻歲陽和二語，既能用之歲首。

註釋

○宋玉招魂：「獻歲發春兮，汨吾南征也！」王逸注：「獻，進也。言歲始來進，春氣奮揚，萬物皆感氣而生也。」

○陶言日出溫暖也。與煦通。

○註見第一篇。

○周易：「大哉乾乎！剛健中正。」

○尙書大傳舜德象歌：「日月光華，且復且兮！」

○唐寅明吳鴈人，字子畏，又字伯虎，號六如，弘治中，舉於鄉，家無擔石，虛容常滿，文章半采，照映江左，善畫，山水人物，無不臻妙，稱爲神品。

○佛像一處，或畫或塑或鑿刻，咸云一軀，或作一區，見北魏造像文。

○左傳僖公九年：「王使宰孔賜齊侯胙……下拜登受。」

○毛詩：「陟彼公堂，稱彼兕觥，萬壽無疆。」

○毛詩大雅：「文王孫子，本支百世。」鄭箋：「本，宗子，支，庶子。」

○毛詩衛風：「永矢弗諼，諼，忘也。」

○毛詩：「窗門之下，可以棲遲。」棲遲，謂遊息也。

○專足猶云專差。

○註見第一篇。

甲 通候類 三 上國民政府主席(三)

四 致行政院院長(一)

某某先生賜鑒：遂萬物而咸宜，四時成歲。

宅百揆而時敘，一柱擎天，敬維

鼎鉉，元勳，

鈞衡，碩輔，屬在艱難之際，而坐鎮雍容，至於康濟之懷，則信孚中外。引
詹

鴻翼，敬效鳧趨，某某伏處里門，久違朝市，力田滋潤，看黃犢以耕煙，去日

苦多，奈白駒之過隙，每懷

舊德，益歧

壯猷，謹因驛使於隴頭，遙致魚書，於日下，敬承

曼福，並述閒身，儻荷

清誨之遺，^①卽爲空谷之喜，^②專肅祗頌

勛綏，惟二所

激管不備。

商權

遂萬物而咸宜至鈞衡領袖數語，祇能用之行政院長，與其他長吏通候，不宜援引。

註釋

①史記：「陳平曰：宰相者，上佐天子，理陰陽，順四時，下相萬物之宜。」遂，成也，順也。禮記：「百事乃遂。」

②尚書堯典：「帝曰：咨，汝羲暨和，期三百有六旬有六日，以閏月定四時成歲，允釐百工，庶績咸熙。」

③尚書舜典：「納于百揆，百揆時敘。」孔氏傳：「揆，度也，度百事，總百官，百事時敘，無廢事業。」又「使宅百揆，亮采惠疇。」居其位曰宅也。

④宋史劉永年傳：「生四歲，仁宗使賦小山詩，有一柱擎天之語。」謂以一身任天下之重任也。

⑤周易：「鼎黃耳金鉉。」孔穎達疏：「黃，中也，金，剛也。鉉，所以實鼎而舉之也。」按鼎輔鉉皆謂三公也。

⑥鈞衡所以量物，晉大臣在位，進退百僚，權衡輕重，以歸適當也。其義與鈞輔鈞權同。釋無可詩：「遂鈞衡總，今爲長史歸。」

⑦韓愈詩：「天錫皇帝，隨臣頌輔。」頌，大也，賢也。頌輔猶言元輔，元等。

甲 通候類 四 致行政院院長(一)

①唐書：「王導謝安，坐鎮雅俗。」魏書世祖紀：「詔曰：古之君子，養志衡門，或雍容雅步，三命而後至，或棲棲遑遑，負鼎而自遠，靡徇尚不同，臨時一也。」

②尚書：「康濟小民。」孔氏傳：「當安小民之居，成小民之業。」

③漢書傅毅：「公孫弘見寬皆以鴻漸之翼，困於燕雀，遠歸羊豕之間。」

④梁陸賦：「聞之者幾趨雀籠。」謂歡欣鼓舞也。

⑤漢書：「嘉帝四年，舉民孝弟方田者，復其身，文帝十二年，詔賜三孝孝弟方田等帛各有差，並以戶口率置三孝孝弟方田者，員。」方田謂勸于農事也。

⑥魏武帝短歌行：「對酒當歌，人生幾何，譬如朝露，去日苦多！」

⑦毛詩：「皎皎白駒，食我場苗，繫之維之，以永今朝。」史記：「人生一世間，如白駒過隙。」言光陰之迅速也。漢書注師古曰：「白駒，日影也。隙，墜隙也。」禮記：「三年之喪，二十五月而畢，若駒之過隙。」孔穎達疏：「駒馬峻疾，空隙狹小，以駒疾過狹小，言息逝之甚也。」

⑧曹植文：「君之清德，斷世冥靈。」清德，謂操行清峻也。

⑨毛詩：「方叔元老，克壯其猷。」猷，猷同。

⑩荆州記：「宋陸凱與范曄相善，自江南寄梅花一枝，並贈詩曰：折梅逢驛使，寄與隴頭人，江南無所有，聊贈一枝春。」

⑪汝南先賢傳：「萬元見賣大魚者，元謂暫煩此魚到河伯處，魚主曰：魚已死，元以丹書紙內魚口中，擲水中，有頃，魚躍上岸，吐墨書青黑色，如木葉而飛。」庚白齋詩話：「古詩有客從遠方來，遣我噉鯉魚，呼童烹鯉魚，中有尺素書，腹中安得有書，古人以喻隱密也。魚沉潛之物故云。」韋皋詩：「長江不見魚書至，爲遣相思夢入秦。」

⑫世說：「且下荀鳴鶴靈閣陸士龍。」王勃文：「望長安於日下，指吳會於雲間。」日下，謂京師也。

◎范成大詩：「春風最飈薄，江海有圓夷。」閒身，謂閒居舒適也。

◎後漢書：「蔡承清議，以釋滯懷。」

◎莊子徐無鬼：「夫迷塗適者，聞人足音，蹙然而喜矣。」黃庭堅詩：「別後寄詩能慰我，似逃空谷聽人聲。」即用莊生語。

五 致行政院院長（二）

某某先生賜鑒：東風解凍，欣有脚之載陽；春雨如膏，以無聲而潤物。敬維

百揆時敘。

庶績咸熙，翹企

鈞衡。曷勝頌禱。某某教授來遊華嶽，邂逅長安市上，具道

齒牙餘芬，爰速下走，何意自珍之敝帚！遽蒙

弘獎於中樞，有容休休，從長善善。此固百川所歸往，豈惟一士之欽遲！

去年刊印行政論上編，係就各國人事行政比較立言，現在中編脫稿，專論中

國近三十年中央政府之組織及政治利病，謹錄副本，寄呈
裁正。振鷺西雝，^①方僑居於霸上，^②雕龍東莞，^③願取定於
車前。敬頌

勛綏，惟祈
亮督不莊。

商權

篇首四句，內之行政院長，內政部長，外之省府主席，民政廳長，新春通候，均可採用。惟首接時敘四字，祇能頌揚行政院長耳。

註釋

①禮記月令：「孟春之月東風解凍。」

②開天遺事：「宋璟愛民恤物，時人謂之有脚陽春。」言所至之處，如陽春煦物也。毛詩：「春日載陽，有鳴倉庚。」

③左傳：「如百穀仰膏雨焉。」毛詩：「芄芄黍苗，陰雨膏之。」

④杜甫春夜喜雨詩：「隨風潛入夜，潤物細無聲。」

①尚書：「納于百揆，百揆時敘。」翰云：百官總已以職也。總攬政治，皆有次第，無廢事業。

②尚書義典：「尤置百工，庶績咸熙。」績，功也。熙，廣也。言百官衆功，廣歎其善也。

③註見第四篇。

④南史謝朓傳：「鳳好奕，人才孔顯，粗有才筆，未爲時知。孔珪嘗令草書，表，嚙嗟吟良久，謂珪曰：「士子聲名未立，應共奕成，無惜齒牙餘論。」

⑤魏文帝與論：「里語曰：家有敝帚，享之千金，此不自見之患也。」言人各自以其所有爲珍也。

⑥太玄經：「植中樞。」謂中央也。樞，要之地，政事之總樞也。

⑦尚書：「其心休休焉。」休休，有容也。

⑧公羊傳：「君子之善善也長，惡惡也短。」

⑨揚子法言：「百川學海，而至子海。」

⑩語林：「許元度將弟出都婚，婿人聞是元度弟，甚欲遇之。」欽，敬也。遇，待也。敬仰之意也。

⑪毛詩振雅：「振鷺于飛，于彼西雍，我客戾止，亦有斯容。」振，迅也。振鷺，喻賓客也。先儒謂辟雍在西郊，故曰西雍。雍，雍同。

⑫在陝西長安縣東，即古白鹿原也。接臨田縣界。水經注云：白鹿原東，即霸川之西，謂之霸上，顏師古漢書注云：霸上，即所謂霸頭，亦作灃上。

⑬南史劉勰傳：「勰字彥和，東莞莒人也，早孤，篤志好學，家貧，依沙門僧祐居，博通經論，梁天監中，兼東宮通事舍人，深被昭明太子愛接，初撰文心雕龍五十篇，論古今文體，既成，未爲時流所稱，勰欲取定於沈約，無由自達，乃負書候約於車前，狀若貨殖者，約取讀，大重之，謂深得文理，常陳諸几案焉。」

六 致行政院院長(三)

院長鈞鑒：凱風扇物，赫日流輝，敬維

迎薰敷化。

保艾含仁，遙企

中樞，莫名私淑。某某前奉全國經濟委員會令，偕同外國顧問，入陝視察水

利公路各項工程。上月十日，行抵西安，十二日與該省主管各機關人員會商視

察程序，十四日出發查勘。迄今歷兩星期矣。比因某某兩處，暑雨之後，路基

微損，一俟修復，即可驗工。大約本月中旬，可以蒞事。東歸。此次視察，印象尚佳，

外國顧問，亦頗欣然。陝當積年兵旱，菑害之餘，飢易爲食，渴易爲飲。即茲建

設萌芽，已有蒼生蘇息之象，是則可以告慰

台鼎。眷顧之懷者也。某某出都之日，伏蒙

賜教諄諄，感悚曷既。謹將行程先行具報。至於設計之精麤，工程之完缺，容俟
回京，詳細面稟。專肅，祇頌

鈞綬伏惟

垂鑒。

商榷

凱風，赫日，迎薰，蕭蕭，紙能用之夏季。

註釋

①毛詩：「凱風自南。」爾雅：「南風謂之凱風。」魏文帝與吳季重書：「器寶絕時，景風屬物。」凱風，景風，皆喻夏也。

②尸子：「帝舜彈五絃之琴，以歌南風。其詩曰：南風之薰兮，可以解吾民之愠兮。」史記所載亦同，薰和也。

③毛詩：「樂只君子，保艾爾後。」保艾，即保育也。

④孟子：「予未得爲孔子徒也，予私淑諸人也。」言未能親受學於孔門，但得之於傳其學者而善我身耳。

⑤查勳，猶云查驗。

⑥尚書君牙：「夏暑雨，小民惟曰愆咨。」

⑦左傳：「寡君又朝，以離陳事。」離事，謂事畢也。

甲 運候類 六 致行政院院長（三）

⑧顏氏家訓：「夫婦之義，曉夕移之，積年累月，安有孝子。」積年，謂積久也。

⑨孟子：「飢者易爲食，渴者易爲飲。」

⑩漢書：「靈氏有寒萌牙。」牙，亦作芽，言草木始生也。借喻事之始有端緒。

⑪杜甫述郡詩：「蒼生未蘇息，胡馬半乾坤。」死而復生曰蘇，少安曰息。

⑫後漢書：「位登台鼎。」台鼎，謂宰相也。舊稱三公曰台鼎，言如星之三台，鼎之三足。

⑬毛詩大雅：「乃眷西顧。」

⑭周易既濟疏：「既者皆盡之稱。」易既，猶言不盡。

七 致內政部部长(一)

某某先生勛鑒：績佐中樞，兼土地人民之政。

秩尊首部，總圖籍，禮樂之成，載育庶物，安撫萬民，則地官之所典，養老恤

孤，崇德黜惡，亦王制之所先，敬維

綱舉目張。

化行俗美。鄭武公世家善職，故賦美緇衣。鄧仲華昭德塞遠，而勛同帷

輓。以今日之

壯猷，較昔賢之偉烈，載瞻

台席，允矣。司徒某某自前歲罷官歸里，食指既繁，生事不瞻，或勸從

事懋遷，以逐什一之利。比年稍能自振，昔在首都，猥荷

拂拭，與言往事，懷念彌深。輒以江海之情，奉陳

廊廟之彥，儻荷

錫之清誨，滌我濁襟，曷勝企幸。專啓肅候，虔頌

勛綬，諸惟

朗答。

註釋

①詳見第五篇④。

②周禮：「大司徒之職，掌建邦之土地之圖，與其人民之數，以佐王，安擾邦國。」

甲 通候類 七 致內政部部长(一)

①周禮：「以天下土地之圖，周知九州之地域，廣輪之數，辨其山林、川澤、丘陵、墳衍、原隰之名物。」按大司徒掌邦土地之圖，鄭氏注：「土地之圖，若今司空郡國輿地圖。」賈公彥疏：「漢唐何收秦國籍，以知天下阨塞廣遠，至後漢，乃有司空郡國地圖。」

②周禮地官司司徒：「以五禮防萬民之僞，而教之中，以六樂防萬民之情，而教之和。」

③晉書百官表注：「司徒掌邦教，職官庶物，安撫萬民。」周禮：「乃立地官司司徒。」

④禮記玉制：「司徒養老以致孝，恤孤獨以達不足，尙賢以崇德，簡不肖以黜惡也。」

⑤詩經序：「舉一綱而萬目張，尙書若網在綱，傳曰：綱舉則目張，喻下從上，小從大。」

⑥毛詩序：「漢廣德廣所及也。文王之道，被于南國，美化行乎江、漢之域。」張衡東京賦：「因天地以教化，兆人承上教以成俗，化俗之本，有與推移。」蓋謂教化大行，而風俗美厚也。

⑦毛詩序：「稱衣美鄭武公也。父子爲周司徒，善於其職，國人宜之，故美其德，以明有國善養之功。」

⑧後漢書鄧禹傳：「禹字仲華，新野人，幼與光武相親，光武定河北，嘗與定計議，以前將軍持節入關，名震關西，拜大司徒。」

⑨左傳：「臧哀伯諫曰：君人者，將昭德塞違，以臨照百官。」孔穎達疏：「昭德，謂昭明善德，使德益章聞也。塞違，謂閉塞違邪，使違命止息也。」按晉書天文志：「三台大臣，西近文昌二星曰上台，爲司命，次二星曰中台，爲司中，東二星曰下台，爲司祿，所以昭德塞違也。」又周禮大宗伯疏：「上台司命爲太尉，中台司中爲司徒，下台司祿爲司空。」

⑩後漢書鄧禹傳：「制詔曰：前將軍鄧禹，深執忠孝，與朕謀議維綱，決勝千里，孔子曰：自吾有回，門人日親，平定山西，功效尤著，百姓不親五品不遜，汝作司徒。」

⑪台席，猶言台鼎，謂輔相也。

⑫毛詩：「允矣君子，展也大成。」

⑬左傳：「子公之食指動，以示子家，曰：他日我如此，必嘗異味。」食指，手之第二指也。但此處則作人口脣，食指甚繁，即待食者羹

也。

⑤華陽國志：「德陽縣有石祠，山原肥沃，有澤流之利，士女貞孝，望山樂水，土地易爲生事。」生事，謂生活也。王維詩：「生事不費問青城家中類。」

⑥孟子：「此惟救死而恐不贖。」趙岐法：「贖，足也。給也。」

⑦尚書：「恐遷有無化居。」孔穎達疏：「恐勉其民，使有無相易，以變化其居積之貨物，如材木遷川澤，魚鹽遷山林之類。」

⑧史記：「范蠡自謂陶朱公，候時轉物，逐什一之利。」言貿易之利，得其十分之一也。

⑨李白詩：「一朝君王垂拂拭。」凡蒙恩遇者，謂之拂拭。言如器物將取而用之，必先去其塵垢也。

⑩諱愈詩：「孟生江海士，古貌又古心。」江海喻其闊適放曠，猶陸龜蒙之稱江湖散人，張志和之稱烟波釣徒也。

⑪後漢書：「以經術見優者，布在廊廟。」文中子：「山林有廊廟之志。」廊廟，猶云朝廷也。毛詩：「碩人君子，邦之彥兮！」廣美士也。

八 致內政部部长(二)

某某先生勛鑒：斗衡東指，而萬物光輝；雁序北歸，而三陽開泰。敬維

政履紉釐。

德門篤祐，引詹

瑞靄，罔旣揄蔡。上年九月，

大部召集全國地政會議，某某忝列會員，備聆

偉論，精深簡要，欽服無任，並承

招宴江樓，飽德醉酒，旣盡東南之美，復申縞紵之情，言念

風徽，益深感謝。回轡之後，教授餘暇，撰成土地問題一書，根據法律之條文，參

酌議決之方案，以平均地權爲原則，以各盡地利爲依歸，近始刊行，郵呈一冊，尙

祈

不遺在野，錫以清裁。太沖孤詣，取重玄晏之一言。北海抗顏，猶企春明。

而再拜，專肅，祇頌

勛綏，惟希

激督。

商榷

斗衡雁序四句，鋪張春訊。

註釋

① 鵝冠子：「斗柄指東，天下皆春。」

② 六經傳：「陽春布德澤，萬物生光輝。」

③ 雁之爲物，春則回北，秋則來南。

④ 尙書洪範三曰木疏：「正月爲春，木位也。三陽已生，故三爲木數。」傳亮文：「天衢開泰。」

⑤ 後漢書班固傳：「將耕萬嗣。」耕，續也。漢書：「祠官祝盛。」登，福也。

⑥ 毛詩：「受天之祜。」祜，福也。

⑦ 陶潛詩：「露漙停雲，濛濛時雨。」露，雲盛貌。瑞，福。猶曰慶雲。

⑧ 陸機與弟登書：「每道昔遊，夢思罔既。」罔既，猶云不盡也。紫，香木，言摘揭其清芬也。

⑨ 毛詩：「既醉以酒，既飽以德。」

⑩ 爾雅：「東南之美，有會稽之竹箭焉。」王勃滕王閣序：「臺隍枕夷夏之交，賓主盡東南之美。」

⑪ 左傳：「季札與子產締帶，子產獻紵衣焉。」

⑫ 白帖：「學道愛人，風散遠著。」風散，謂風采和善也。

甲 通雅類 八 政內政部部長(二)

①左思字大沖，晉臨淄人，博學能文，辭藻壯麗，造齊都賦，一年成之，又作三都賦，十年乃成，張華歎為世罕之流，蔡資之家，競相傳寫，洛陽為之紙貴，詣至也。孤詣，猶云有獨到處。

②皇甫謐字士安，自號玄晏先生，晉安定朝那人，左思三都賦成，世人未重，思以謐有高官，乃造而示之，謐稱善，為其賦作序也。

③鄭玄字康成，東漢高密人，少時不樂為吏，造太學受業，博通諸經，及三統曆，九章算術等，後事扶風馬融，游學十餘年，及歸，會以

露事禁錮，遂假修經業，杜門不出，露禁解，徵辟皆不就，著書凡百餘萬言，弟子自遠方至者數千人，時孔融為北海相，深敬之，皆高帝縣為特立一廡，曰鄭公廡，高密蓋屬北海也，見後漢書本傳，柳宗元答韋中立書：「今之世不聞有師，獨韓愈奮不顧流俗，

敢召後學，作師說，因抗顏而為師。」

④唐六典：「京城東西三門，中曰春明，故後人稱京師曰春明。」

九 致外交部部長（一）

某某先生勛鑒：三節英蕩，深諳百二十國之寶書。

四牡皇華，洞矚九萬餘里之大勢，典九賓九儀之職，而

勛懋鴻臚，徧日出日入之邦，而

才高鳳舉，敬維

具瞻中外

輯睦敦槃，令聞廣譽，有國際之高名。比事屬辭，著會盟之偉績。翹詹

台鼎，莫罄頌忱。某某僑居海外，久歷歲時，始以貨殖而來，遂爲流寓之客。

蘇卿胡婦，頗畜牛羊；磨勒崑崙，並勞薪水。雖攜手無河梁之怨，而平居

有故國之思。少同鄉里，忝附舊知，萬里

清暉，每懷靡及。尙願

好音是惠，以慰渴思，曷勝企幸，敬頌

勛綏，諸惟

澈照不備。

註釋

①周禮：「凡邦國之使節，出國用虎節，土國用人節，澤國用龍節，皆金也，以英鐻輔之。」英，發，蓋節之頭也。以竹爲之，而刻畫以爲節。

◎春秋公羊傳疏：「昔孔子受昭門之命，制春秋之義，使子夏等十四人，求周史記，得百二十國寶書……若然，公羊之義，據百二十國寶書以作春秋，今經只有五十餘國，通成、夷、宿、鄆之屬，僅有六十，何言百二十國乎？」

◎毛詩：「四牡騤騤，周道倬倬。」四牡，勞使臣之來也，有功而見知，則說矣。

◎毛詩：「皇皇者華，于彼原隰，騶駼征夫，每懷靡及。」皇皇者華，君遣使臣也，送之以禮樂，言遠而有光華也。

◎史記閻相如傳：「秦戒五日，設九賓于廷。」韋昭曰：「九賓，則周禮九儀。」秦隱曰：「周禮大行人，別九賓，謂九服之賓客也。」

◎周禮：「以九儀辨諸侯之命，等諸臣之爵，以同邦國之禮，而待其賓客。」鄭氏注：「九儀謂命者五，公侯伯子男也。爵者四，孤、卿、大夫、士也。」

◎杜佑通典：「周官大行人，掌大賓客之禮，秦官有典客，掌諸侯及歸義蠻夷，漢改為鴻臚，建中六年，改大鴻臚為大行令，武帝太初元年，更名大鴻臚。」

◎隋書倭國傳：「大業三年，倭遣使朝貢，其國書曰：日出處天子，致書日沒處天子，無忘。」

◎班固文：「朱軒之使，鳳舉於龍堆之表。」鮑照文：「無辱鳳舉之使，靈怪不召而自彰。」鳳舉，謂使臣銜命而行，如風之遠舉也。

◎毛詩：「赫赫師尹，民具爾瞻。」言居上位者，衆庶俱瞻仰之也。

◎周禮：「若合諸侯，則共珠璣玉敦。」敦音對，古時盟會所用之器，敦以盛食，璣以盛血也，今人用爲外交故實。

◎毛詩：「令聞令望。」

◎註見第二篇。

◎左傳：「有事而會，不協而盟。」古者諸侯會盟，維持和平，春秋時代盛行之。

◎後漢書：「位登台鼎。」謂宰輔也。

◎論語：「賜不受命，而貨殖焉。」邢昺疏：「賜不受天子禮教之命，唯務使貨財生殖蓄息也。」史記漢書均有貨殖列傳。

◎後漢潘濬流傳：「濬父客死于西蜀，濬遂流寓西州。」謂寄居他鄉也。

◎蘇武字子卿，漢杜陵人。武帝時以中郎將使匈奴，被留，居北海上，積雪吞毡，仗節牧羊，十有九年，得還，昭帝拜爲典屬國，宣帝賜爵關內侯，圖形麒麟閣。武在匈奴時，娶胡婦，生子，名通國。李陵答武書所謂胤子無恙，指通國也。

◎要風傳寄：「唐大曆中，有陞生者，爲千牛，往視勳臣一品宅，一品命衣紅綃妓者，奉一甌與生食，生既歸，神迷意奪，豈嶺奴摩勒，負生入一品宅，逢紅綃所，復負生與紅綃出，紅綃遂歸崔生焉。」按宋國可談：「宋世殿中富人，多畜黑奴，有一種入水眼不眩者，謂之鬼嶺奴。」蓋卽今之馬來人種也。拳變而黑身，見晉書兩史唐宋時，用爲奴者更多。

◎陶潛與子書：「今遣一力，助汝薪水之勞，此亦人子也，可善遇之。」薪水，謂伐薪汲水，炊爨之事也。

◎李陵與蘇武詩：「攜手上河梁，遊子暮何之，徘徊蹊路側，恨恨不能辭，行人難久留，各言長相思。」其聲甚哀怨也。

◎杜甫秋興詩：「魚龍寂寞秋江冷，故國平居有所思。」

◎毛詩：「騶駘征夫，每懷靡及。」

十 致外交部部長(二)

某某先生賜鑒：意阿開覺，國際沸羹，蹈隙抵瑕，大有人在。

先生周旋槃敦，孤詣苦心，遜聽

風猷，曷勝欽仰，敬維

與居篤祐

中外揄蒙，甚頌甚頌。某某自哈佛大學畢業後，即赴歐洲，承巴黎某律師約爲助理，兼爲某報主編東方文化事略。日月不居，忽焉三載。本年一月，家君函召歸國。故山無恙，新歲載華。每侍家君燕閒，必舉

先生奉使華府之美談，期許某某之雅意，一門長幼，感頌同深。易云：震來虩虩，畏鄰戒也。時事如此，使

先生獨爲其難，豈惟智略過人，亦復勇氣百倍。

五雲在望，常蒸瓣香。下月初旬，送諸弟入都就學，謹當展謁

台墀，藉聆

清誨。先馳燕贖，肅頌

勛綏，惟祈

亮警不莊。

註釋

①左傳：「雖有憂，不可失也。」憂，環隙也。

②毛詩：「如婦如婦，如涕如淚。」言柔論聲騰，如蝴蝶之爭鳴，羹湯之揚滯也。

③禮記聘義：「瑕不韋瑜。」鄭氏注：「玉有病曰瑕。」人有怨曰隙。隙隙抵抵，言故尋事端，吹毛求疵也。

④註見第九篇④。

⑤說文：「葵，香木也。」榆，葵，謂榆楊清芬也。

⑥孔融與曹公書：「歲月不居。」

⑦羅虬與孫士章書：「此地地處限風聲，大有兵爭，故山相去八百里，想當無恙。」言故鄉風土人物，一切清平，無變遷也。

⑧顏延之詩：「昔辭秋未素，今也鶩載華。」蓋謂春也。

⑨論語：「子之燕居，申申如也。」燕，閒，猶云閒居。

⑩周易：「震來虩虩……雖凶无咎，長鄭戒也。」王弼注：「震之為義，威至而後乃懼也。故曰震來虩虩，恐懼之貌也。」又震之上

六注：「虞震之極，極震者也。居震之極，求中未得，故懼而索索，視而矍矍，无所安親也。已處叨極，而復征焉，凶其宜也。若恐非已造，彼助故懼，懼而戒，合于備預，故无咎也。」孔穎達正義：「長鄭戒也者，長鄭之動，懼而自戒，乃得无咎。」

⑪齊唐書鄭肅傳：「天瑞有五色雲，人瑞有鄭仁表。」

⑫燕，燒也。

⑬陳師道詩：「向來一瓣香，敢為曾南豐。」任淵注：「諸方開堂，坐第三瓣香，推本其得法所自，則云此一瓣香，敢為某人云云。」

后山詩，蓋用釋家語也。

和陸與陸孝璋書：「台榭在望，彷彿雲端。」台榭猶云台階。

一一 致軍政部部长（一）

某某先生勛鑒：爪牙圻父，^①掌九伐以正邦；^②

股肱^③夏卿，^④司五兵而將事；^⑤敬維

具瞻中外，^⑥

肅將威儀，屈突通之清以奉公；^⑦杜羣懿之忠於其職，^⑧以茲

偉績，實邁^⑨前賢，引企

英標，莫名私頌。某某解職歸里，忽忽二年，睹時事之多艱，念

賢勞之獨著，每思

雅量，輒憶前遊，^⑩髀肉復生，^⑪悵修名之不立，^⑫心香^⑬私淑，^⑭願

清誨之常聞，專肅祇候，敬頌

勛綬，諸惟

亮督不備。

註釋

①毛詩：「祈父，王之爪牙。」祈父，司馬也。尚書：「圻父彌遊，農父若保，安父定辟。」孔穎達疏：「司馬主圻封，故云圻父。父者，尊之辭。」

②周禮：「大司馬之職，掌以九伐之灋正邦國。」鄭氏注：「諸侯有違王命，則出兵以征伐之，所以正之也。」

③尚書：「帝曰：『臣作朕股肱耳目。』」左傳：「君之卿佐，是謂股肱。」

④周禮：「夏官司馬。」賈公彥疏：「鄭云：夏夏所立之官，馬者武也。言爲武者也。夏，雙齊萬物，天子立司馬，共掌邦政。」

⑤周禮：「夏官司馬。」司兵掌五兵，五盾，各辨其物與其等，以待軍事。」鄭司農云：「五兵者，戈、殳、戟、酋矛、夷矛。」

⑥毛詩：「赫赫師尹，民具爾瞻。」謝靈運文：「匡輔之烈，內外具瞻。」

⑦山堂肆考：「唐屈突通爲兵部尚書，從秦王平薛仁果時，賊珍寶山積，諸將爭取之，通獨無所取，帝聞之，曰：『清以奉國，名定不墮，待資金綬以榮之。』」

⑧山堂肆考：「僖宗時，杜羣懿爲兵部尚書，朱玫兵逼乘輿，帝走寶雞，是時棧道爲山南石君涉所斷，天子問關險阻，羣懿從之，未嘗稍去側帝旁，之曰：『竊盜古所謂忠於所事者耶！』」

現代交際尺牘大全 上編

三三

◎史記：「登三邁五。」邁，過也。

◎郭天挺與柳无咎札：「一別如雨，每憶前遊，輒復惘惘。」

◎三國志：「劉備曰：吾帶身不能斃，髀肉皆消，今不復騎，髀裏肉生，日月若馳，若將至矣！而功業不建，是以悲耳！」

◎楚辭離騷：「恐修名之不立。」梁書王僧辯傳：「修名既立，老至何遜。」修名，謂長垂後世之名也。

◎梁簡文帝文：「窗舒蕊蕊，室度心香。」謂中心虔誠，如蒸香供佛也。

◎註見第六篇。

一一一 致軍政部部长(二)

部長鈞鑒：乘馬在垆，◎長劍倚天，敬維

經武整軍，◎

正邦平國，◎

公忠之績，炳耀乎中樞，◎

將帥之才，推尊於戎府，◎引詹

牙纛，◎莫罄心香，◎某某前蒙

大部贊送意大利學習航空，去年暑期已經畢業，復承本校校長某先生紹介入某飛機工廠實驗，一年期滿，上月初旬，附輪歸國，日前由滬入京，恭詣。

大部報告一切矣。伏念某某出國之日，深荷

諭勉，並餽珍儀。

期待之殷，中心永矢。今茲學業纍成，飲水思源，敢

忘

高惠，敬陳素悃。所有留學經歷及歐洲各大國最近空軍編制情形，容俟詣謁

面稟，專肅寸簡，虔頌

勛綏，伏惟

垂鑒。

註釋

① 明宣宗兵部錄：「凡厥武臣，曠通敘勳，乘馬在朝，考牧用盡。」
② 簡雅：「林外韻之詞。」

◎左傳：「見可而進，知難而退，軍之善政也。能弱攻昧，武之善經也。子姑整軍而經武乎！」晉書文帝紀：「潛謀獨斷，整軍經武。」

◎周禮：「大司馬之職，掌以九伐之法正邦國。」尚書：「司馬掌邦政，統六師，平邦國。」

◎註見第九篇④。

◎李廣傳：「唐奉一兵部制：『瑣圍內朝，致延譽之美，珪符出守，樹威恩之績，永晉禁暴，事切安人，俾昇五戎之府，竹諧九流之選。』

五戎，弓矢、矛、戈、戟也。

◎毛詩：「祈父，予王之爪牙。」後世言牙旗、牙管、牙將，皆取義於此。羣軍中大旗也。游建殿詩：「寶刀爭雲亮，大纛助風號。」是也。

牙纛猶云牙旗。

◎註見第十一篇④。

◎漢書朱買臣傳：「詣關上壽，書久不報。」詣至也。

◎何遜答范雲詩：「華省直歲發，惠我多珍饈。」周禮：「選百羞豐物珍物以俟饋。」珍饈，猶珍物也。

◎范甯孝尚書集序：「感公期待，矚復網羅殘佚，與向編並行也。」期待，謂期許優待也。

◎毛詩：「中心藏之，何日忘之。」又：「永矢弗諼。」矢，誓也。

◎素問，謂察日候數。

一二三 致海軍部部長(一)

某某先生勳鑒：江可爲斬，而鐵鎖無用於

龍驤。海不揚波。而金甌。永固於鯨甲。中流砥柱。爭看
上將之宏勛。高屋建瓴。應是

三台。之勝算。敬維

澄清。志廣。

盪決。功多。掌九伐以正邦。與五兵。而同秩。

周麾之耀日。喜

破浪以乘風。逖聽

鴻猷。傾心曷藻。某某。流寓。青島。時戀春明。猶憶去歲入都。渥荷。

優禮。醉酒飽德。記燈火於高樓。送抱推襟。挹

風徽於永日。

樞廷在望。嚮往無任。所願

清誨之常聞。用慰衡門。之結想。專啓奉候。敬頌

勳綬惟祈

朗誓不具。

註釋

○南史：「隋師將濟江，軍將備防，趙文慶沮壞之，後主未決。孔範曰：『長江天塹，古以爲險，雖軍豈能飛渡。』」

○晉書王濬傳：「濬弘農人，爲羊祜參軍，祜薦爲巴郡太守，遷益州刺史，伐吳之役，武帝以濬爲龍驤將軍，治戰艦，發成都，吳人散

鐵鎖於江以橫截之，濬燒斷鐵鎖，直抵石頭城下，孫皓迎降，吳平，官至撫軍大將軍。」

○韓詩外傳：「成王時，越變氏重譯而朝。曰：天之不遊風疾雨，海之不揚波，三年矣。中國其有聖人乎？」

○南史：「太清元年二月，東魏司徒侯景，以河南十三州內屬，武帝曰：『我國家猶若金甌，一無傷缺。』」

○左思吳都賦：「危冠而出，疎劍而趨，屢帶鼓頭，扶踊屬鑿。」劉逵注：「鼓函，敵魚甲，可爲鏡。」淮南子：「鼓革摩兜，爲甲冑也。」

○尚書：「導河積石，至于龍門，南至于華陰，東至于底柱，又東至于孟津。」孔氏傳：「底柱山名，河水分流，包山而過，山見水中者，柱然。」

柱然。

○漢書：「秦形勝之國也，地勢便利，其以下兵於諸侯，皆猶居高屋之上，建瓴水也。」顏師古注：「瓴，盛水瓶也，居高屋之上，而傾

瓶水，言其向下之勢易也。」

○周禮大宗伯疏：「三台一名天柱，上台可命爲太尉，中台司中爲司徒，下台可稱爲司空。」故三公稱爲三台也。明史萬安以謫

佞辭歸，道中猶占驗三台星，以冀復相。

○孫子：「多算勝，少算不勝。」謂以多算勝少算也。後世謂計謀必就，曰勝算。

④後漢書范滂傳：「登車攬轡，慨然有澄清天下之志。」謂在官以天下清平爲己任也。

⑤陳書高祖紀：「臺主戴冕徐直。」日知錄：「古人以左右衛殺爲攝陳，其殺卒謂之攝邊，別帥謂之攝主。周書王勇傳有直邊都督，楊紹傳有別攝別將。」宋史：「率騎出邊。」則騎突抵禦之義也。袁枚文：「十盡十決，七縱七擒。」

⑥註見第十一篇。

⑦左傳：「委之常秩。」秩，職也，官也。五兵註見第十一篇。

⑧南史：「宗慤字元幹，南陽人，少時，叔父問其志，慤曰：願乘長風，破萬里浪。文帝時以實武將軍伐林邑，克之，後封諒陽侯。」王勃滕王閣序：「無路請纓，幸終軍之弱冠，有懷投筆，慕宗慤之長風。」李白詩：「長風破浪會有時，直挂雲帆濟滄海。」

⑨後漢書杜詩傳：「將帥和臨，士卒樂業。」言歡悅如危之賦藻也。

⑩註見第九篇。

⑪註見第八篇。

⑫毛詩：「既優既游。」游，樂也，厚也。

⑬毛詩：「既醉以酒，既飽以德。」

⑭羅大經懷章吏部詩：「燈火高樓燦燦甚，思量無限是湖州。」

⑮南史張充傳：「充與王儉齊曰：可謂通夢交魂，推襟送抱，惟丈人而已。」言彼此推誠相與交誼之辭也。

⑯何承天與劉諮議書：「載挹清塵，遂忘永日。」永久遠也。

⑰王海：「蘇頌奉詔，置局樞庭。」樞庭，猶言樞府。

⑱毛詩：「衡門之下，可以棲遲，泌之洋洋，可以漉飢。」衡與橫通，橫木爲門，言卑陋也。

⑲釋道安詩：「結想在巖阿。」結想，猶云結念。

甲 通候類 一三 致海軍部部長（一）

一四 致海軍部部長(二)

部長鈞鑒：舳艫千里，而橫海。揚威，壁壘。一新，而長江壯色，敬維

展旆乘風。

周麾耀日。

鴻儀咫尺，^① 夙願逾恆。某某自奉 軍事委員會調用以來，專辦編譯事宜，勉竭

駑駘，幸無貽誤。上月偕本會參謀顧問數人，出京參觀馬尾廈門兩地造船所各

船塢。某某雖職在傳譯，而於船塢工程，前在歐洲，曾有相當時間之研究，此次陪

同視察，參訂印證，^② 啓發^③ 良多。回京之後，草擬船塢改善管見二萬餘言，^④ 敬

謹繕呈，祇祈

鑒核。肅修蕪牘，虔頌

勛綬，伏惟

垂簷。

註釋

①漢書武帝紀：「自海陽浮江，親射蛟江中，獲之，綯纒千里。」蘇賦前亦繫賦：「綯纒千里，旌旗蔽空。」

②漢書：「武帝以韓說為橫海將軍，擊東越有功。」橫海，將軍之名號，謂能橫行海上也。

③漢書：「壁壘已定，穿窬不由路，是謂姦人。」壁壘，謂軍壘也。

④周易：「鴻漸于陸，其羽可用為儀。」鴻，謂風采也。左傳僖公九年：「王使宰孔賜齊侯酢，孔曰：以伯舅，董老，加勞，賜一級，無下拜。」猶曰：天威不遠，顧咫尺，小白余敢食天子之命，無下拜。」杜氏注：「八寸曰咫。」

⑤晉書蒲苾傳：「其書讀所發明，或左氏公羊所不載，亦足有所訂正。」訂，平議也。參訂，謂參考平議也。後漢書張衡傳：「采前世成事，以為證據。」宋書沈約自序：「擇摘是非，各標證據。」證據，實也。印證，謂彼此質驗也。

⑥玉篇：「啓，開發也。」尙書堯典：「胤子朱啓明。」孔氏傳：「啓，開也。」啓發，即開發也。

⑦戰國策：「臣請三言而已矣，曰海大魚。」漢書東方朔傳：「凡臣朔固已誦四十四萬言。」一字為一言，如云數萬言，即數萬字也。

一五 致財政部部長(一)

甲 議候類 一五 致財政部部長(一)

某某先生勛鑒：家宰制用，考之於周，尙書主財，徵之於漢。張茂先之綜覈，日
起有功。杜元凱之度支，風規甚峻。今之

盛業，實邁前修。敬維

中樞幹濟。

左藏恢弘，遙企

英標，曷勝馨頌。某某承乏某大學教授，日月不居，遂復數載，久違京邑，苦憶

舊遊，每思

雅度之雍容，益覺春明之浩蕩。新亭悵望，知風景之不殊。

茂績遙聞，喜軍儲之日足，清議既允。

令譽彌昭，所冀

不遺在野，時惠

德音。雖雪夜剡溪，乘興不必見戴。而桃花潭水，深情且逾於汪矣。專此奉

候敬頌

勤綏諸惟

亮督不備。

商權

舉與一句意屬對方。如爲義足行敬起見，亦可擡頭。

註釋

①周禮：「冢宰制國用，必於歲之杪，量入以出。」鄭氏注：「制國用，如今度支經用。」

②杜氏通典：「漢置尚書五人，其三爲民曹，主財帛委輸。」

③晉書張華傳：「華字茂先，方城人，學業優博，辭藻溫麗，圖終方伎之書，莫不詳覽，伐侯，華以爲必克，功成，封廣武侯，爲度支尚書，決河渠，地延萬里。」漢書宣帝紀贊：「考宣之治，信賞必罰，綜核名實。」謂既有其名，必求其實際，綜聚而考核之也。核亦作覈。

④董仲舒賢良策：「彊勉學問，則聞見博，而知益明，彊勉行道，則德日起，而大有功。」

⑤晉書杜預傳：「預字元凱，杜陵人，秦始中爲河東尹，羊祜舉以自代，拜鎮南大將軍，伐吳，平之，嘗爲度支尚書，美輶運之計。」

⑥段成式羣芳譜：「正色立朝，風規其肅。」謂風采法度也。

⑦屈原離騷：「香吾法夫前修兮，非世俗之所服。」王逸注：「古之聞人曰前修。」

甲 誦候類 一五 致財政部部長（一）

⑥唐書陳少游傳：「少游長機變，所至一切幹濟。」謂才能足以濟事也。

⑦隋文帝時，車懸皆滿，乃更開左藏之院，稱屬以受之。唐時左右藏皆置令丞，左藏掌錢帛雜綵，天下賦詠，右藏掌金玉珠寶，銅鐵骨角齒毛綵畫。宋初諸州貢賦，均輸左藏，南渡後，分設左藏南庫，及封樁庫，元禁中出納分三庫，御用寶玉，遠方珍異，隸內藏，金銀寶珠衣服隸右藏，常課衣服綺羅織布隸左藏，見杜氏通典及續通典。

⑧註見第十篇⑥。

⑨尚書揚誓：「率制夏邑。」毛詩爾雅：「陸邑夏翼。」蓋王畿亦稱邑也。潘岳文：「執訊獲醜，京邑騰懼。」京邑猶云京師。

⑩范成大寄劉孝功詩：「舊遊如昨日，三泖漲春煙。」

⑪班固兩都賦序：「雍容揄揚，著於後嗣。」雍容，舒和也。

⑫註見第八篇⑥。

⑬天中記：「周顯德三年詔曰：『登殿之下，謂之階墀，萬國駭奔，四方繁會。』」

⑭寰宇記：「陝澹觀在勞勞山上，有亭七間，名曰新亭。」一統志：「新亭在江陰縣南，一曰勞勞亭，亦名臨澹觀，吳時築，東晉初，諸名士每遊宴於此。」

⑮晉書王導傳：「諸名士於新亭飲宴，周顛嘆曰：『風景不殊，舉目有山河之異，皆相視流涕，潸然變色，語諸人曰：『諸君當共戮力王室，克復神州，何至作楚囚相對乎？』」

⑯杜氏通典：「晉文帝立度支尚書，以計軍儲。」軍儲，猶云軍需也。

⑰唐書：「天下清議尚之。」謂清流所持之議論也。

⑱毛詩大雅：「貊其德音。」漢書董仲舒黃良策：「陛下發德音，下明詔。」德音，善言也。

⑲世說新語：「王敦之居山陰，夜雪初霽，月色清朗，忽憶戴逵，時逵在剡，便乘小船訪之，至門而返，曰：『乘興而來，興盡而返，何必』」

見前。

◎李白贈汪倫詩：「桃花潭水深千尺，不及汪倫送我情。」

一六 致財政部部長（二）

某某先生勛鑒：澄江如練，^①沖氣穆清。^②敬維

歲成制用。^③

財阜調元。^④景歧

駿猷。^⑤莫名覺藻。^⑥近年以來，國際經濟表見事實，其最要者，如中日經濟提攜運動也，英國對華資助運動也，美國白銀收買政策之猛進及銀價高漲也，意國及德國之施行對外貿易管理制也，其次如英磅外匯率之減低也，比利時之貝爾加本位貨幣之貶值也，美國在美洲設法抵禦外貨運動也，固知利害之切膚，亦慮風波之及我。側聞^⑦

先生廣益集思^①，協謀因應，爰有國際經濟討論會之設，甚盛甚休^②。下走前歲歸自美洲，承乏^③山西大學教授，暇日覃思^④於本年春間，草成列強新經濟戰略二編。研究國際經濟鬭爭之階段，及其特性，而歸納於培養實力，以爲自衛自助之基。寄呈一部，尙乞

清裁。河汾教授，無長策以匡時^⑤。

海若^⑥淵沖，納細流而成大^⑦。臨風具簡，鄉往^⑧。無任祇頌

勛綬，惟希

荃照不具。

商榷

澄江沖氣，自是春景；歲成財阜四字，對外省財政廳長亦可用。

註釋

① 謝朓臨登三山還望京邑詩：「白日遊飛甍，參差皆可見。餘霞散成綺，澄江靜如練。喧息覆春洲，雜英滿芳甸。」

①傅玄揚海澤：「乾坤絪縕，沖氣澄清，幽整靈動，萬物樂生。」沖，和也。

②周禮天官冢宰：「向會以參互考日成，以月要考月成，以歲會考歲成。」陸德明釋文：「以參互考日成者，可會鉤考之官，以司書之等相參交互，考一日之成，一日之中，計算文書也。以月要考月成者，月計曰要，亦與諸職參互，考一月成事文書也。以歲會考歲成者，歲計曰會，以一歲之會計，考當歲成事文書。」制用註見第十五篇。

③「南風之薰兮，可以解吾民之愠兮；南風之時兮，可以阜吾民之財兮。」此大舜南風歌也。見尸子，史記，家語諸書。

④毛詩商頌：「爲下國駿麗。」毛亨傳：「駿，大也。」尚書君陳：「爾有嘉謀嘉猷，則入告爾后于內。」孔氏傳：「猷，謀也。」

⑤註見第十三篇。

⑥虞集文：「羣議切膚。」晏子：「越石父爲人臣僕於中季，曰：不免凍餒之切吾身，是以爲僕也。」切膚，猶云切身。

⑦毛詩召南：「在南山之側。」側，旁也。列子：「夫子嘗語伯昏瞀人，吾側聞之。」側聞，謂從旁聞之也。

⑧蜀志諸葛亮傳：「集衆思，廣忠益。」

⑨尚書說命：「實萬世無疆之休。」又周官：「作德心逸日休。」孔傳：「休，善也，慶也。」

⑩左傳成公二年：「驪隊曰：敢告不敏，攝官承乏。」杜氏注：「乏，臣也。」禮記月令：「季春，命有司，振乏絕。」鄭氏注：「暫無曰乏。」

⑪後漢薛何休傳：「乃作春秋公羊解詁，覃思不闕門，十有七年。」覃，深也。覃思，謂深思也。

⑫王通贛龍門人，字仲淹，幼篤學，西遊長安，奏太平十二策，不用，退居河汾教授，受業者千數，門人謚曰文中子。

⑬楚辭：「今海者，舞漚矣。」莊子：「河伯東行，至於北海，望洋向若而嘆。」郭象注：「若，海神。」蓋北海之神名若也。後遂泛以海渚爲海神之名，蕭愨詩：「無異在淵渚。」淵渚，深中而澹澹之義也。

⑭張敞文：「俗宗不辭小讓，是以積其高，溯源廣納細流，故能成其大。」

⑮禮記曲禮：「則必鄉長者所視。」又「請席何鄉。」鄉，與嚮同。史記：「高山仰止，景行行止，雖不能至，心向往之。」嚮往，即向

往也。

一七 致實業部部長（一）

某某先生勛鑒：一日食，二日貨。考洪範於周書，十年木，百年人。

效弘規於筦子，固知

德惟善政，政在養民。亦曰民生在勤，勤則不匱。敬維

日省月試。

利用厚生。水火金木土穀，既六府之孔修。

訓農通商惠工，勤三民而典職。

台華在望，馨頌無任。某某海外歸來，於茲數載，經營實業，鑿具規模。敢辭手
胼足胝之勞，亦有意廣才疏之懼。所幸匪氛稍靖，輸出日增，預計今歲
贏餘，當在什二以上，此皆

大部獎勵^①之效。加以股東信任之深，惟有業業兢兢^②，力謀改進，以副厚期，伏乞

時錫教言，長資策護^③。春明^④千里，跂仰曷勝。專肅祗候，虔頌

勛綏，諸惟

激督。

註釋

①尚書洪範：「一日食，二日貨。」孔穎達疏：「一日食，教民使勤農桑也。二日貨，教民使求資用也。」

②管子：「一年之計，莫若樹穀。十年之計，莫若樹木。終身之計，莫若樹人。」按吳淑事類賦勸課：「十年則樹木之計成，百年則樹人之計得。」管亦作筭。

③尚書大禹謨：「德惟善政，政在養民。」孔穎達疏：「所謂德者，惟是善於政也。政之所爲，在於養民。」

④左傳宣公十二年：「訓之以若敖劓胃，筆路監綏，以啓山林，箴之曰：民生在勤，勤則不匱，不可謂騫。」

⑤禮記中庶：「日省月試，既慶稱事，所以勸百工也。」鄭氏注：「日省月試，考校其成功也。既證爲箴。」

⑥尚書大禹謨：「正德，利用，厚生，惟和。」孔氏傳：「正德以率下，利用以阜財，厚生以養民。」

⑦尚書大禹謨：「水火，金，木，土，穀，惟修。」又「六府三事，允治，萬世永賴。」孔氏傳：「言養民之本，在先修六府。」按六府，水火，金，

甲 通候類 一七 致實業部部長(一)

木七、穀也。

①左傳閔公二年：「衛文公大布之衣，大帛之冠，務材，訓農，通商，惠工。」孔穎達疏：「務材，務在植材用也。訓農，訓民勸農業也。通商，通商販之路，令貨利往來也。惠工，加恩惠於百工，賞其利器用也。」

②穀梁傳成公元年：「古者四民，有士民，有商民，有農民，有工民。」此云三民，謂農工商也。

③台華猶謂台端之風華也。

④毛詩大雅：「經之營之。」

⑤荀子子道篇：「孔子曰：有人於此，夙興夜寐，耕芸樹藝，手足胼胝，以養其親。」廣韻：「胼，胼，皮上堅也。」

⑥後漢書孔融傳：「融負其高氣，志在靖難，而才疎意廣，迄無成功。」

⑦玉篇：「氣，氣也。」左傳襄公二十七年：「楚氣甚盛。」

⑧左傳僖公九年：「君務靖亂，毋勸于行。」毛詩周頌：「肆其殲之。」靖，治也，安也。

⑨史記：「周人之俗，治產業，力工商，逐什二以爲務。」鄭經商者，於十分中求贏其二也。

⑩尚書大禹謨：「勸之以九歌，勿違。」廣韻：「勸，獎勉也，助也。」

⑪尚書皋陶謨：「兢兢業業，一日二日萬幾。」孔氏傳：「兢兢，戒慎，業業，危懼，幾，微也。言當戒懼萬事之微。」

⑫屈原離騷：「求築榑之所同。」架，向矩，榑，度也。亦作架榑。

⑬註見第八篇。

一八 致實業部部長(一一)

某某先生賜鑒滄溟萬里，時通葵藿之忱，玉露三秋，更賦兼葭之句，敬維
務材訓農。

通商惠工，遙企

英猷，莫名馨頌。本月五日，由駐德大使館轉到

大部公函一件，承

命調查英法比三國朝野人士，對於我國開發實業之投資意向，以爲因勢利導
之標準。

周慮盡籌，甚佩甚佩，容俟赴各該國分別接洽後，陸續陳報，顧有不能已於言者，
自中法越南專約簽訂，中央接受法方要求，減徵洋米進口稅，俾資互惠，於是全
體進口洋米，均在減征之列，爾後洋米充溢，自在意中。我既以農立國，若令洋米
充溢，則我農業經濟之崩潰，將無可逃避，此其一。內地秩序，未全安定，農民作業，
荒廢猶多，此其二。我國實業，固以農爲大宗，情勢如此，以云吸收外資，而謀開發，

外人雖不裹足，寧無戒心？惟中國今後需要，厥爲工業，此則外人所公認，亦有事實之宣昭。故吸收巨量外資，仍屬可能。但宜在各種生產階段間，酌量分配，略爲調協，毋使枯榮懸殊，致有破壞工業市場之危險。管見如此，未審先生謂然否？海天曠邈，結想无任。專肅，祇頌

勛綏，諸惟

荃照。

商權

國難嚴重如此，對於外交、財政、實業、教育諸大端，平日宜深刻研究，與主管官吏言事，尤當有切實理論及辦法，方足以感動羈縻而契合心跡。以上各篇，發表意見而已。斟酌善善，是在通才。

註釋

◎梁簡文帝文：『滄溟之深，不能比其大。』滄溟，海水翻漫貌。

◎曹植求存問親戚疏：『若葵藿之傾葉，太陽雖不爲之回光，然向之者誠也。』

◎杜康詩：「玉露潤萬樹樹林，巫山巫峽氣蕭森。」謂秋露潤白如玉也。

◎毛詩秦風：「蒹葭蒼蒼，白露爲霜，所謂伊人，在水一方。」喻懷人之不見也。

◎註見第十七篇。

◎尚書酒誥：「黍稷非馨，明德惟馨。」玉鑿：「鑿香通聞也。」鑿，猶云馨香醇頌。

◎史記孫子傳：「善戰者，因其勢而利導之。」言就其自然之趨勢，利用而導之行也。

◎玉篇：「囊，包也。」莊子大宗師：「裹飯而往食之。」史記：「杜口裹足，莫敢向秦。」謂足如包裹而不前也。

一九 致教育部部長（一）

某某先生勛鑒：敬敷之教五，而黽勉。美夫虞廷，中庸之德三，而

發揮，宗於孔氏，以

圭璋，之品重，故廣西膠東序，以成材，惟

台鼎，之名高，故負北斗泰山，之雅望，敬想

藜光曜丙。

茂績惟寅，屬桃李於

春官，儲棟梁於夏屋，引詹

喬采，莫罄揄忱。某某山澤之癯，情親魚鳥，本無問世之心，乃爲鄉黨所

督。本省某學校，屢經事變，校長一席，自好者往往畏避。省府教廳，以某某老馬

識途，更相敦勸，固辭半載，情不獲申，始以前月某日，到校視事，勉竭駑駘，

期於整飭，素荷

垂注，謹以狀聞，伏祈

訓示有加，資爲榘矱。曷勝叩禱。專肅祇候，敬頌

勛綏，諸惟

激譽。

註釋

①尚書經典：「汝作司徒，敬敷五教，在寬。」孔氏傳：「布五常之教在寬，所以得人心。」按五教，義、慈、友、恭、孝也。

①孫季昭宗兄編：「龍，龍，龍之行，勉強自力，故曰龍。」毛詩：「龍，龍同心，不宜有怒。」

②禮記：「中庸：『智，仁，勇，三者，天下之達德也。』」

③周易：「六爻發，旁通情也。」孔穎達疏：「發，謂發語也，擲，謂擲散也。言六爻發，擲，旁通萬物之情也。」李德裕易州侯齋記：「博采舊史，發揮新意。」

④說文：「刺，上爲走，牛圭爲刺，禮六幣，圭以馬，璋以皮，璧以帛，琮以錦，琥以繒，蜃以龜。」毛詩：「如圭如璋。」

⑤唐李暉讓成均祭酒表：「東序，禮學，辨爲教化之宮，西序，禮門，實應文章之宿。」

⑥註見第六篇。

⑦唐書：禮：「愈以六經之文爲語，儒，學者仰之如泰山北斗。」

⑧王勃滕王閣序：「都督閻公之雅望，聖裁遙臨。」

⑨三輔黃圖：「劉向校書天祿閣，夜有老人植青藜杖，叩閣而進，吹杖端，耀以照之，向讀問姓名，云：我是太乙之精。」蓬，宿，瑣，事。

「用，藜爲燃，光，景明，可傳火散夜也。」漢書：「夜，濁，起，中，黃，門，持，五，夜，甲，夜，學，傳，乙，夜，學，傳，丙，夜，學，傳，丁，夜，學，傳，戊，夜，學。」唐書：

「太宗嘗曰：朕思天下事，丙夜不安枕。」

⑩尚書：舜：「夙，夜，惟，寅，直，載，惟，清。」寅，敬也。

⑪通鑑：「狄，仁，際，瀛，魏，元，崇，等，教，十，人，奉，爲，名，臣，或，謂，仁，傑，曰：天，下，桃，李，悉，在，公，門，蓋，謂，門，人，之，盛，也。」劉禹錫詩：「一，日，聲，名，徧，天，下，滿，城，桃，李，屬，春，官。」

⑫周禮：春，官，宗，伯：「大，司，樂，掌，成，均，之，法，以，治，建，國，之，學，政，而，合，國，之，子，弟，焉。」陸德明釋文：「成，均，五，帝，學，名，建，立，也。」周，人，以，成，均，學，之，舊，法，式，以，立，國，之，學，內，政，教，也。」云而合國之子弟焉者。大司樂合聚國子弟，將以此教之。」

⑬毛詩：秦，風：「於我乎，夏，屋，渠，渠。」禮記：檀弓：「見若覆夏屋者矣。」夏，大，也。

揚子太玄經：「物發明堂，雷奮皇皇。」雷，物長春風之聲貌也。晉仲舒爾雅：「雲五色爲慶，三色成壽。」雷采，謂瑞雲之采也。

班固西都賦序：「雍容揄揚，著於後嗣。」揄，引也。揚，舉也。揄，悅者，揄揚之說也。

漢書司馬相如傳：「列仙之儒，居山澤間，形容甚瘠。」沈約齊故安陸昭王傳文：「雍容政貌。」雍與肥同。得也。

禮記曲禮：「故州閭鄉黨稱其孝。」鄭氏注：「周禮二十五家爲閭，四閭爲族，五族爲黨，五黨爲州，五州爲鄉。」按漢書食貨志：「五家爲鄰，五鄰爲里，四里爲族，五族爲黨，五黨爲州，五州爲鄉。」

孟子：「鄉黨自好者不爲。」猶言潔身自愛也。

韓非子：「管仲隰朋從於桓公而伐孤竹。春往冬返，迷惑失道。管仲曰：老馬之智可用也。乃放老馬而隨之，遂得道。」

尚書舜典：「禹拜稽首固辭。」固，謂再三也。

楚辭：「乘驚駘而馳驅。」皮日休文：「遺交善御，不能御驚駘。駘，從者仲尼之驚駘也。」驚駘，馬之頓步者。

唐書呂誼傳：「少力於學，志行整節。」整節，謂凡事使有條理也。

註見第十七篇。

二一〇 致教育部部長(二)

某某先生賜鑒：陽暉燦野，溽暑塵紛。敬想

澄懷清穆，自有冰壺。至爲忻頌。前在京滬道中，承

詢留學外國專科以上學校畢業生實習情形。

虛衷若谷，欽企曷勝。抵站匆匆，未及詳對。上年

大部訓令各大學區各省教育廳，選派留學生，務於理工兩科，特加注意。夫理工學生，爲建設事業基本人材，自必體用兼該。方足勝任愉快。似宜商請外交部轉令駐外各公使，凡屬理工各科留學生，畢業後，由公使紹介該國著名工廠，就目前需要科目，如機、電、化、冶、紡織等，選擇一種，實習二三年，然後回國，始能致用。某某學術淺薄，比年經營工業，幸不僨事。自審獲益於留學時代，工廠實習者爲多。

先生敬教勸學，實事求是，猥荷

明問，輒抒管見，敬乞

清裁，專肅，祇頌

勳綬，惟祈

徵管不宣。

商榷

篇首四句，普通文官，夏季通候均可用。篇末敬致勸學實事求是二語，以之領外省教育廳長亦可。

註釋

- ①歐陽修夏熱詩：「陽輝燦四野，萬里織雲收。」
- ②禮記月令：「土潤溽暑。」按鄭氏注：溽，塗澤也。文本相連，後人裁截作溽暑字。晉李顯詩：「炎光燦南溽，溽暑融三夏。」蘇詩：「炎蒸碎碎震雷吐。」舊習用久矣。
- ③顯延之夏夜詩：「炎天方埃鬱，暑安關塵紛。」
- ④毛詩大雅：「吉甫作頌，穆如清風。」
- ⑤關機活法：「李延年如冰壺秋月，筆斂無瑕。」杜甫詩：「冰壺玉鏡懸清秋。」冰壺，喻心之清也。
- ⑥註見第二篇④。
- ⑦晉書傅玄元年：「此該之變而道之也。」揚子太玄經：「萬物該兼。」廣韻：「該，備也，成也。」
- ⑧禮記大學：「一言僨事。」僨，覆敗也。
- ⑨左傳閔公二年：「衛文公大布之衣，大帛之冠。」……敬教勸學，授方任能。」
- ⑩漢書河間獻王傳：「修學好古，實事求是。」晉書得事實，每求真是也。

一一一 致交通部部長（一）

某某先生勛鑒：庚郵。傳命知

盛德之流行。

寅亮。持躬，作巨川之舟楫。

遐矚。炯乎巖電。

深謀敢在下風。引領

鴻猷。傾心覺頌。某某前在京邑。數接

清顏。淵明。親友，思入表之停雲。希逸。音塵，賦千里之明月。眷言

款洽。實慰平生。歲月不居。別來二載，星離雨散，感意氣於當筵。水遠山長，

寄情懷於瑤瑟。側聞

近在樞府。勞盡。尤多，物望。所歸，定無虛士。五雲天際，思

德滋深，所冀

燕閒，好音。是惠，用慰渴想，跋幸曷勝。專肅奉候，祇頌

勤綏，惟祈

朗管不具。

註釋

○郎登龍辭：「丙枕或思前夜席，庚郵亭肯後錄車。」王鑑：「庚，史也。」周易異卦：「先庚三日，後庚三日，吉。」庚亦訓更。庚郵，謂郵筒更相傳遞也。

○孟子：「德之流行，遠於置郵而傳命。」

○尚書：「寅亮天地。」寅，敬畏也。亮，輔翼也。

○尚書說命：「若濟巨川，用汝作舟楫。」按航政屬交通部，故有舟楫之辭。

○續齊東野語：「極神遠隔，韻會：「隔，視也。」遐，猶云遠隔。

○晉書王戎傳：「戎視日不眩，裴階見而目之曰：戎眼矜矜，如廢下電。」玉鑑：「炯炯，明察也。」

○左傳：「皇天后土，實聞君之言，羣臣敢在下風。」在風之下向，曰下風。

○史記河渠書：「禹錫鴻水。」鴻，大也。鴻猷，大猷也。

○鳧嶺，亦飛諫之意。詳見第十三篇。

一二一 致交通部部長(二)

部長賜鑒。煙凝城闕。氣迎少暉。之車。露湛庭林。影促羲和。之轡。仰

清暉。於天際。振

素節。於樞垣。敬想

壯猷。平格。

良輔。匡時。引跋

高標。莫名馨頌。某某於民國二十二年自比利時歸。服務天津電報總局。以

嚴君廢疾。迎養未能。辭職南旋。事親教弟。端居多暇。撰有實驗電報學及

無線電工程要覽二書。本年春間。先後出版。不辭艱陋。貢獻學人。豈有干祿

之情。忝居故吏之列。寄呈二部。伏乞

教正。寒雨兼旬。江波無極。肅修寸簡。敬頌

勛綏統惟

垂簷不莊。

商榷

爲首樞樞城闕至其名雖瑣語凡與中央各部長秋季通候均可用。

註釋

①宋南平王劉縯秋歌：『白露下微輝，明月流素光，凝想泛城闕，淒風入軒房。』

②禮記月令：『孟秋之月，日在翼昏虛星中。旦華中，其日庚辛，其神鷹收。』按少皞亦作少昊，金天氏也。

③孫綽詩：『蕭瑟仲秋月，酸鼻風雲高，滄露瀉蔭林，密葉辭榮條。』毛詩小雅：『漭漭露斯。』漭漭，露盛貌。

④楚辭：『吾令羲和弭節兮，王逸注：『羲和，日御也。』

⑤釋名：『轡，曉也，牽引拂晨，以制馬也。』陸佃曰：『御，駕馬以轡爲主，御，驅馬以轡爲主。』

⑥周易未濟：『君子之光，其暉吉也。』暉，光也。

⑦張鷟七命：『白商素節，月既授衣，天凝地閉，風厲霜飛。』

⑧樞樞，猶云樞府，樞庭。註見第二十一篇⑥。

⑨毛詩小雅：『方叔元老，克壯其楛。』楛，音義同。

甲 通候類 二二 致文通部部長二二

①尚書君爽：「天壽平格。」孔穎達疏：「格訓至也，平謂政教均平，至謂道有所至也。……有平至之德，則天與之長壽。」

②禮記文王世子：「設四輔。」四輔，官名。師保疑丞也，後世遂爲相臣之通稱。如輔相、輔弼、良輔、元輔等是也。

③舊唐書：「高標峻尚。」高枝曰標，故謂卓越爲高標。

④周易：「家人有嚴君焉，父母之謂也。」今人專稱父曰嚴君。禮記：「廢疾非人不養者。」廢疾，謂精神或體力不完全者。

⑤周易履卦：「其旋元吉。」旋，反也，回也。

⑥孟浩然詩：「欲濟無舟楫，端居恥聖明。」端居，猶曰平居。

⑦史記李斯傳：「能薄而材謝。」謝，淺也。

⑧凡研究一切學術之士，謂之學人，或曰學者。

⑨論語：「子張學干祿。」干祿，求俸祿也。

⑩漢書：「悉召故吏五十六人。」謝朓拜中軍記室辭隋王晟：「故吏文學謝賦死罪死罪。」故吏，舊日屬吏也。

⑪證文：「十日爲旬。」兼旬，謂二十日以上也。

一三三 致鐵道部部長（一）

某某先生勛鑒：藍縷筮路，開道而紉。五丁，捷足高材。步程而斥一亥。

勤從衡之遠略，

懋經緯之豐功。

台隍翹瞻，頌忱曷極。某某去歲海外考察歸來，本省人士，僉以敬恭桑梓之義，相與督責，辭不獲已，遂乃承乏。某事，屈指三閱月矣。經費支絀，而待舉之事甚多；流品雜選，而推轂之來不已。媿非槃根錯節之才，卻有捉衿見肘之象。前聞

先生到部，裁抑倖進，革去弊端，真是利劍削腐手段。遙企

英猷，無任欽服。往在都門，幸承

清塵。

殷勤款洽，實慰平生。別既數年，道阻千里，每一結想，彷彿前塵。邇日興居何似？至爲系念。專肅奉候，敬頌

勛綏，惟祈

激督不具。

註釋

○左傳宣公十二年：「郤路藍縷，以啓山林。」藍，路，柴車也。藍縷，敝衣也。言駕柴車，服敝衣，以開闢土地道路也。

○禮記王制：「不孝者，君劓以啓。」劓，與黜同，退也。

○水經注：「秦惠王欲伐蜀，而不知道，作五石牛，以金置尾下，言能負金。蜀王令五丁引之成道。」蜀王本紀：「天爲蜀王生五丁力士，能徙山。」

○史記：「劉徹曰：『秦失其鹿，天下共逐，高材疾足者先得之。』」疾，捷也。

○淮南子：「禹使鯀亥步自北極，至于南極，二億三萬三千五百里七十五步。」按，鯀，善行人，禹之臣。

○毛詩齊風：「衛從其政。」東阿曰衛，南北曰從，與縱橫同。

○毛詩小雅：「維桑與梓，必恭必敬止。」後世以桑梓爲鄉里之稱者，因詩維桑梓，父之所植也。

○史記項羽紀：「聞大王有意督過之。」裴駰集解：「督，責也。」史記李斯傳：「斯阿二世意，欲求容，以奮對曰：夫實主者，必且能全道而行督責之術者也……齊襄二世悅，於是行督責益嚴。」

○註見第十六篇⑤

○支離，支離缺劣也。

○漢書文志：「儒家流，道家流……各有所從出，分九家。」世說新語：「桓曰：第一流復是誰？劉曰：正是我輩。」此以流爲派別也。魏用九品官人法，隋唐官制，復有流內流外，流品二字，蓋謂人之學術德行，在社會上所佔地位而分別也。

○漢書劉向傳：「周文開基，西郊雜遷。」曹植洛神賦：「衆靈雜遷。」

○史記鄭當時傳：「其推轂士，常以爲賢于己。」正義：「鄭舉人謂之推轂。」

◎後漢書：「不遇髮根錯錯，何以別利器乎？」髮錯，喻事勢之艱阻也。

◎莊子：「管子居衡，十年不製衣，正冠而纓絕，捉衿而肘見。」言衣不能蔽體，因喻才智愚昧。

◎枚乘文：「譬如蠅蚋之附羣牛，腐肉之隨利劍。」

◎名苑：「鹿大者曰麀，羣鹿隨之，視塵尾所轉而往，古之談者擬焉。」
◎晉書王衍傳：「衍於善玄言，唯談老莊爲事，每提玉柄麀尾，與手同色。」
◎林景熙詩：「疑是神仙接塵談。」清塵，謂清談也。

◎註見第二一節。

◎毛詩箋風：「勃瀾從之，道阻且長。」
◎謝莊月賦：「美人邁兮音塵闕，隔千里兮共明月。」

◎楞嚴經：「佛告阿難，一切世間大小內外諸所事變，各屬前塵。」前塵，謂當前之境也。

二四 致鐵道部部长(二)

某某先生勛鑒，鵬舟桂館，感金帝之宸遊，鶴露華林，望

珠庭於天際，敬維

三台亮節，

百祿是荷，引歧

清徽，不任馨頌。上年九月，奉某公署令，派往歐洲，調查某項事件。本年三月，轉赴蘇聯，取道西比利亞歸國。途次哈爾濱，適值中東鐵道買賣交涉，積極進行。經向路局友人密詢原委，關於會計及債務部分情形，尤爲詳晰。抵大連後，因滿鐵公司人員，同學頗多，挽留小住。遂復談及該路管理行政，承送各種統計並其他圖書多件。回上海後，草成三路近況紀要一書，詳述此次經由西比利亞中東南滿三鐵路，觀察所得，意欲爲我當局參考之資。先生主持路政，廣益集思，謹錄副本，先行呈教。他日刊行，仍當以善本奉贈也。專此肅達，祇頌勛綏，惟希荃照不備。

商權

露丹桂館至引歧清歡請語，秋日頌中央各部長均適用。

註釋

① 王子年拾遺記：「漢武帝嘗以季秋，泛靈鷲之舟於琳池中，桂露之上，以香金爲鉤，綴絲爲綸，丹鯉爲餌，釣白蛟焉。」

② 禮記月令：「孟秋之月……其帝少暉。」少暉，金天氏也。一曰金帝。

③ 王維詩：「爲衆鳴氣行時令，不是宸遊玩物華。」宸遊，謂帝王巡遊也。

④ 風土記：「鳴鶴戒露，白鶴也。此鳥性警，至八月日露降，即高鳴相警。」

⑤ 唐書：「李絳謂李元曰：日角殊庭，非庸人相。」謂天庭圓滿也。

⑥ 世說新語：「桓大司馬曰：仁祖企脚北窗下，彈琵琶，故自有天際真人想。」

⑦ 周禮疏：「三台一名天柱，上台司命爲太尉，中台中爲司徒，下台司祿爲司空。」

⑧ 毛詩商頌：「百禘是何。」正義：「何上聲，同荷，儻也，貢也。」

⑨ 晉書殷浩傳論：「清徽雅量，恭謙攸歸。」又宗室傳論：「清徽至範，爲晉宗英。」

⑩ 禮記學記：「三王之祭川也，皆先河而後海，或源也，或委也，此之謂務水。」鄭氏注：「源，泉所出也。委，流所聚也。始出一勺，卒成

不測。」源又作原。

⑪ 集韻：「晰明也。」

⑫ 註見第十六篇⑫。

一一五 致蒙藏委員會委員長（一）

某某先生勳鑒：青陽被物，而北漠春熙；蒼壁行仁，而西陲露縹。敬維

籌邊定遠。

懷德敷文，引領

高標，曷勝私淑。某某故園息迹，久閱歲時，泌水癯飢，只談風月。眷

言

舊雨，憶他年剪燭之西窗。若論

壯猷，景當世

名賢，而北面，屬時運之艱虞，念民生之憔悴，豈惟吾圉莫固，實憂左

衽，爲戎。

先生輔翼樞衡，盡心公室，每聞

讜論，深嘆

藎懷。某某赤米白鹽，雖有一丘之適，而槩崩棟折，並無三窟之營。所

冀

清誨之加，卽是空谷之喜。◎ 專啓奉候，祇頌

勛綬，惟希

激答不備。

註釋

○爾雅：「春爲青陽。」

◎毛詩大雅：「天被爾祿。」鄭氏箋：「天覆被女以祿位，使壽福天下。」被物，猶覆被萬物。

◎老子：「衆人熙熙，如登春臺，如享大宰。」熙和也。

◎尚書考靈囑：「眷佩若璧，乘若馬以出遊。登令於外，眷行仁政，以順天常而安國。」

◎張衡西京賦：「采飾纈纈。」纈，繁采色也。纈，露者，露映日光，五色著采也。

◎薛稷總在四川成都之西，唐李德裕建四壁圖畫其險要，日與習邊事者畫其上，今遺址尙存。

◎漢書班超傳：「明帝時，使西域，服西域五十餘國，任都護，封定遠侯。」

◎尚書：「懷遠以德。」禮以德懷柔遠方之人。

◎尚書：「帝乃誕敷文德。」誕，大也。敷，布也。

◎註見第三三篇。

註見第六篇。

柳宗元詩：「惡寄還鄉夢，殷勤入故園。」

莊子：「不知處陰以休影，處禿以息迹，慮亦盡矣。」

毛詩陳風：「陽之洋洋，可以樂飢。」鄭氏箋：「陽水之流，洋洋然，飢者見之，可欲以樂飢。」糜，治也。

梁書徐勉傳：「嘗與門人夜集，客有虞翻求詹事五官，勉正色答曰：『今夕止可談風月，不宜及公事，時人服其無私。』」

杜甫詩小序：「臥病長安，旅次多雨，尋常車馬之客，舊雨來，今雨不來。」舊雨，後來用為故人之義。

李商隱夜雨寄北詩：「何當共剪西窗燭，卻話巴山夜雨時。」

禮記：「聘名士，禮賢者。」蔡氏曰：「名士者，謂其德行貞絕，道術通明，王者不得臣，而隱居不在位者也。」易順鼎琴志樓詞：「五百名賢洞宇在，山水清樞無量，只不見古人懶。」

漢書：「于定國為廷尉，迎師，受春秋，身執經，北面備弟子禮。」

古今樂錄：「時運多艱，言宣皇帝致討吳人也。」按：時運多艱，言鼓吹曲名，傳玄製，北齊書：「嬰闕艱虞，始終如一。」謂艱難憂虞也。

孟子：「民之憔悴於虐政，未有甚於此時者。」吳語：「民人離落，而日以憔悴。」憔悴，困苦也，消瘦也。

左傳隱公十一年：「寡人之使吾子處此，不唯晉國之為，亦聊以固吾圉也。」杜預注：「國邊垂也。」

論語：「微管仲，吾其被髮左衽矣。」謂衣襟左交，夷狄之服也。

庾信哀江南賦：「漣虛去國，餘糧失水，見被髮於伊川，知百年而為戎矣。」按：左傳辛有適伊川，見有披髮而祭者云云，子山賦本此。

論語：「孔子曰：『孫之去公室，五世矣。政遂於大夫，四世矣。故夫三桓之子孫微矣。』」

漢書班固敘傳：「吾久不見班生，今日復聞謠言。」玉篇：「謠，謠言也。」

毛詩大雅：「王之蕪臣。」孔穎達疏：「蕪，忠愛之篤，進進無已也。」

隋史：「齊周顯隱鍾山，王儉謂曰：卿在山中，何所食？答曰：赤米白鹽，綠葵紫薑。」

晉書：「明帝嘗問謝靈運曰：論者以君方庾亮，自謂何如？答曰：端委廟堂，百僚準則，臣不如亮；一丘一壑，自謂過之。」

左傳：「壁崩棟折，僑將壓焉。」僑，鄭子產自名也。

國策：「馮煖曰：狡兔有三窟，僅得免其死耳。今有一窟，未得高枕而臥也，請為君復鑿二窟。」

莊子：「夫適虛空者……聞人足音，蹙然而喜矣。」黃庭堅詩：「別後寄詩能慰我，似逃空谷聽人聲。」

二一六 致蒙藏委員會委員長（二）

某某先生賜鑒：煙沈月澹，物華已入於三秋；雲淨天高，爽氣更彌於六合。

聽邊聲之徹夜，知

蓋慮之忘餐，敬維

壯猷日著，

景福時申。遙企

樞庭，曷勝藻頌。某某前隨中央特派專使西行，出都之日，猥荷

偉餞，感謝無任。晴空芳艸，如適漆吏之莽蒼；黃竹白雲，未覺周王之暇豫。

八月二十八日，乃抵拉薩。寺宇雲連，商賈輻湊，誠所謂佛國也。自成都歷岷、雅安、榮經、瀘定、康定，行李稍稍便利，自甘孜、康地、德格，以至金沙江東岸，往往艱阻。渡江而西，歷昌都、恩達，以迄嘉黎、太昭，雖地屬西康，而民多番藏，複關峻嶺，亦有沮洳。瘴雨蠻煙，馬煩車殆矣。修途跋涉，時作深思，誠欲綏撫二藏，以固吾圉。則當務之亟，莫若交通。拉薩頃建無線電臺，有五百瓦特電機一具，可與中央直接通信。上年班禪大師在青海西邊，自置短波五座，其一已與拉薩聯絡。通信問題，蠱得解決，惟道路梗阻，開發良難。卽云政治，亦有鞭長莫及之勢，此其憂不在外而在內也。昔張江陵有言：吾神遊九塞，一日二三。先生安輯勞來，高瞻遠識，二藏人士，素所推心，儻能商承樞府，從速計畫公路，使康定以西，平平蕩蕩，則

精誠所至，何止一日二三乎！敬陳管見，尚乞

卓裁。至于行程詳紀，專使已有報告，想達

記室矣。專肅，祇頌

勛綏，惟祈

亮督不備。

商榷

篇首秋令之詞，頌揚之語，皆可通用。惟邊聲及樞崖字樣，非其植其人，不宜用也。

註釋

○吳儻涼思詩：「松間小徑接波平，月澗煙洗暑風清，牛夜水禽棲不定，綠荷風動露珠傾。」

○王勃滕王閣序：「物華天寶，龍光接斗牛之墟。」物華，言萬物皆華也。

○虞世南秋興賦：「雲既淨而天高，潦將收而水渌。」

○註見第一篇。

○周禮春官大司馬：「彌龍社稷。」鄭氏注：「彌猶彌也。」禮元帝靈臺：「天地四方曰六合。」

甲 通候類 二六 致遠委員會委員長(一)

⑤李陵答蘇武書：「胡笳互動，牧馬悲鳴，吟嘯成羣，送聲四起。」

⑥王勃滕王閣序：「臨別贈言，幸承恩於儻錢。」

⑦李白詩：「碧幃畫暗空。」暗空，謂清朝無雲也。

⑧莊子：「適莽蒼者，三塗而返。」莽莽，草野之色。莊子嘗為漆園吏，故亦稱漆吏也。

⑨黃竹白雲二賦，周穆王西巡時，與西王母偕和之詞，見種天子傳。馬融賦：「暇豫王孫。」暇豫，消閒也。

⑩拉薩前藏之都會，唐書謂之薩摩。在衆山環翠之中，而據雅管布江右岸，出海面一萬一千九百尺，其地宮殿廟宇，皆宏壯，爲薩

額喇麻所居。四川、陝西、甘肅、青海、雲南、及印度尼泊爾之人，來此經商者甚多。

⑪昭靈城賦：「東江覆闕之隄，四會五塗之莊。」李善注：「漢帶江南曰覆。」此處謂關險複雜也。

⑫毛詩魏風：「彼汾沮洳。」鄭氏箋：「沮洳，水浸處下濕之地。」

⑬南史：「寄命瘴癘之地。」陸游避暑漫抄：「嶺南或見異物從空墜，始如彈丸，漸如車輪，遂四散，人中之即病，謂之瘴母。」蓋山

川溼熱蒸鬱之氣，我國西南各省最多。

⑭曹植賦：「日既西傾，馬頓車殆。」謂疲於行路也。

⑮毛詩小雅：「四牡修廣。」修，長也。修途，謂長途也。

⑯註見第二五篇。

⑰左傳隱公十二年：「公孫之亟也。」杜預注：「亟，急也。言鄭公孫克射犬性急。」

⑱左傳：「雖鞭之長，不及馬腹。」此處言西域距中央太遠，交通艱阻，政治力量，恐不易達到也。

⑲張居正字叔大，江陵人，十五爲諸生，巡撫顧濬奇其文。曰：國器也。舉嘉靖進士，穆宗時與高拱並相。神宗時，代拱爲首輔。節吏治，禁進德，察嚴名實，信賞必罰，爲相十年，海內稱治，卒諡文忠，見明史本傳。

①孟子：「放勳曰：勞之來之。」民之有勤勞於事者，有以償其勞，故曰勞之。因其民之來歸者，有以償其來，故曰來之。

②註見第二一篇。

③尚書洪範：「無偏無黨，王道蕩蕩，無黨無偏，王道平平。」平平之平，讀蒲眠切，先韻。

④皇清溫輿方侍御書：「熊渠子夜行，見臥石，以為虎，射之，沒鏃，蓋其精誠所至，而金石為之開也。」

⑤後漢太尉官屬，有記室令史，主上章表報書記，嗣後公府王國，皆置記室參軍，以掌文書，今稱秘書書記之任，亦曰記室。

二七 致僑務委員會委員長（一）

某某先生勛鑒：心存胞與，久欽譽洽重洋。

績茂勞來，固知明燭，萬里敬維

勛華日懋，

景福時申，覽百二十國之圖籍，皆有赤縣疇人。

眷千百萬數之華僑，盡是黃軒苗裔，引詹

鬻采，莫罄揄忱，某某海塲棲遲，久淹歲月，懷京華之景物，彷彿夢餘，

◎想

叔度◎之汪陂，◎每爲神往。◎乃者寇盜相侵，◎國家多難，固知

拔萃◎之才，定有補天◎之術。所願

弘抒忠藎，共拯艱危，儻以

鴻略之相聞，用慰鰥生◎之仰望。如親

馨歎，◎感幸曷勝。專此祇候，敬頌

勛綏，惟祈

亮鑒不備。

註釋

◎戰國策：「是君以合齊與強楚。」說文：「與，黨與也。」張載西銘：「民吾同胞，物吾與也。」

◎歐成願詩：「聖朝崇本務，技巧細重洋。」重年，謂遠道異國也。

◎尚書堯典：「庶績成。」孔氏傳：「績，功也。」勞來註見第二六篇◎。

◎漢書武帝紀：「日月所燭，莫不率俾。」玉篇：「燭，照也。」

⑤春秋公羊傳疏：「音孔子受兩門之命，制春秋之義，使子夏等十四人求周史記，得百二十國寶書。」

⑥荀子：「圖籍不知其義。」楊倞注：「圖，謂校寫土地之形。籍，謂書其戶口之數也。」

⑦史記孟子列傳：「中國名曰赤縣神州。赤縣，神州，內自有九州。禹之序九州是也，不得爲州，中國外如赤縣神州者九，乃所謂九州也。」

⑧史記曆書：「周室微，陪臣執政，史不記時，君不告朔，故疇人子弟分散，或在夷狄。」疇人者，如淳曰：「家乘世世相傳爲疇。」
曰：同類之人，明曆者也。」

⑨齊曆書：「黃軒御曆，朝萬方於合宮。」黃軒，黃帝軒轅氏之略稱也。

⑩風原離騷：「帝高陽之苗裔兮。」王逸注：「苗，胤也。裔，末也。」

⑪史記河渠書：「故造河壩。」謝靈運遊赤石進帆海詩：「用壩作瀉壩，況乃浚窟變。」漢書韋昭注：「壩，謂河邊地。」海壩，猶云河壩，瀉壩。

⑫毛詩陳風：「衡門之下，可以棲遲。」

⑬漢書郊祀歌：「神淹留。」爾雅釋詁：「淹，留久也。」

⑭謝靈運詩：「首余遊京華，未嘗廢丘壑。」南史：「翦滅遺遊，蕩滄京華。」京華，謂京師也。

⑮李格非非水陽名園記：「獨宮鄭公園，最爲近園，景物最勝。」

⑯李昉夢餘錄：「後漢孫承澤撰，凡七十卷，於明代舊園，摭採甚詳。首京師建置，形勝城池，畿甸，次城防，宮殿，壇廟，次官署，次名蹟，寺廟，石刻，巖窟，川渠，陵園。」

⑰後漢書黃憲傳：「憲，潁陽人，字叔度，同郡陳蕃周舉嘗相謂曰：『時月之間，不見黃生，則鄙吝之萌，復在乎心。』」

⑱風俗通義：「阪者，祭也。言因下鍾水，以繁利萬物也，今阪皆以灌漑。」後漢書黃憲傳：「郭泰至南州，按歷，異日不去，曰：『叔度之』」

甲 通候類 二七 致僑務委員會委員長（一）

器汪汪若千頃，眩澄之不清，撓之不濁，不可量也。」

◎羅隱祭竈江神文：「玉京兮神往，美人兮月成。」

◎杜甫登樓詩：「北極朝廷終不改，西山寇盜莫相侵。」

◎孟子：「出於其類，拔乎其萃，自生民以來，未有盛於孔子也。」

◎淮南子：「女媧鍊五色石以補蒼天。」宋史：「頤張浚出使川、陝，國勢百倍於今，浚有補天浴日之功，陛下有覆山帶河之誓。」

◎史記項羽紀：「霸王說我。」服虔曰：「鯨，小人貌也。」

◎莊子徐無鬼：「久矣夫！莫以真人之言，啓款吾君之側乎！」北史崔悅傳：「啓款爲洪鍾響。」說文：「啓，款也。」郭彙曰：「輻曰啓，重曰款。」

二二八 致僑務委員會委員長(二)

某某先生賜鑒：鶴語○龍吹○晷度○方知其晝短○

貂裘○獸炭○槐檀○遽改於歲餘○敬維

明德茂昭，

弘勳聿著，翹詹

嶽峙^①，莫罄淵掄^②。我國印刷事業日趨發達，所用紙張多數仰給外人，試檢海關貿易冊進口紙張統計，可以概見。其在香港設廠印刷者，尙不在內。漏卮^③之巨，慨歎^④良深。某某竊不自量，近數月來糾合^⑤同志華僑集議招股，在本國設立造紙工廠，已有切實辦法，茲請馬尼拉中華商會董事某君偕舍弟某某攜同各項文件回國專誠奉謁，敬祈進而教之，並乞

紹介主管各機關，以資接洽而策進行，

先生竺念^⑥僑胞，熱心實業，儻蒙

鼎力玉成，俾於短時期內即得着手籌備，曷勝跂禱。專肅，祇頌

勛綏，伏維

垂鑒。

商榷

據語龍吹四句，冬令用語，若疑南洋熱帶之僑民，不宜有霜寒，然語須知此為領袖祖國執政，非自謂也。

註釋

- ① 劉敬叔異苑：「太康二年冬，大雪，兩州人見二白鶴于松下，曰：今茲寒，不減幾崩年。」
- ② 淮南子：「燭龍在雁門北，蔽于委羽之山，不見日。」許慎注：「不見日，故龍以目照之，蓋長千里，開為晝，暝為夜，吹為冬，呼為夏。」
- ③ 玉篇：「晝，以夜度日也。」梁書賀琛傳：「每見高祖與語，常移晷刻。」
- ④ 尚書義典：「日短星昴，以正仲冬。」孔氏傳：「日短，冬至之日，昴自虎之中星，亦以七星並見，以正冬之三節。」
- ⑤ 宋史：「汴京大雪，太祖念征西將士，解所服紫貂裘帽，賜王全斌，仍諭諸將曰：不能偏及也。」
- ⑥ 國老談苑：「宋太祖嘗冬夜徹獸炭，左右曰：今日苦寒，太祖曰：天下民寒者衆，朕何獨溫飽哉！」
- ⑦ 輪語：「暮發既沒，漸發既升，燧改火，期可已矣。」馬融曰：「周禮月令有更火之文，春取榆柳之火，夏取棗杏之火，秋取柞楡之火，冬取槐檀之火，一年之中，燧火各異水，故曰改火也。」
- ⑧ 三國志注引魏略：「董遷官為學堂以三餘，謂冬者歲之餘，夜者日之餘，陰雨者晴之餘也。」
- ⑨ 潛確類書：「許劭嘗時湖亭，行廳表。」謂其德量如山之高，如淵之深。
- ⑩ 詩衛風：「秉心塞淵。」張氏箋：「淵，深也。」淵，謂深為揄揚也。
- ⑪ 淮南子：「澗水足以溢壺，而江河不能實壺。」潘岳：「滲瀾之酒器也，今以喻利權外溢。」
- ⑫ 毛詩王風：「嘒其歎矣。」說文：「嘒，嘆也。」

①史記風實列傳：「何異紉纆。」合種曰紉。
 ②楚辭天問：「稷維元子，帝何竺之？」爾雅釋訓：「竺，厚也。」蓋與篤同，竺念，猶云厚念，篤念。

二一九 致振務委員會委員長（一）

某某先生勛鑒：抗心①禹稷，則若已溺已飢②。

比跡楊黃③，則有義漿義穀④。敬維

振民育德⑤。

救災恤鄰⑥，景歧⑦。

吉暉⑧，莫名馨頌。比者外患內憂⑨，慨萬方之多難⑩。水深火熱⑪，聞

九惠⑫之頻施，際茲風雨之飄飄⑬，益見

慈和⑭之匪懈⑮，心乎愛矣⑯。敢在下風⑰。某某杜門⑱，謝事⑲，亦既有年，近因舊

害^①之游臻，^②遂為鄉里所敦促，地方振濟，勉効籌維，忝附

知交，敬陳近狀，伏冀

德音之時惠，^③俾資

架護^④之欽承，專此馳候，祇頌

勛綏，統惟

激警不具。

註釋

① 雅康嶺續詩：「爰及冠帶，惡龍自放，抗心希古，任其所尚。」

② 孟子：「禹思天下有溺者，猶己溺之也。稷思天下有飢者，猶己飢之也。」

③ 干寶搜神記：「楊公雅伯汲水作義漿，以飲行者。」後漢書黃香傳：「香為魏郡，年穉，遭當之家，各出義漿。」

④ 周易義象：「君子以振興實德。」王國法：「濟民養德也。」

⑤ 左傳：「晉厲公使乞糶于秦，秦伯謂百里奚，與諸乎？」曰：「天災流行，國家代有，救患卹鄰，道也。行道有福，于是輸粟於晉。」

⑥ 毛詩小雅：「高山仰止，景行行止。」鄭箋：「景，明也。」鄭箋：「景，慕也，仰也。」

⑦ 周易未濟：「君子之光，其暉吉也。」

⑤左傳：「惟聖人能內外無患，自非聖人，外寧必有內憂。」

⑥杜甫登樓詩：「花近高樓傷客心，萬方多難此登臨。」

⑦孟子：「如水益深，如火益熱。」喻民生之困苦也。

⑧管子：「九惠之教，一曰老老，二曰慈幼，三曰卹孤，四曰養病，五曰舍獨，六曰問病，七曰通窮，八曰振困，九曰接絕。」

⑨毛詩鄭風：「風其漂女。」漂，吹也。與飄同。曹植賦：「銀鬢兮蒼流風之逼。」

⑩左傳文公十八年：「宣慈惠和。」杜預注：「慈者愛出於心，惠發於物也。」

⑪揚雄元后詠：「弘演風孝，夙夜匪懈。」

⑫毛詩小雅：「心乎愛矣，遐不謂矣。」

⑬左傳：「皇天后土，實聞君之言，羣臣敢在下風。」

⑭通鑑秦紀始皇帝三年：「李牧杜門稱病不出。」胡三省注：「杜門，塞門以拒絕來者。」

⑮毛詩大雅：「無當無害。」當，同災。

⑯毛詩大雅：「繼篋厲臻。」篋，通疥。

⑰李陵答蘇武書：「時因北風，復惠德音。」

⑱註見第十七篇⑭。

三〇 致振務委員會委員長(二)

某某先生賜鑒。歲時巡國，憫艱阨而振閭閻，旱潦降災。

宣德音而矜窮賤，敬維

視民如傷。

行道有福，引詹

仁壽，曷罄揄揚。比者大浸稽天，湘蓄尤甚，洞庭湖濱十餘縣，盡成澤國。

餓殍浮尸，不可勝計。攀緣引領，氣息纔屬，以待急振者，每縣平均約十萬人。側

身西望，悲哽。曷勝。昨午接濱湖各縣急振聯合會自長沙來電，以鄉民逃水餘

生，病饑交乘，日死於殘堰，破舟及負郭者，縣各千數百人，囑代哀懇

鈞會，散放急振，以活災黎。某某等除各捐俸一月，即日匯去，補助萬一外，茲肅寸

緘，奉懇

先生，迅沛甘霖，以蘇百數十萬人垂盡之命。

功德之溥，五世其昌。茲推某某兩君，代表晉謁，即希

賜教爲禱。專此祇頌。

勛綬諸惟

藹照不宣。

商榷

乞張之舉，關係民命，參讀借詞，以誠懇謹爲主，既非一己之私，故陳乞不妨稍切，並宜將災情慘狀，描寫詳盡，期必感動當局，斯爲餘構。本篇不過示意而已。

註釋

○周禮鄉師：「以歲時巡國及野，而振萬民之艱阨，以王命施惠。」鄭氏注：「艱阨，饑乏也。」

○後漢書班固傳：「關關且于。」關關，里中門也。

○宋史：「汪立信知潭州，雨雪旱潦，軍民皆有給。」久不雨則旱，多雨則潦。

○梁秀新詩：「姬文發靈先，哀哀將窮晚，齊景吐德音，嬰帶治國半。」按齊景公見長年負薪而饑色，懷然傷心，命吏養焉。嬰子聞之，再拜而賀曰：君吐此音，宜治國中也。

○左傳：「國之興也，視民如傷，是其福也；及其衰也，以民爲土芥，是其禍也。」

○註見第一九篇。

③論語：「仁者壽。」

④莊子逍遙遊：「大浸稽天而不溺。」浸，沈也。

⑤毛詩小雅：「于此苗散。」孔穎達疏：「苗，災也。」

⑥周禮：「凡邦國之使節，澤國用龍節。」水鄉亦謂之澤國。宋之問詩：「澤國韶氣早。」是也。

⑦三國志：「太傅……氣息幾絕。」太傅謂司馬懿也。言奄奄之狀，僅存一息也。

⑧劉琨詩：「嘔咽不能言。」謂氣結喉塞也。

⑨周語：「乘人不義，陵也。」乘，勝也，因也。

⑩楊奐期洛陽記：「千金瓶在洛陽城西，塋上有穀水塋。」正韻：「壑水爲塋，曰塋。」

⑪史記蘇秦傳：「使晉有洛陽，負郭田二頃，晉豈能佩六國相印乎？」漢書陳平傳：「家貧好讀書，家乃負郭。」

⑫尚書說命：「用法作霖雨。」孔氏傳：「霖以教旱。」董願詩：「龍遊化甘霖，與世爲年豐。」

⑬毛詩商頌：「我受命溥將。」溥，大也，徧也。

⑭左傳莊公二十二年：「有鵬之後，將育于姜，五世其昌，並子正卿，八世之後，莫之與京。」管子孫昌盛也。

三二 致農村復興委員會委員長

某某先生台席：昔衛文公之中興也，以務材訓農爲先。

台席盱衡。國是。軫念。民艱，以復興農村爲當務之急。

蓋籌偉畫，欽服莫名。而乃

采及虛聲，辱承

敦聘，樛櫟之材，忝附

三事大夫。之後，艱難之際，敢存五日京兆之心，便當拜受

嘉招，無爲虛讓。近見報載宣言，語皆扼要，竊有補充之一義焉。比年中國國民經濟衰落原因，論者不曰天災人禍，民不聊生，生產銳減，卽曰受世界經濟影響。工商各業，同一銷沈。抑知中國國民經濟重心，向在農業，農村經濟，實爲工商各業所憑依。大有之年，滿篝滿車，衆人熙熙，村釀相慶，工商各業，亦從而茂盛焉。是以復興農村，建設農業，乃爲工商各業樹立發展之前提，亦卽中國國民經濟建設之根本。率陳管見，伏乞

卓裁。某某俟本校農學院招考事竣，卽行入都展謁，相期良覲。曷罄瞻依，專肅
祇頌

勛綏，惟祈

激督。

註釋

①左傳閔公二年：「齊文公……務材訓農，遵商，惠工，敬教，勸學，授方，任能。」按狄人伐衛，滅之，陳人立戴公子，以奉衛祀。戴公卒，文公立，遂致中興。

②漢書王莽傳：「盱衡厲色。」眉上曰衡，盱衡，舉目揚眉也。

③劉向新序：「楚莊王問孫叔敖曰：『寡人未得國長。』國是國家大計也。」

④楚辭九章：「出國門而診衡。」診，痛念也。

⑤後漢書：「盧士純盜虛聲。」謂有虛名而無實用。

⑥莊子逍遙遊：「吾有大樹，人謂之樗，其大本擁腫而不中繩墨，其小枝卷曲而不中規矩。」又人間世：「匠石見斄社樹，其大蔽牛，觀者如市，匠石不顧。」

⑦毛詩：「三事大夫，莫肯夙夜。」孔穎達疏：「三公雖無職，而外與六卿之事，故謂之三事，大夫為丈夫之成名，即指三公而言。」

⑧漢書張敞傳：「敞為京兆，素與楊鄆厚善，鄆誅，公獨奏劾敞，敞使賊捕探梁，梁有所案驗，梁以敞奏劾，當免，不肯為敞竟事，曰：『今日京兆耳，安能復案事！』敞收梁，繫獄，皆曰：『五日京兆，竟何如？』乃棄梁市。」今謂凡事不作久計者亦云。

⑨註凡第二篇。

⑩漢書李陵傳：「力扼虎，射命中。」扼亦作捉，把也，持也。扼要者，謂扼據要領也。行軍，作文，凡能處定要着吃緊處，皆可謂扼要。

①毛詩卷阿：「有馮有翼。」毛序傳：「有馮有翼，道可馮依以爲輔翼也。」左傳僖公五年：「神所馮依，將在德矣。」馮一作憑。

②春秋宣公十有六年冬，大有年，謂豐年也。

③史記滑稽列傳：「淳于髡曰：今者臣從東方來，見道旁有種田者，操一豚蹄，酒一盃，而祝曰：甌窶窶，汗邪，滂車，五穀蕃熟，穡穰滿家。」等竹籠，所以盛穀也。

④老子：「衆人熙熙，如登春臺，如享太平。」熙熙，和也。

⑤周易困卦：「三歲不覿。」說文：「覿，見也。」陸雲贈顧驥詩：「沈機經駭，幽明廣覿，和以同人，物歸時育。」善長覿猶言良晤也。

三三一 致全國航空建設會常務委員

某某先生勛鑒：辛勤遠略，求禦寇以御風。

弘啓壯圖，驅夸父而逐日。敬維

高瞻邁往。

茂績匡時，引領

鴻猷，曷勝驩頌。某某獻歲，海外歸來，春華秋實，遂及茱萸，時節矣。本

省旱魃^①，爲災匪氛尤熾；長蛇封豕^②，挾腥風毒雨以俱來；大盜^③神姦^④，方禍國虐民而未已，當局對於航空事業，尙能努力規畫^⑤，以策國防。某某，乃以菲材，備員常委，從父老兄弟之後，爲綢繆未雨^⑥之謀，敢曰桑梓之敬恭^⑦，實稟^⑧匹夫之有責^⑨。

先生體國公忠，統籌全局，伏冀

箴言之時錫，俾資築護之恭承。專肅奉候，敬頌

勛綬，惟祈

激管不莊。

商榷

篇首諸語，應之航空署長及其他主政航空長吏均可。奈黃字樣，只能點綴九月初旬耳。

註釋

① 漢書趙充國傳：「百聞不如一見，臣願馳至金城，圖上方略。」廣韻：「略，謀也。」遠略者，遠大之計謀，欲立功於遠方也。

○列禦寇戰國鄰人與莊子同時其學本於黃老有列子一書行世。莊子：「列子御風冷然善也。」仙家飛行絕迹謂之御風。今借喻飛航家也。

⑤毛詩小雅：「方叔元老克壯其猶。」壯圖壯猶義相若也。

⑥夸父不量力欲追日影遂之於陽谷渴死。事見山海經。尸子所載略同。淮南子注：則謂夸父神獸也。

⑦毛詩衛風：「瞻彼日月。」類會：「仰視曰瞻。」高瞻謂有遠識。

⑧尚書大禹謨：「皋陶邁種德。」孔傳謂皋陶布行其德下治於民也。邁與勳通有勇往力行之意。

⑨周易元妄：「先王以茂對時育萬物。」茂盛也。尚書堯典：「庶績咸熙。」績功也。

⑩尚書益庚：「不能胥匡以生。」匡救也。唐太宗詩：「提劍繼匡時。」匡時猶謂救時。

⑪毛詩商頌：「為下國駿麗。」駿大也。駿猷謂良謀大計也。

⑫漢書董仲舒傳：「騞然有恩。」又王褒傳：「騞然交欣。」騞同歡。

⑬註見第三篇。

⑭魏志：「植家丞邢顯無所屈撓。庶子劉楨美文辭。植親楨而疏顯。楨諫曰：君侯采庶子之春華忘家丞之秋實。」

⑮西京雜記：「九月九日佩茱萸食蓬餌飲菊花酒令人長壽。」晉書九日藍田崔氏莊詩：「明年此會知誰健。醉把茱萸子細看。」

⑯毛詩大雅：「早應爲唐。」神異經：「有人長二三尺袒身而目在頂上行走如風名曰魃所過之地大旱。」

⑰左傳：「吳爲封豕長蛇虜食上國。」封大也。

⑱陝信哀江南賦：「大盜移國金陵瓦解。」

⑲張衡西京賦：「蔡靈不若以知神靈感感罔兩莫能蓬席。」按衡賦本王孫滿答楚子語見左傳。

⑳戰國策：「齊無天下之規。」規猶謀也。謂無謀齊者。後漢書凡謀皆作規。規畫即謀畫也。

甲 運候類 三二 政全國航空建設會常務委員

◎毛詩：「迨天之未陰雨，徹彼桑土，綯繆虺虺。」

◎毛詩小雅：「維桑與梓，必恭必敬。」

◎漢書食貨志：「直爲此陳陳。」又賈誼傳：「直爲此稟稟。」稟稟通用，敬也，畏也。

◎顧炎武日知錄：「有亡國，有亡天下……亡天下者，匹夫之賤，與有貴焉。」

三三三 致立法院院長（一）

某某先生賜鑒：民聽民視，固先天而弗違。

大法大經，俟百世而無惑。敬維

憲典慎微。

綱維弘樹，引詹

台曜，曷罄頌忱。某某郊居，晦迹，久歷歲時，閒愛小園，遂同大隱，菜根

有味，視三淨，而更滋。藝牀，甚修，比一壺，而無悶。其奈寇盜日深，

時艱，日亟，愴懷國步，震悼失圖。

先生扶翼。中樞一言爲法。當茲危疑之際，宜有補救之謀，願以多聞，慰其寡陋。詩曰：天之方難，無然憲憲；天之方蹶，無然泄泄。辭之輯矣，民之洽矣，辭之懌矣，民之莫矣。敬爲先生誦之，以附板蕩。起予之義，專肅問候，祇頌勛綏，諸惟激警不備。

註釋

○孟子：「天視自我民視，天聽自我民聽。」

○周易：「先天而天弗違，後天而奉天時。」言大人與天合操，時之未至，則先乎天而爲之，天自不能違我。時之既至，則後乎天而爲之，我亦不能違天。

○史記自序：「夫春生，夏長，秋收，冬藏，此天道之大經也。」

○禮記中庸：「考諸三王而不謬，建諸天地而不悖，質諸鬼神而無疑，百世以俟聖人而不惑。」

○南史孔琳之傳：「爲御史中丞，明憲直法，無所屈撓，奏劾尚書令徐燾之，虧違憲典。」尚書燾與：「慎徽五典，五典克從。」孔氏傳：「五典，五常之教，父義、母慈、兄友、弟恭、子孝也。」

○儀禮大射禮：「中離維綱。」鄭氏注：「侯有上下綱，其邪制射，舌之角爲維。」史記：「秦之禍絕而維弛。」綱維，喻法紀也。尙書：「樹德務滋，除慝務本。」樹立也。

○釋名：「曜，光明照耀也。」

○南史：「沈約製郊居賦，以示王筠。」

○毛詩周頌：「溇養時味。」味也。杜浦詩：「昔遭衰世皆降迹，今幸樂國資徵驅。」時迹，謂隱居自匿也。

○庾信製小園賦，李元度曰：「子山以梁室世臣，入事北周，其胸中先有一段家國身世亂離飄旅之感，故借小園以發之。」

○王康瓠反招隱詩：「小隱隱隣畿，大隱隱朝市，伯夷竄首陽，老聃伏柱史。」

○小學：「汪信民嘗言：人能咬得菜根，則百事可做。胡康侯聞之，擊節歎賞。」

○西域記：「小乘漸教，開三淨之食，三淨食，三種淨淨肉，雁也，鴈也，鹿也。」

○禮記月令：「薄滋味，無致和。」

○高士傳：「管寧字幼安，北海人，常坐木榻，五十年未嘗變動，榻上常席皆穿。」庾信小園賦：「管寧藜牀，雖穿而坐，嵇康鐵籠，既暖而革眼。」

○正韻：「修，飾也，整理也。」

○雲笈七籤：「施存學大丹之道，遇張申爲靈臺治官，嘗懸一壺，如五升器大，化爲天地，中有日月，夜宿其內，自號壺天，人謂曰壺公。」

○周易乾卦：「遯世無悶。」說文：「悶，澁也。」

○左傳：「管侯謂慶鄭曰：『意深矣，若之何？』」

○顏延之詩：「軍力幹時艱。」言時局之艱難也。

①毛詩大雅：「經始勿亟。」亟，急也。

②毛詩小雅：「國步靡盬。」國運曰國步。

③楚辭抽思：「心震悼而不敢。」左傳：「孤與其二三臣，悼心失圖。」悼，傷也。言因心傷悲，而失其計畫也。

④晉書：「扶翼皇家。」扶翼，猶云匡輔。

⑤蘇軾潮州韓文公廟碑：「匹夫而為百世師，一言而為天下法，是皆有以參天地之化，關盛衰之運。」

⑥論語：「益者三友……友直，友諒，友多聞，益矣。」

⑦呂氏童蒙訓：「陳轅中嘗云：予為禮部貢院點檢官，與范公淳夫同舍，公嘗語顯子之不選不戒，唯伯醇能之，予問：伯醇誰也？公

默然久之曰：不知有伯醇耶？予謝曰：生長東南，實未知也，時年二十九矣！自是嘗為寡陋自愧！」

⑧此毛詩大雅文也。愆，懲，猶欣也。駉，動也。泄泄，猶沓沓也。輯，和也。洽，合也。禔，悅也。莫，定也。鄭氏箋曰：「天斥厲王也，王方欲顯離

天下之民，又方變夏先王之澤。臣乎！女無懲愆，無沓沓然，為之制法度，適其意以成其惡也。」又曰：「辭，辭氣，謂政教也，王者

政教和悅，順於民，則民心合定，此戒語時之大臣也。」

⑨詩序：「淑，凡伯刺厲王也。」又曰：「落，召穆公傷周室大壞也。」唐書：「疾風知勁草，板蕩識誠臣。」

⑩論語：「子曰：起予者商也，始可與言詩已矣。」商，子夏名，謂子夏能啓發己意也。

三四 致立法院院長(二)

某某先生賜鑒：曾雲^① 葳蕤^②，零雪揮霍^③，美貞桂之冬秀^④，仰

喬松之清徽。敬維

圭璋特達。

憲典恢弘。引企

龍門。傾心鳧藻。日前伏讀

鈞院制定中華民國憲法草案，體大思精，中外屬目。竊以人民權利義務，及國民經濟二章，與民法有直接重要關係。某某從事民法，先後十年，土地物權，尤多探討。因就二章草案，本諸法理，援據史事，證以國情，謹擬意見書一通，寄呈先生，幸惟

省覽。知有集思廣益之懷。欲爲小壤細流之助。儻荷

過存。爲他日提議修改之一端。曷勝大願。敬頌

勛綬。惟祈

垂鑒。不莊。

商權

立法機關制定憲典及各種法律，體制尊嚴，頒揚之語，當從大處着眼，不宜用私淑佩服一類字句。

註釋

① 杜甫望嶽詩：『層巒生層臺，決壑入歸鳥。』層與曾通。後漢書張衡傳：『登闕風之曾城兮。』文選作層城。

② 本草綱目：『黃公紹古今韻會云：歲稔，草木葉垂之貌，此草根長多鬚，如冠纓下垂之絲，而有威儀，故以名之，凡羽蓋旌旗之纓，綏昔象歲義是矣。』

③ 陸機感時賦：『悲夫冬之爲氣，何慳慳以蕭索……數曾雪之嚴弱，嚴雪雪之揮灑！』

④ 王褒文：『貞桂挺生，便體冬華之秀。』

⑤ 吳淑寧願賦：『美彼喬松，冒茲霜雪。』翁高峻也。

⑥ 禮記禮義：『氣如白虹，天也。精神見于山川，地也。圭璋待遠，德也。天下莫不貴者，道也。』晉書：『天授逸才，聖鑒特達。』

⑦ 尚書序：『舉其宏綱，撮其機要，足以垂世立教，典謨訓誥誓命之文，凡百篇，所以恢弘至道，示人主以軌範也。』

⑧ 後漢書李膺傳：『士有被其容接者，名爲登龍門。』

⑨ 註見第十三篇。

⑩ 後漢書范曄自序：『自古體大而思精，未有此也。』

⑪ 晉語：『若先，則恐國人之屬耳目於我也。』

⑫ 毛詩：『匪他從事，不敢告勞。』

⑤用易繫辭：『探賈索隱，鈎深致遠。』探，謂闖探求取也。論語：『世叔討論之。』討，尋究也。

⑥註見第十六篇。

⑦註見第十六篇。

⑧劉歆讓太常博士書：『義雖相反，猶並置之。何則？與其過而廢之也，寧過而立之。』過，存者，寧過而存之也。與後漢書馮遂傳：『擬問至河內，恐存伯濟。』之義不同。

三五 致司法院院長（一）

某某先生賜鑒：建邦用典，侷周官大司寇之尊，作士明刑，稱唐代太常伯

之職，敬維

懋功，銘鼎，

邁德，匡時，引企

台衡，莫名碩藻。某某自去國門，再歷寒暑，結廬海嶠，聊用息遊。此地

近關商港，非復蕪城。販脂削脯，家累千金。駟僮魚鹽，市操六耦。一塵

之受，彷彿抱布之氓。三徑之遊，仍有衣荷之侶。俗譏充隱，自笑倒糊。

猶喜某君避地於此，雖迹同逋竅，而人實渾金。某某朝夕悟言，欽其令器。昔賢以得與范仲淹謫處爲厚賜，人情若此，時事可知。每當風雨之晦冥，輒痛公私之塗炭，鼠思泣血，何況乎人！

先生五鼎同澆，一身負重，方當三吐心降，入表自營。如某某與某君者，或亦在

涉想之中乎！專肅祇候，敬頌

勛綏，惟希

亮答不具。

註釋

○周禮秋官司寇：『掌憲邦之三典，以佐玉刑邦國，詰四方。一曰：刑新國用輕典。二曰：刑平國用中典。三曰：刑亂國用重典。』

○說文：『倅，齊等也。』

○杜佑通典：『唐虞之際，士官以正五刑。周禮秋官司寇，是其任也。』

○尚書大禹謨：『汝作十刑，以弼五教。』

甲 通候類 三五 致司法院院長(一)

⑤唐書高宗紀：「龍朔二年，改刑部尚書爲刑部尚書。」

⑥尚書大禹謨：「予懋乃德，」懋，盛大也。與懋通。

⑦七略：「盤孟書者，其傳言孔甲爲之。孔甲，黃帝之史也，書盤孟中爲誡法，或於鼎，名曰銘。」

⑧尚書大禹謨：「皋陶邁種德。」孔傳：「皋陶布行其德，下治於民也。」

⑨漢書律歷志：「衡，平也，所以任權而均物，平輕重也。」大臣在位，進退百僚，權衡輕重，以歸至當，台衡、鈞衡，取義於此。

⑩冬官考工記：「匠人營國方九里，旁三門，國中九經九緯，經塗九軌，左祖右社，面朝後市。」鄭氏注：「營，謂丈尺其大小，天子十二門，通十二子。」又曰：「國中，城內也。」陸德明釋文：「王城面各三門，以通十二子。」蓋國門卽都門也。

⑪陶潛飲酒詩：「結廬在人境，而無車馬喧。」

⑫爾雅釋山：「山銳而高曰嵒。」張九齡詩：「家在滙源住，君今滙源行。」蓋謂有滙多山之地，如我國香港、青島、煙臺等處皆是。

⑬周禮春官簡章：「以息老物。」息，休息之也。息遊者，休息與遊也。

⑭鮑照數齋賦。

⑮漢書食貨志：「管仲以販脂而傾縣邑，鬲氏以胃脯而連騎，賈氏以洗劑而鼎食，張里以馬醫而擊鐘。」管仲註：「胃脯，今大官以十日作滷湯，燻羊胃，以末椒姜粉之，乾曝乾使燥者也。」如淳註：「削洗，謂作刀劍削也。」

⑯司馬相如上諫獵書：「故鄙諺曰：家累千金，坐不垂堂，此言雖小，可以喻大。」史記：「不韋家累千金。」

⑰呂氏春秋：「段干木晉國之大盟也。」史記貨殖傳：「龐參，會兩家交易者，如今之度甫。」牙儂狹狹者曰盟也。

⑱魚氏易林：「六耦三奇，相隨俱市，王孫善賈，先得寶利。」

⑲孟子：「願受一廛而爲氓。」周易地官司徒：「遂人辨其野之土，以頒田里，上地夫一廛，田百畝，萊五十畝，中地夫一廛，田百畝，下地夫一廛，田五十畝。」

蔡百晦。下地夫一塵，田百晦，蔡二百晦。鄭氏注：「塵，居也。」

②毛詩衛風：「氓之蚩蚩，抱布貿絲。」說文：「氓，民也。」

③三輔決錄：「蔣翊字元卿，舍中竹下開三徑，唯故人羊仲求仲從之遊，二仲皆廢士也。」

④楚辭離騷：「製芰荷以爲衣兮，集芙蓉以爲裳。」孔稚圭北山移文：「披芰製而裂荷衣，抗塵容而走俗狀。」李善注：「芰，製荷衣，隱者服。」

⑤晉書桓玄傳：「玄以歷代咸有風塵之士，而已世獨無，乃假皇甫謚六世孫，謚之爲著作，並給其費用，皆令讓而不受，謚曰高士，時人名爲充隱。」

⑥魏泰東軒筆錄：「苗振以第四人及第，既而召試館職，一日謁晏丞相，晏語之曰：「君久從吏，亦必疏弊，現今宜稍溫習也。」振率給答曰：「豈有三十年爲老嫗而齒櫛，孩兒者乎？」晏公悅而晒之，既而試澤宮選士賦，讀押有王字，振押之曰：「率土之濱，莫非王，由是不中選。」晏公聞而笑曰：「苗公竟倒櫛孩兒矣！」

⑦周易訟卦：「師而進其邑，人三百戶。」象曰：「不克訟，歸而逋，其邑人三百戶。」左傳文公六年：「趙宣子爲政，董道逃。」尚書：「紂爲天下逋逃，生萃淵藪。」

⑧晉書：「王戎曰：「山濤如瑛玉，進金，人皆歛其資，莫知名其器。」

⑨毛詩鄘風：「靡言不樂，願言則嘯。」嘯，古本作晤。王羲之蘭亭集序：「或取諸懷抱，俯仰一室之內，或因寄所託，放浪形骸之外。」俯，音即晤音也。

⑩晉書石苞傳：「苞子儵，少有名譽，稱爲令器。」南史沈演之傳：「此童終爲令器。」

⑪王闕之滬水滌談錄：「范文正公貶饒州，朝廷方治朋黨，士大夫莫敢往別，王待制質獨扶病謁於園門，大臣責之曰：「君長何自陷朋黨？」王曰：「范公天下賢者，願質何敢望之，若得爲范公黨人，公之賜質厚矣！」

①唐書：「鄭縻，滎陽人，字龜武，昭宗時累官中書門下事，劾縻善詩，多詠諷，時號『鄭五歇後體』，乾寧初，相，昭下。縻曰：歇後，鄭五作宰相，時事可知矣！立朝侃然，無復故態。」

②左傳昭公元年：「天有六氣……曰陰、陽、風、雨、晦、明也，分爲四時，序爲五節。」杜氏註：「晦，夜也。」史記龜策列傳：「正晝無見，風雨晦冥，雲蓋其上，五采宵黃。」說文：「冥，幽也。」

③尚書：「有夏昏德，民墜塗炭。」庾信哀江南賦：「大盜移闕，金甌瓦解，余乃羸身荒谷，公私塗炭。」

④毛詩小雅：「風思泣血。」風亦作瘋，臺也。

⑤孟子：「前以三鼎而後以五鼎與。」漢書：「注父雁曰：丈夫生不五鼎食，死即五鼎烹。」

⑥史記：「周公戒伯禽曰：我一沐三握髮，一飯三吐哺，起以待士，猶恐失天下之賢人。」

⑦左傳隱公十一年：「如齊晉燔，其能降以相從也。」陸龜蒙詩：「自是海邊鷗伴侶，不勞金僞更降心。」

⑧晉書：「故能使八表夷蕩，區內輯寧。」陶潛停雲詩：「八表同昏，平路伊阻。」八表，八方之外也。

⑨何遜文：「帳前微笑，涉想猶存。」涉想，猶云入乎想像。

三六 致司法院院長(二)

某某先生賜鑒：素冰彌澤，元陰戒寒，新火已改於槐檀。

勁節 乃貞於松柏 敬維

淵淳嶽峙。

種德。明刑。遙企。

徽猷。不任忻頌。竊惟宥罪肆赦。古訓是昭。所以弛。秋霜之威稜。流春澤之恩渥也。乃者國慶將屆。咸與維新。側聞

鈞院將以特赦事項。依據法律。呈請元首行之。甚休甚盛。然而蕩瑕滌穢。

雖權道之攸宜。作奸犯科。慮倖門之遂啓。孟孝裕云。赦者。偏枯之物。非明世所宜有。諸葛武侯云。治世以大德。不以小惠。故吳漢不願爲赦。

先生寬大之懷。羣情嘆美。茲所稱引。頗異時宜。但當求其獲罪心跡。不爲私隱。赦之足以勸世而慰民者。若夫饕餮。肆意。病國虐民。奸蠹爲幻。憑恃醜虜。凡在司刑。宜無寬典。某某幽居嶽麓。教授生徒。感時事之艱難。念昔年之車笠。

輒陳狂瞽。尙冀

清裁。專肅。祇頌。

勛綬統惟

亮譽不莊

商權

第三十五篇建邦用典至台銜稱諱諸語，攝之司法行政部部長亦可。

註釋

① 卮言：《詩》「冬日凄凄，元朔啟天，素冰彌澤，白雲依山。」

② 王粲七釋：「農功既登，元陰戒寒。」

③ 論語：《禮記禮運改火集注馬融曰：「……冬取槐檀之火，一年之中，鑽火各異木，故曰改火也。」

④ 荀子儒教：「行法至堅，不以私欲亂所聞，如是，則可謂助士矣！」宋書：「松柳異質，莖葉殊性，故奏屬知助章，嚴霜識貞木。」助，堅也。助節，謂節操堅法也。

⑤ 論語：「歲寒，然後知松柏之後彫也。」

⑥ 齊唐書：「獄時泉淳，金貞玉裕。」泉淳，即淵淳。蓋唐人進富麗諛也。淳，水止也。

⑦ 尚書大禹謨：「皋陶邁種德。」

⑧ 尚書大禹謨：「明于五刑，以弼五教。」

⑨ 毛詩小雅：「君子有微猷。」猷者，善美也。

①周易：「雷雨作，解君子以赦過宥罪。」尙書：「貴災肆赦，愆終賊刑。」

②爾雅釋詁：「弛，放也。」以弓釋弦曰弛。

③後漢書：「營爲秋籍，無爲盤羊。」秋籍，驅散之氣，甚嚴明也。鮑照藝城賦：「稜稜霜氣，秋散風威。」

④風俗通山澤篇：「水神交脣，名之爲澤。澤者，普其潤澤萬物，以阜民用也。」毛詩小雅：「既優既渥。」渥，澤也。

⑤毛詩商頌：「何天之休。」休，善也，慶也。

⑥晉書郭璞傳：「宜發哀矜之詔，引在予之寬，薄除瑕釁，贊揚德澤。」荀悅漢記：「漢興，設三章之法，申以大赦之令，薄滌穢，與人更始，時勢然也。」

⑦諸葛亮前出師表：「若有作奸犯科，及爲忠善者，宜付有司，論其刑賞。」

⑧蜀志：「孟光字季裕，延熙九年，秋，大赦。光責大將軍致禱曰：夫赦者，偏枯之物，非明世所宜有，衰敝窮極，必不得已，然後可權而行之。」

⑨華陽國志：「諸葛亮時，有言公惜赦者，亮答曰：治世以大德，不以小惠，故匡衡吳漢不願爲赦。」

⑩周禮秋官司寇：「諸茲惡。」尙書畢命：「旌別淑慝。」慝，惡也，穢也。私慝者，謂私行甚惡也。

⑪左傳文公十八年：「縉雲氏有不才子，汙于飲食，冒于貨賄，侵欲崇侈，不可盈厭，聚斂積實，不知紀極，不恤窮廩，天下之民，以比三凶，謂之饕餮。」

⑫尙書無逸：「民無或胥，張爲幻。」玉篇：「譎，張，誑也。」

⑬註見第三五篇。

⑭嶽麓山在湖南長沙縣西，衡山北麓也。巖秀高聳，下臨湘水，稱爲絕勝。山上有寺，晉建，卽古麓苑，一名蕪光寺，寺有唐李邕所書碑。山下有嶽麓書院，爲張栻、朱熹講學之所。清末，改爲湖南高等學堂，現爲湖南大學。

◎風注記：「越俗性率朴，初與人交有禮，封土壇，祭以犬雞。祝曰：君乘車，我戴笠，他日相逢下車揖。君擔簞，我跨馬，他日相逢爲君下。」

三七 致司法行政部部長（一）

某某先生勛鑒：克明克允，如弼士之在虞廷。

惟寅惟清，若秋官之於周室。敬維

懋功邁德。

鑑空衡平，引企

清暉，莫名馨頌。某某解官以來，倏焉三載，棲遲衡宇，時還讀書。去寒家，里許，有一招提，十方桑門，去住無定。某某月三四往，或三數日一往，室則虛白，而有懸馨之清音，院或燒朱，而有方流之玉水，優哉游哉，聊以卒歲。誠不自知荒嬉之無度也。方今板蕩疾威，舉世疾痛。

先生當亦有將壓之懼，乃益

執法如山，存心若水。

匪懈之義，彌篤于艱難。

弘濟之謀，定優于庸衆。願聞

清誨，俾慰山澤散人也。專此問候，祇頌

勛綏，惟祈

亮督不備。

註釋

①尚書舜典：「汝作士，五刑有服，五服三就……惟明克允。」孔穎達疏：「惟明，謂臯陶之明，克允，謂受罪者信服。」

②孟子：「入則無法家拂士，出則無敵國外患者，國恆亡。」正義：「拂，與強同，輔也。」

③尚書舜典：「夙夜惟寅，直哉惟清。」孔氏傳：「夙，早也，言早夜敬思其職，典禮施政教，使正直而清明。」

④註見第三五篇。

⑤賈至授房陵刑部尚書制：「鑿矣猾夏，殛命繇作士，嶽切過益，黎民懷之。」

甲 通侯類 三七 致司法行政部部長（一）

⑤吳語：『王盞亦鑿于人，無鑿于水。』鑿，服也。鑿空者，凌空而照。物無遁形，衡所以稱。衡平者，稱物甚平，無偏無頗。

⑥說文：『暉，光也。』清暉，猶謂清光。

⑦全唐詩話：『太子賓客賀知章，解組辭榮，志期入道。』梁昭明太子晉徵士陶潛傳：『即日解綬去職。』解官，猶云解組解綬也。

⑧毛詩陳風：『衡門之下，可以棲遲。』

⑨陶潛讀山海經詩：『柴鳥欣有託，青亦愛吾廬。既耕亦已種，時還讀我書。』

⑩南史劉洸傳：『洸所生母騶，本寒家，悉越中之資，爲二兒推奉任助。』

⑪佛經釋東、西、南、北、東南、西南、東北、西北、上下，爲十方。

⑫魏書釋老志：『齋服其道者，則剃落髮鬚，釋異辭家。……謂之沙門，或曰桑門，亦聲相近，總謂之僧。』

⑬莊子：『虛室生白，吉祥止止。』白者，日光所照也。室以喻心，心能空虛，則純白獨生也。

⑭左傳僖公二十六年：『室如懸磬，野無青草。』釋文：『磬亦作磬。』

⑮古詩：『何必絲與竹，山水有清音。』淮南子兵略：『景不爲曲物直，響不爲清音濁。』

⑯張舜民畫境錄：『相國寺燒朱院，舊日有僧惠明，善庖，突猪肉尤佳，一頓五觔。楊大年與之往還，多啗而食具殘。一日，大年曰：爾爲僧，遠近皆呼燒豬院，安乎？惠明曰：奈何？大年曰：不若呼燒朱院也，鄙人亦自此改呼。』

⑰顏延之贈王太常詩：『玉水詔方流，瓊源藏圓折。』

⑱毛詩：『優哉遊哉，聊以卒歲！』

⑲韓愈進學解：『業精于勤，荒于嬉；行成于思，毀于隨。』楊惲後孫會宗書：『是日也，拂衣而起，奮袖抵鼻，頓足起舞，誠荒淫無度，不知其不可也。』

①詩序：「淑，凡有刺厲王也。」又曰：「潞，召穆公傷周室大壞也。」又蕩之什：「疾威上帝，其命多辟。」國風云：「疾，病入者，重賦也。威，罪人者，峻刑法也。」

②左傳：「斯是用痛心疾首，暋詘寡人。」

③左傳：「棟折榱崩，僇將壓焉。」

④周禮：「執法以泄勸勞。」

⑤漢書：「鄧崇爲尙書僕射，上書諫曰：君門如市，何以欲禁切主上？崇對曰：臣門如市，臣心如水。」

⑥毛詩大雅：「夙夜匪解，以事一人。」說文：「懈，怠也。」懈或作解。

⑦晉梁傳莊公二十三年：「公會齊侯，盟于冠。」馮士勛疏：「此時齊桓威德既盛，與公結盟，實有弘濟之功。」

⑧唐書陸龜蒙傳：「升舟設篷席，齋束書，茶甕筆牀，鈞具往來，時謂江湖散人。」按散人，見莊子。

三八 致司法行政部部长(二)

某某先生勛鑒：田鵬春曉，取梅子以和鳴；野雉莎青，映麥華而軒翥。

君子之耿介，美令節之昭融。敬維

緹履絳螯。

丹誠篤慶，翹詹

甲 通候類 三八 致司法行政部部长(二)

光霽，曷罄頌私。某某前承

大部監獄司長紹介，赴蘇浙皖贛鄂湘六省，考察監獄行政及監獄工廠管理事宜。猥以末學，證之實驗，千聞不如一見，啓迪固亦多矣。管窺所及，略具條陳，敬呈

鑒正。抑更有進者，權頭爲害，不可勝言，宜早肅清，以飭獄政。前聞

大部議有辦法，迄今未見實施。某某考察所經，目覩其弊，尤爲灼然，併以附陳，敬祈

矜察。專肅，祇頌

勛綏，諸惟

激照，不備。

商權

篇首頌語及時序之辭，春日與政學各界通候均可用。

註釋

①臨海異物志：「鵝鵝一名田鵝，春三月鳴，晝夜不止，音聲自呼，俗言取梅子塗其口，兩邊皆赤，上天自言乞恩，當梅子熟，鳴乃止耳。」

②曹植射雉賦：「暮春之月，宿參盈野，野雉羣雜。」潘岳射雉賦：「青嶽莎靡，丹臨蘭繁。」徐爰注：「莎，草名，楚辭曰：青莎雜樹，則莎色青也，言雉尾間青毛如莎草之靡也。」

③楚辭遠遊：「鸞鳥軒翥而翔飛。」

④潘岳射雉賦：「厲耿介之專心兮，參雄雉之誇姿。」

⑤宋之問詩：「令節三秋晚，重陽九日歡。」令節，佳節也。

⑥毛詩大雅：「昭明有融。」顯明之盛者。

⑦周禮春官司服注：「今時五伯縫衣。」孔穎達疏：「纁赤之衣。」後漢書班固傳：「將緝萬嗣。」李賢註：「緝，續也。」搗雄甘泉賦：「遊盪三神。」盪，播也。

⑧梁齊：「方揣丹誠，効其一割。」

⑨宋史周敦頤傳：「黃庭堅稱其品甚高，胸懷灑落，如光風霽月。」

⑩南史蕭摩訶傳：「侯安都謂摩訶曰：卿驍勇有名，千聞不如一見。」

⑪尚書大甲：「啓迪後人。」啓迪，開發意志也。

⑫莊子：「是直用管闕天，用錐指地，不亦小乎？」闕，亦作窺。

⑬說文：「櫬，櫬也。」櫬頭者，囚入獄，而歷年多，他囚新入獄，必謹書櫬頭，而櫬頭之處，往往甚于獄吏。

甲 通侯類 三八 致司法行政部部长(二)

◎毛詩小雅：「我車既飾。」廣韻：「飾，整飾也。」

◎尚書立政：「我其克灼知厥若。」玉篇：「灼，明也。」

◎公羊傳宣公十五年：「華元曰：吾聞之，君子見人之厄則矜之，小人見人之厄則幸之。」何休解詁：「矜，憫也。」

三九 致最高法院院長

某某先生勛鑒：張釋之云：廷尉天下之平。◎唐太宗云：大理法官之長。◎敬維

邁德貞恒，◎允符往哲，

棘槐◎在望，葵藿◎傾忱。某某前歲結廬◎莫干，◎養疾山中，頗復恬逸，◎敢言

守誼，◎殆庶安居，◎搏雕虎於太行，◎則貧賤尊之矣。占漸鴻于大陸，◎則羽儀

辱之矣。某某不敏，亦自有其閒居之錄，◎堯民之圖◎耳。

先生去年過暑◎茲山，幸得過從談讌，

沖襟◎雅尚，◎極所欽遲。◎昔臯陶面如削瓜，◎令人想見秋官之肅；◎乃瞻

德潤，◎竟若夏雨兩人。◎固知

明允篤誠，哀矜勿喜，山澤之癯，猶尙降心，而況當事者乎？緬懷

高躅，益感前遊，專肅問候，祇頌

勛綬，惟希

激督。

商榷

舊首領語，非最高法院院長，不足以當之。後幅稱揚之語，施於普通法官均可。

註釋

○漢書張滂之傳：「張滂之字季，堵陽人也，爲廷尉，文帝出中涓，有一人從橋下走，乘輿馬醫，於是使騎捕之，屬廷尉，釋之，秦此人犯罪當罰金，上怒，釋之曰：廷尉，天下之平也，令一傾，天下用法，皆爲之輕重，民安得措其手足？上良久曰：廷尉當是也。」

○唐書：「貞觀八年，上謂大理卿賈誼曰：法官，刑爲之長，朕以至公臨天下，法之所行，無舍親昵，卿當保所長，棄所短，無阿朕意，以虧憲典。」

○尚書大誥：「卑陶焉種德。」周易：「貞正也。」又「恆久也。」

○周禮秋官司寇：「左九棘，孤卿大夫位焉……右九棘，公侯伯子男位焉……面三槐，三公位焉。」禮記王制：「正以獄成，告于大司寇，大司寇聽之，棘木之下，大司寇以獄之成，告于王，王命三公參聽之。」三國志：「古者刑政有疑，輒聽於槐棘之下，自今

朝有疑議及刑獄大事，宜教以香訪三公。」

⑤淮南子：「聖人之於道，猶葵之與日，雖不能終始哉，其嚮之者誠也。」曹植求通親表：「若葵藿之傾葉，太陽靡不爲之迴光，然終向之者誠也。」

⑥註見第三五篇④。

⑦莫干山在浙江武康縣西北二十七里。相傳吳王鑄劍於此，劍名莫邪，干將，故名。

⑧國語：「吳王遷自伐齊，乃凱申，晉曰：『今天夫老，而又不自安，恬逸。』」

⑨張衡思玄賦：「願竭力以守誼兮，雖貧窮而不改。」

⑩周易繫辭：「顏氏之子，其殆庶幾乎？」宋書武帝紀：「子房道亞黃中，照鄰殆庶。」孟子：「君子深造之以道，欲其自得之也，自得之，則居之安，居之安，則資之深。」

⑪尸子：「申黃伯曰：余左執太行之獲，而右搏離虎，惟象之未與，吾心試焉，有力者則又願爲牛，欲與象鬪以自試，今二三子以爲義矣，將惡乎試之？夫資窮，太行之獲也，離虎，義之離虎也，而吾日遇之，亦足以試矣！」離虎，噬餐也，言隱居山澤，無能於世，則雖資賤，其德日尊也。

⑫周易漸卦：「鴻漸于陸，其羽可用爲儀吉。」左傳定公二年：「魏獻子田于大陸。」

⑬班固幽通賦：「皇十紀而鴻漸兮，有羽儀於上京。」鴻漸，喻仕進也，既以山澤資賤爲尊，則仕進羽儀，爲尊之矣。

⑭潤居錄一卷，元晉丘所撰。

⑮元好問續夷堅志：「西京田叟，自號五盆子，年七十餘，作堯民圖，青綠爲地，摺樺皮爲之。」

⑯爾雅釋詁：「遏，止也。」

⑰駱賓王詩：「霜松貞雅節，月桂朗冲濤。」冲濤，謂濤激濤也。

③三國志吳主權傳注引江表傳：「欽嘉雅尚，朕實欣之。」王融爲竟陵王與劉虬書：「勳味道腴，幸遵雅尚。」

④語林：「許元度將弟出都婚，帝人間是元度弟，甚欽選之。」欽選，敬仰也。

⑤荀子：「魯陶之狀，色如削瓜。」

⑥周禮飲官司筮：「掌建邦之三良，以佐王刑邦國，詔四方。」禮記月令：「孟秋之月……命有司修法制，繕囹圄，具桎梏，禁止姦。」

⑦慎罪邪，務搏執……審斷決獄，訟必端平，雖有罪，嚴斷刑，天地始肅，不可以誣。」鄭氏注：「嚴，嚴急之言也。」

⑧禮記大學：「宮潤屋，德潤身。」

⑨說苑：「管仲曰：吾不能以春風風人，夏雨雨人，吾窮必矣！」

⑩左傳文公十八年：「晉高陽氏有才子八人……齊聖廣淵，明允篤誠。天下之民，謂之八愷。」尚書舜典：「惟明克允。」

⑪論語：「如得其情，則哀矜而勿喜。」

⑫漢書司馬相如傳：「列仙之儒，居山澤間，形容甚醜。」

⑬凡訴訟之原告被告，皆謂之當事人，謂與其事有直接關係也。

⑭言：「激食止競，永垂高閭。」謂踐履高尚也。

四〇 致行政法院院長

某某先生勛鑒：審憲典之虧違，而裁量。文吏；

矜人民之告愬，而理問。官司。敬想

惟明克允。

鑑空衡平，景歧

吉暉，莫名馨頌。某某承乏領事，越在異國，白駒過隙，遂復數年。每憶京華，

心傾

神表，固知

揚清激濁之懷，無間瀛壖。蓬山之隔，矧附

舊遊，幸同志學，儻荷

嘉言之錫，慰其遠道之思，曷勝企幸。此地華僑十萬人以上，近年商務，尙有起色，

惟以祖國日蹙百里，乃眷東顧，既有棟折榱崩之懼，同深羈旅漂泊之

情。

先生廊廟之彥，何以匡時，願以

蓋籌，馳示海外，雲羅萬里，敬俟

瑤緘。專肅祇候，虔頌。

勛綬，諸惟。

激督。

註釋

①南史孔琳之傳：「奏勅尙書令徐爰之，虧違靈輿。」

②魏書：「筆頭奴，敢裁量朕。」按古謂頭鏡，太武帝常名之曰筆頭，時人呼爲筆公。

③孟子：「諸侯之寶三，土地、人民、政事。」

④戰國策：「衛君既行，告遷於魏。」高誘註：「遷，避也。」

⑤續通典：「元行省有理問所，理問，副理問之官，明改行省爲布政司，理問之官如故。」理問，學勘核刑名也。

⑥左傳隱公五年：「若夫山林川澤之實，器用之資，阜隸之事，官司之守，非君所及也。」

⑦註見第三七篇①。

⑧明宣宗大理寺箴：「列之九刑，有翼有承，鑿空衡平，視獄之成。」

⑨註見第二九篇①。

⑩左傳：「越在草莽。」越，踰也，度也。

⑪史記：「人生一世間，如白駒過隙。」謂光陰迅速。

甲 通候類 四〇 致行致政院院長

李太白詩：「冠蓋滿京華，斯人獨憔悴。」杜甫詩：「夢府孤城落日斜，每依南斗望京華。」

潛齋類書：「朱异字字宏深，神表峯峻，金山萬丈，綠陟難登，玉海千尋，窺映不測。」神表，猶云神宇，神姿。

唐書王涯傳：「太宗謂涯曰：卿識學精通，復善談論，玄論以下，卿宜悉加品藻，且自謂與叔子何如？對曰：孜孜奉國，知無不為，臣不如玄齡……至於激濁揚清，嫉惡好善，臣於叔子，亦有微長。」按：涯語本于：「水有四德……揚清激濁，蕩去滓穢，養也。」

謝靈運遊赤石進帆海詩：「別覽儂巖壑，況乃凌窮髮。」

李商隱無題詩：「劉郎已恨蓬山遠，更隔蓬山一萬重。」

陶宗儀寄林孝功詩：「卻是蒼遊如昨日，高樓風雨倚依稀。」

毛詩大雅：「今也日蹙國百里。」

毛詩大雅：「乃眷西顧，此維與宅。」鄭氏箋：「乃眷，然運視西顧，經文王之德，而與之居，言天意常在文王所。」此云東顧，以中國在亞東也。

註見第二篇③。

庾信哀江南賦：「下亭漂泊，高橋鶻旋，隨歌非取樂之方，潛酒無忘愛之用。」

李陵答蘇武書：「妨功害能之臣，盡為萬戶侯。親戚貴族之類，悉為廊廟宰。」爾雅釋訓：「美士為彥。」毛詩鄘風：「邶之彥兮。」

李商隱春雨詩：「玉璫織札何由達，萬里雲羅一雁飛。」

四一 致考試院院長

某某先生賜鑒：祥開日華，而英雄入毅。

鑒於止水，而髦士是烝。雲五色以相宣，桂一枝而彌馥。取茲中鵠，頌彼登龍。敬維

登明選公。

授方任能，引瞻

樞斗，曷罄欽遲。某某自前歲歸里，杜門謝事，亦頗安舒。荷鋤隴畔，聊用習勞，運甓齋頭。庶幾消食，雨餘春夢，想身世於華胥。溟漲虛舟，憶

名賢於魏闕。每有人自都門來，道及

壯猷，輒深鄉往。國步艱難，民生憔悴。

諸公衮衮，何以策之？尚冀不遺在野。

頌
錫以嘉言，慰其葵藿之忱，解其愚蒙之惑，斯則散人之大願也。專啓奉候，敬

勛綬惟祈

亮警不莊。

商榷

登明選公，授方任能，并可綢繆嚴部員。

註釋

○王定保述晉：「李穆，貞元年試日五色賦，先榜落矣。初出試，偶於殿見其賦，驚曰：『德動天鑿，辭開日華。』謂穆曰：『公今須作狀元，翌日隨榜無名，於陸深不平，搥之以詣主文，亟命取穆所繕面對，不差一字，因擢爲狀元，前榜不復放。』」

○魏鑿淵傳：「貞觀初放榜日，太宗私幸端門，見進士於榜下纒行，謂侍臣曰：『天下英雄，入吾彀中矣！』」

○莊子德充符：「人其鑒於流水，而鑒於止水，惟正能止衆止。」

○毛詩小雅：「烝我髦士。」烝，進也。髦，俊也。

○海文類聚：「天聖五年，仁宗試進士，陸贄名在第二，時唱名第一甲方終，太史奏：『五色雲見，從官皆賀。』陸贄文賦：『其會意也，尙巧，其遺言也，貴妍。聲音聲之迭代，若五色之相宣。』」

○晉書：「郗詵對曰：『臣舉賢良對策，爲天下第一，猶桂林之一枝，蓬山之片玉。』」廣韻：「藪，香氣也。」

○周禮天官司裘：「王大射，則共虎侯、豹侯、鹿、麋、鵠。」鄭司農云：「鵠，鴻毛也。四尺曰鵠，謂之鵠者，取名於鴻鵠，鵠小鳥，難中，是以中之謂鵠。」禮記射義：「鵠，鵠也。鵠之言稽也，格直，言人正直，乃能中也。」

○禮記射義：「鵠，鵠也。鵠之言稽也，格直，言人正直，乃能中也。」

①後漢書李膺傳：「士有被其容接者，名爲登龍門。」辛氏三秦記：「河津一名龍門，水險，魚鼈之圖，莫能上，上則爲龍也。」李白上韓荆州書：「一登龍門，聲價百倍。」

②韓愈進學解：「登明選公，雖進巧拙，紆徐爲妍。卓犖爲傑，校短量長。惟器是適者，宰相之方也。」

③左傳閔公二年：「衛文公大布之衣，大帛之冠。……敬教勸學，授方任能。」孔穎達疏：「授方，授民以事，皆有方法也。任能，其所委任，信能用人也。」

④春秋運斗樞：「天樞德見，則鳳皇翔。」北斗第一星，謂之天樞。樞斗者，謂樞要在中，北斗共仰也。

⑤國語：「靈王虐，白公子張又諫，王病之。……遂趨而退歸，杜門不出。」胡三省通鑑注：「杜門，塞門以拒絕來者。」

⑥公羊疏：「河南曰豫州，其氣著密，厥性安舒，故曰豫。」

⑦漢書兒寬傳：「寬於武帝時，治尚書，家貧，實作書經而編。」東晉讀書賦：「兒寬日誦而芸燭。」

⑧晉書陶侃傳：「侃嘗爲廣州刺史，在州無事，臨朝運甕於齋外，暮運甕於齋內，人問其故，答曰：吾方致力中原，過爾優逸，恐不堪事，故自勞耳！」

⑨南史劉穆之傳：「少時家貧，不修拘檢，好往妻兄家乞食。其妻江闈女，甚明識，每禁不令往。江氏後有慶會，穆之猶往，食畢，素積糲，江氏兄弟咸之曰：橫糲消食，君乃當飢，何忽須此！」

⑩蔣子正山房隨筆：「吉州羅西林之子睡起詩曰：夢跨青鸞上碧虛，不知身世是華胥。起來極首道無事，啼鳥一聲春雨餘。」列子：「黃帝晝寢而夢遊於華胥氏之國，其國無師長，其民無嗜欲，不知親已，不知疏物，故無愛憎，不知背逆，不知頹向，故無利害。」

⑪謝靈運遊赤石進帆海詩：「溟漲無端倪，虛舟有超越。」莊子：「方舟而濟於河，有虛船來觸舟，雖有褊心之人，不怒。」

⑫呂氏春秋：「中山公子牟謂綽子曰：身在江海之上，心居魏闕之下，奈何？」高誘曰：「子牟魏公子。」

⑬註見第四篇。

◎禮記曲禮：「則必鄉長者所視。」鄉與嚮同，鄉往，即嚮往也。

◎孟子：「民之憔悴于虐政，未有甚于此時者。」

◎杜甫詩：「諸公衮衮登臺省。」

◎註見第三九篇。

◎莊子養生主：「散人又惡知散木。」謂不在可用之數也。

四二 致銓敘部部長

某某先生勛鑒：條流綜覈，而銓吏二千。

甄敘，允諧而除官八百。倖門於焉杜絕。

水鑑，由是益明。敬維

清通簡要。

祇愼廉平，遙企

英猷，莫名馨頌。某某出宰某邑，條爾經年，頗以厚俗爲先，豈有任人之效！最

愛昔賢催科不擾，是催科中撫字，刑罰無差，是刑罰中教化。二語，謂今日縣治，盡在於斯。水旱連年，農村破產，擾惡乎可！寇掠之餘，瘡痍滿目，差惡乎可！某某不敏，亦嘗奉教於

君子矣。如水之清，如衡之平。

銓敍之道，亦爲邑之道也。尚乞

德音時惠，益匡不逮。舊遊如昨，懷念彌深，專此奉候，祇頌

勛綏，伏惟

徽咎不莊。

註釋

○册唐元龜：「後唐，盧文紀爲吏部，銓綜條流，剖析無滯。」

○玉海：「景德元年，宋璟爲吏部尚書，不長強禦，請調路絕，集者萬餘人，留者三絕，不過二千，人服其公。」

○周平綱集：「宋晏敦復補吏部尚書，剛毅爲世所懼，親戚故舊，有以書至，視其封題，有并及兩字者，即卻之不納，惟務抑僥倖，請疏請甄敘人物，區別賢否，一時銓綜，號稱平允。」

②事文類聚：「崔祐甫當國，薦舉得人，未踰年，除吏幾八百員，莫不諧允。」

③冊府元龜：「後唐任圜拜平章事，兼判三司，簡拔賢俊，杜絕佞門。」

④杜甫上章見陸詩：「持衡留舊綬，懸履上星辰。」見陸時爲吏部，銓衡平允也。黃庭堅詩：「管中無水鏡，敢當吏部銓。」

⑤世說新語：「王澄沖澀，叔則二人，緣角詣鍾士季，須臾去後，客問向二重是誰？曰：「裴王，客曰：何如？鍾曰：「裴楷清通，王戎簡傲，後二十年，此賢當爲吏部尙書，鍾爾時天下無復滯才。」

⑥李暹選曹尙書嚴序：「重忝曹郎，銓管九流，品藻清濁，雖祗愷，莫知所寄。」晉書：「虞欽字子若，少好學，爲尙書僕射，領吏部，銓選廉平。」

⑦合璧事類：「張橫渠爲廢令，以原俗爲先，每以月吉，具酒食，召鄉人高年會於庭，親爲勸酬，使人知養老事上之義，聞民疾苦。」

⑧說苑：「管子賤治單父，彈琴，身不下堂，單父治，巫馬期亦治單父，以星出，以星入，日夜不處，以身親之，而單父亦治，巫馬期問其故，管子曰：我之謂任人，子之謂任力。任力者勞，任人者佚。」並見韓詩外傳。

⑨宋史：「趙方知青陽縣，告其守史綱遠云：「備科不撓，是儘科中掣字，刑罰無差，是刑罰中教化。」

⑩麟庭詩：「天子觀瘡痍，將軍禁幽。」瘡痍，喻人民疾苦也。

⑪山堂肆考：「宋 陳康直知光化縣，西 覆爲澆城，令人歌之曰：「葉 光 化，豐 慈 城，清 如 水，平 如 衡。」

⑫註見第四〇篇。

四三 致監察院院長

某某先生賜鑒，風霜之任，而白簡。湛寒。

憲典之司，則青箱。華重。

直方固侔於石鑑。敬憚。咸仰夫

鐵肝。恭維

準繩。在握。

綱紀。存心，奇士無以易堯。公孤。莫敢難錯。翹詹

鳳采。曷罄驩愉。比年流寓。西北，教授兩齋。本無用世之心，兼以著書自

遣。竊見近來報紙，嘗紀內外官司，往往失德。傳曰：國家之敗，由官邪也。官之

失德，寵賂章也。風聞之効，固無取于今時。廉察其情，則何殊於往日！

先生氣貌清峻。風望整嚴。儻有見聞，宜無默爾。伏望

奮其搏擊。以折權門。至于末吏過失，愚以爲當責成主管長官。崑山之旁，玉

璞抵鵲。其地則然，其事不可以已乎？此昔賢所以執彈而遲迴於雕陵也。某

某往在都門，渥承

款洽，別來數載，懷念彌深，謹貢芻蕘，尚祈

省覽，專肅問候，敬頌

勛綬，惟希

鑒察，不莊。

註釋

○杜氏通典：『御史之名，周官有之，至秦，漢爲糾察之任。……故御史爲風霜之任，彈劾不法，百僚震恐，皆之雄酸，莫之比焉。』

○沈約宋書：『顧延之爲御史中丞，何尚之與延之書曰：『綽騶清路，白簡深劫，取之仲容，或有虧耶。』』

○蘇軾同游常州僧舍詩：『漉漉清池五月寒。』

○註見第四〇篇。

○南史：『王準之，自曾祖處之博聞多識，練習朝儀，其家世相傳，並諳江左舊事，綽之青箱，世謂之王氏青箱，除御史中丞，爲百僚所仰，自彪之至準之，四世此職焉。』

○陸倕除詹事表：『歸瑞華重，實異恆司。』王僧孺初夜文：『忘猥，循之尊高，略指雲之華重。』

○趙世應石鏡碑文：『君爲御史，雅節不羣，直方其道，仍授準繩之官，頗居爪牙之任。』

① 事文類聚：「四陲爲御史，當粉正色，百僚敬憚，上嘉其直。」

② 蘇軾贈錢顛詩：「烏府先生頗作肝，霜風卷地不知寒。」

③ 白居易詩：「烏府先生頗作肝，霜風卷地不知寒。」

④ 唐書魏謩傳：「御史臺，朝廷綱紀，綱紀正，則朝廷理。」

⑤ 漢書：「齊人方與，公謂御史大夫周昌曰：「君之吏趙主，年雖少，奇士也。君其必異之，是代君位……及昌相趙，高祖以御史大夫

印弄之，誰可以爲者，視趙發曰：「無以易魏，遂拜之。」

⑥ 公三孤也。孤，三孤也。少師，少傅，少保，是曰三孤。王侯亦自稱曰孤。

⑦ 漢書：「吳綰遷爲御史大夫，請諸侯有罪過，則削其地，收其版圖。奏上，上令公卿列侯宗室集議，莫敢難。」

⑧ 翰苑新書：「鳳于仞而鸞德，適逢可言之秋。豸一角而觸邪，特立正色之地。」

⑨ 註見第九篇。

⑩ 宋史：「胡瑗字翼之，海陵人，以經術教授吳中，范仲淹薦之。改教授湖州，弟子數百人，置經義治事兩齋，諸生各就其志，以類舉

。慶曆中興太學，下湖州取其法，嘗爲令，世稱安定先生。」

⑪ 戴叔倫詩：「用世空悲閱道淺，」謂出爲世用也。

⑫ 李郁贈王汝賢詩：「高歌聊自遣，世事欲茫然。」杜甫有自遣詩。

⑬ 毛詩伐木：「民之失德，乾糶以愆。」

⑭ 杜氏通典：「御史開風彈事，提綱而已，其鞠案繫繫，則委之大理。」梁書：「今權右可以風聞奏事。」

⑮ 後漢書第五種傳：「以司徒掾，清議使冀州，廉察首害。」

⑯ 唐書：「崔從氣貌孤峻，正色立朝，彈奏不避，憲度爲中丞，憲從自代。」

甲 通核類 四三 致監察院院長

◎唐書：「高元裕開成中遷御史中丞，風望整嚴。」

◎禮記·中庸：「其默足以容。」莊子：「至道之精，緜緜冥冥。至道之極，昏昏默默。」

◎白帖：「齊憲年之威，冠蓋之序。」晉行錄：「王素既陞蓋臺，風力愈勁，時人目爲獨舉。」

◎明史：「吳廷舉，嘉靖初晉右都御史，理南畿，折豪強，植貧弱，禁私驛，止妄工，南圻感然。」後漢書：「樓門請託，殘吏放手。」

◎短策·應徵論：「中國所鮮，外國感之，崑山之旁，以玉璞抵烏譏。」

◎莊子·刻意：「莊周遊於雕陵之樊，觀一異鵲，自南方來，翼七尺，目大運寸，感周之類，而集于栗林，莊周裝裳蹠步，執彈而留之。」

留，何便也。

◎毛詩·小雅：「既優既渥。」

四四 致審計部部長

某某先生勛鑒：鈎考之制，始於周官，會稽之錄，備於趙宋。太沖精於簿領，而益

矢廉勤，忠彥憂厥用財，而因言斂節，固知

考成之要，深協往哲之規，敬維

總司計會，

精審源流。

譽望丕昭，揄揚曷旣。某某乃以驚下，忝長財廳，此邦雖屬舊遊，財賦實非所習。猶幸內外掾吏，幹事者多，頗有整齊之效。夫要會之司，出入之賦，舊章舊人，在所不免，而稷蜂社鼠，盡去頗難。財蠹根蟄，爲害實烈。操之過急，則枝節橫生；御之太寬，則收拾不易。受事以來，兢兢祇慎，惟有相期十駕，

相勉十思，夙附

交遊，謹以狀白。儻荷

德音之時錫，俾資

鴻範之常臨，企幸曷勝。專啓奉候，敬頌

勛綏，惟祈

激警不具。

註釋

①周禮天官：「司會掌邦之六典八灋八則之貳，以逆邦國都鄙官府之治。」陸德明釋文：「司會是鈎考之官，選以六典逆邦國之治，八灋逆官府之治，八則逆都鄙之治，逆，鈎考，知得失。」

②宋史：「田況鈎考財賦，盡知其出入，乃約景德會計錄，著皇祐會計錄上之。」又：「李常爲戶部尙書，作元祐會計錄三十卷。」按會計錄自前代已有之，不始於宋，蓋至宋而益備耳。

③唐書：「大曆六年，以韓隴判度支。自兵興以來，所在賦歛無度，倉庫出入無法，國用虛耗，洩爲人靡勦，精於簿領，作賦出入之法，御下嚴急，吏不敢欺。」按灑字太沖，長安人。

④宋史：「韓忠彥爲戶部尙書，時元祐會計錄初成，入狹而用廣，忠彥憂之，因言敘節財用，遂裁冗費，監局於戶部。」

⑤周禮天官司會：「以參互考日成，以月要考月成，以歲會考歲成。」陸德明釋文：「以參互考日成者，司會鈎考之官，以司會之等相參交互考，一日之成，一日之中，計算文書也。以月要考月成者，月計曰要，亦與計職參互，考一月成事文書也。以歲會考歲成者，歲計曰會，以一歲之會計，考當歲成事文書。」

⑥晉書夏侯湛傳：「才高位卑，往哲攸歎。」往，昔，音賢也。

⑦文獻通考：「宋制，以三司使總邦計，司各有院，以柔中外泉穀出入之政，爲會計之府，後置審計院，以審其案牘。凡鹽鐵所賦，入度支之出納，及四方之計籍，上於司農者，審計則皆通其會。」按鈎攷也。

⑧荀子富國：「故明王必謹養其利，節其流，開其源，而時斟酌焉。」源以喻歲入，流以喻歲出。

⑨正韻：「不大也。」

⑩通鑑陝光武建武四年：「但駕馬銜刀，不可強扶。」胡三省註：「賢曰：周禮校人掌六馬，駕馬最下者也。」

④後漢書馬援傳：「爲郡掾克，守墳墓，鄉里稱善人。」

⑤金史：「李愬字子友，大定中再遷戶部侍郎，上問右丞石琚曰：「李愬果何如人？」琚曰：「亦幹事吏耳。」

⑥史記皮殖傳：「善者因之，其次利導之，其次整齊之，最下者與之爭。」

⑦周禮天官小宰：「聽出入以要會。」鄭氏注：「謂計會之簿書，月計曰要，歲計曰會。」

⑧毛詩：「不愆不忘，率由舊章。」

⑨尚書：「人惟求舊，器非求舊，維新。」

⑩韓詩外傳：「穰雖不攻而社鼠不黨，非以穰雖社鼠之神，其所託者善也。」

⑪左傳：「兵，兵之殘也，財用之發也。」

⑫毛詩小雅：「及其盪盪。」毛氏傳：「食根曰發，食節曰盪。」

⑬賈誼過秦論：「振長策而御宇內。」御，統治也，駕馭也。

⑭荀子修身：「夫驥一日而千里，駕馬十駕，則亦及之矣。」

⑮獻徵錄：「楊鼎字宗器，陝戶部右侍郎，嘗十思於座隅，曰：「豈思寬，犯思忍，勞思先，功思讓，坐思下，行思復，名思晦，位思卑，守思終。」

退思進，恆自會焉。」

⑯王先謙疏：「與晉立既，緒運篇章者，文人鴻範也。」鴻範，大規模也。尙書洪範，史記漢書，呂氏春秋，均作鴻範。

四五 致軍事委員會委員長

某某先生賜鑒：累繭重眠，羣期於撥亂反正。

櫛風沐雨，咸冀夫保大定功。霜雪被而茨棘枯，紘綱振而逆鱗墜。固知

威稜之震讐，實由

武略之紛紜。

盛業翹詹，頌忱曷旣。某某乃以擣昧，待罪星軺。出國經年，時艱益亟，每懷中

土，愀然深憂。前者德元首希特勒，著我之奮鬪一書，以華人與黑人相提並論，

識者恥之。詩曰：天之方蹶，無然泄泄。以

先生之憂勤，宜有以策國是而拯傾危。某某專對，已慚，更承大受，任重道遠，

彌復兢兢，尚乞

時授機宜，俾無隕越。願幸曷勝，專肅敬頌。

勛綏，諸惟

荃管不具。

註釋

○任昉百辟勸進疏：『異蘭救味，重屈存德。』李善注：『魏國策曰：公輸般爲楚設機械，將以攻宋。墨子聞之，百舍重繭，往見公輸般。輸般服焉，請見之王。王曰：善哉！請無攻宋。』淮南子：『申包胥異諸重龜，七日七夜，至于秦庭。以見秦王，曰：使下臣肯急，秦王乃發軍擊吳，果大敗之，以存楚國。』

○公羊傳：『撥亂世，反諸正，莫近於春秋。』漢書：『漢承百王之弊，高祖撥亂反正，景、莽在養民。』

○莊子：『沐甚雨，柳疾風。』恨風梳髮，藉雨沐頭，言勤勞之甚也。

○左傳：『楚子曰：武，禁暴戢兵，保大定功，安民和衆，豐財者也。』

○袁山松後漢書：『茫茫九州，瓜分撥切，滑滑蒼生，靡消鼎沸。……霜雪被而茨棘枯，絃網振而逆鱗尋，羣材畢濫，人鬼與能，數年之間，源清四海。』

○陸機辨亡論：『威稜則夷羿震盪，兵交則龍虎授箠。』漢書張湯傳：『張湯舞文巧詆以輔法，每朝奏事，辯圖案，日用肝，天子忘食，丞相取充位，天下事皆決湯，羣臣震懼。』

○司馬相如難蜀父老：『威武紛紜，潘風汪濊。』陸機辨亡論：『權略紛紜，忠勇伯世。』

○郭璞爾雅序：『英儒瞻聞之士，漢筆詭誕之客，靡不欽玩耽味，爲之義訓，我亦揆得味，少而習焉，沈研鑽極，二九載矣。』郭茂疏：『博淵博杌無知之貌，聞也。』

○後漢書李郁傳：『和帝分遣使者，觀採風謠，使者二人到益，投部候舍，郁因仰觀，問曰：二君發時，寧知朝廷遣二使耶？問何以知。』

甲 酒候類 四五 致軍事委員會委員長

之部指星示云有二使星向益州分旆，故知之。」高適詩：「星使出歸曹。」宋之問詩：「星輅下紫微。」謂星使所乘之車也。

⑤後漢書西域傳論：「其國則殷乎中土。」開中國也。

⑥事見一九三五年十二月十六日，伯林路選電。

⑦毛詩大雅：「天之方厭，無然泄泄。」朱彞集註：「厭，顛覆之意。泄泄，怠緩恇從之貌。言天欲顛覆周室，羣臣無得泄泄然不念救也。」

⑧註見第二篇⑥。

⑨論語：「君子不可小知，而可大受也。」大受，謂大用也。此處意謂公使升格為大使也。

⑩論語：「士不可以不弘毅，任重而道遠。仁以為己任，不亦重乎？死而後已，不亦遠乎？」

⑪韓愈文：「舉動合機宜，而風采可畏愛。」朝事之機要而處置合宜也。

⑫左傳僖公九年：「恐阻懸于下，以遠天子羞。」杜氏注：「阻，懸也。」

四六 致全國經濟委員會常務委員

某某先生勛鑒：為民興利，則日引月長；

稱物①，幹時②，則用贍③，食足④，外經通而內周密⑤，修六府⑥，而惠百工⑦，敬

維

集思廣益，

經國濟民。

霽采[⊗]翹詹[⊗]頌忱曷旣[⊗]某某暑期旅行，至于某地，農田水利，多用新式機器，五花八門[⊗]，真有盲人摸象[⊗]之喻。當茲開發西北，高唱入雲[⊗]，有此設施[⊗]，三秦[⊗]觀聽，爲之聳然，其地爲入甘要道，市廛[⊗]甚盛，商賈駢田[⊗]，車馬絡繹[⊗]，酤酒賣餅[⊗]，魁膾屠兒[⊗]，南中劇鎮[⊗]，不過爾爾[⊗]，而鄉民安土樂業[⊗]，如登春臺[⊗]。談及

貴會實事求是[⊗]，幾欲以頭禮足[⊗]也。微聞卽此經營[⊗]，已費鉅萬，代價之大，固宜有以饜民之望耳。某某在於閒處，觀一切法[⊗]，誰譽誰毀，無黨無偏[⊗]，但求如此地鄉民，渾然[⊗]不知有亡國之禍，則拜公等之賜，不亦多乎！恃附

舊遊，輒陳近事，專啓祇候，敬頌

勛綏，惟祈

激照不莊。

註釋

○漢書：「召信臣遷南陽太守，好爲民興利，務在富之，躬勸耕農，行視水泉，開道溝洫，起水門堤閘，凡數十處，以廣溉灌，歲歲增加，多至三萬頃，民得其利。」

○魏志：「劉廙子靖出爲河南尹，應璩書與靖曰：「入作納言，出臨京尹，富民之術，日引月長。」

○周易謙卦：「君子以裨物平施。」裨，度也，量也。

○白居易行常集制：「標事帥屬，居其要會，幹時運才，始可與領。」

○後漢書李汪鄧來傳贊：「李鄧豪膽。」鄧，長代以吏二千石爲豪。李，通家富爲贖也。用贖者，財用甚富給也。

○論語：「足食足兵，民信之矣。」

○蘇頌授源乾曜戶部制：「思總事端，言思政要，外則經通成務，內則周密知微。」

○尚書大禹謨：「水，火，金，木，土，穀，惟修。」又：「六府三事，允治，萬世永賴。」孔氏傳：「言養民之本，在先修六府。」按六府，水，火，金，木，土，穀也。

○考工記：「國有六職，百工與居一焉。」左傳閔公二年：「通商惠工。」

④西京雜記：「雲三色爲縹。」縹亦作縹。

⑤張翥題黑神廟詩：「五花營，千里馬。」五花，卽五行陣也。八門陣，卽週甲之休生傷杜死景驚開八門。

⑥滄陵經：「有王告大臣，汝率一象來，示盲者時，盲者各以手觸，大王喚衆言問之。汝見衆類何物，觸其牙者，言衆形如蠶，龍根，觸其耳者言如箕，觸其脚者言如日，觸其脊者言如牀，觸其腹者言如窰，觸其尾者言如繩。」

⑦西京雜記：「戚夫人善爲翹袖折腰之舞，歌出塞入塞，蜀歸之曲，侍婦數百，皆習之。後宮齊首高唱，聲入雲霄。」

⑧朱然詩：「廟諱參殿施。」謂規模施行也。

⑨王勃杜少府之任蜀川詩：「城闕輔三秦，風煙望五津。」按頭羽三分關中，王濬降將軍郤爲雍王，王威陽以西，司馬欣爲塞王，王威陽以東至河，董尉爲翟王，王上郡，是爲三秦。雅今陝西故關中道西部之地。雅今陝西故關中道東部之地。雅今陝西故榆林道之地。

⑩神仙傳：「或隱山林，或出市廛。」

⑪張衡西京賦：「麋鹿變麋，駢田偃仄。」薛綜注：「駢田偃仄，聚會之意。」

⑫衛恒四聲譜序：「鴻鶴羣遊，結繩遷延。」釋名：「往來不絕曰絡繹。」

⑬三輔舊事：「太上皇不樂關中，思葦鄉邑，高祖從豐沛，留酒煮餅商人，立爲新豐。」

⑭妙法蓮華經安樂行品：「屠兒魁婦，改獵漁捕……如是之人，皆勿親近。」

⑮通鑑漢獻帝建安八年：「以郿郡司馬黃蓋，解當，周泰，呂蒙，等守劄縣令長。」胡三省注：「劄，縣也，甚也。言其地當山越之要，最爲艱劇之甚者也。」劄，言此鎮市，最爲繁劇也。

⑯晉書張方傳：「王若聞劄，猶但言劄。」猶云如此也。

⑰三國志賈詡傳：「太祖破荊州，欲順江東下，關諫曰：明公若破袁氏，今收漢南，威名遠著，軍勢既大，若乘奮繼之機，以擊東土，蘇甲，通候類。四六 致全國經濟委員會常務委員

安百姓，使安士樂業，則可以不勞衆而江東稽服矣。」

◎老子：「衆人熙熙，如享太牢，如登春臺。」謂者景融和，登臺遠眺，心曠神怡，喻盛世也。

◎註見第二〇篇④。

◎釋法顯佛國記：「法顯等欲觀行像……像立車中，去門百步，王脫天冠，易著新衣，徒跣持華香，翼從出城迎像，頭而禮足，散華

燒香入城。」

◎毛詩大雅：「經始靈臺，經之營之，庶民攻之，不日成之。」

◎妙法蓮華經安樂行品：「諸法有無，是實非實，是生非生，在於閒處，修攝其心，安住不動，觀一切法，皆無所有，不生不出，不動不

退。」

◎尚書洪範：「無黨無偏，王道平平。」

◎揚子法言：「侯夏之書運漚爾。」漚漚，教機貌。

四七 致參謀總長

某某先生勛鑒：善謀屢中，居樞要，而典軍機；上略無倫，抒壯猷，而成廟

算。權奇諮夫曲逆，籌策問於營平。敬維

玄雲無象。

成竹在胸^①

帷幄^②翹詹，揄揚曷既。某某開年^③在都，自託同學^④之末，衣旃^⑤利見^⑥，猥荷

隆情，憑鬪几^⑦而話著簪^⑧，飲醇醪^⑨而饗珍異^⑩，廣坐稠人^⑪之中，款洽獨厚。每一思量，惟有銜戢^⑫，家事待理，遂復歸來。本年巨浸^⑬，爲菑，寒家幸有山房^⑭，尙得安居^⑮。當門翠竹，彷彿法身，近野黃花，竟同般若^⑯。經營此築^⑰，

已十年矣。譬如以髀爲塔，視同命根^⑱，其猶

大君子之不忘息壤^⑲，歟。專肅馳候，祇頌

勛綏，惟希

朗答不備。

註釋

①法傳：「秦康公送公子雍于晉，宣子曰：先人有善人之心，軍之善謀也，逐寇如道，逃軍之善政也。」
②《資治通鑑》：「遷世軍國，嘉謀屢中。」

甲 通候類 四七 致參謀總長

◎後漢書：「天下樞要，在於尚書。」政事集中之地曰樞要。

◎南史·顏延之傳：「出入臥內，斷決軍機。」謂行軍機要之事。

◎孫子：「善用兵者，有二路焉，上略伐智，中略伐義，下略伐勢。」李商隱華清宮詩：「華清恩幸古無倫，猶恐蛾眉不勝人。」

◎註見第四篇。

◎孫子：「兵未戰而廟算勝者，得算多也。」

◎漢書·陳平傳：「平陽戚人，少家貧，好讀書，美如冠玉，事高祖，屢出奇策，封曲逆侯。」

◎漢書·趙充國傳：「充國上邽人，沈勇有方略，武帝時破匈奴有功，拜中郎將。宣帝時，羌人叛，充國年已七十餘，馳至金城，圖上方略，固以破羌，凡斬首七千六百級，降者三萬一千二百，詔罷屯田，振旅而還。後以營平侯就第，朝廷每有四夷大議，常與參兵謀，問籌策焉。」

◎李筌太白陰經：「兵者，陰道也，故能而示之不用，心謀大，迹示小，心謀取，迹示與。雖平若玄靈之無象，濛平若滄海之不測，如此則陰陽不能算，鬼神不能知，智術所不能窮，卜筮所不能占。」

◎蘇軾畫竹記：「畫竹必先得成竹在胸中。」

◎史記·高祖紀：「夫運籌策帷幄之中，決勝千里之外，吾不如子房。」

◎沈約與徐勉書：「開年以來，病增虛切。」開年，謂歲首也。

◎後漢書·張闡傳注：「體祖充與光武同門學。」謂同師而學也。杜甫詩：「同學少年多不識，五陵衣馬自輕肥。」

◎西京雜記：「虔敬始因虞將軍，請見高祖，衣席衣，披羊裘，虞將軍脫其身上衣服以衣之。敞曰：「敬本衣帛，則衣帛見，敬本衣裘，則衣旃見，今舍旃裘，假鮮華，是懸常也，不敢。」

◎周易·乾卦：「希龍在天，利見大人。」

④西京雜記：「漢制：天子玉几，冬則加錦繡其上，謂之繡几。公侯皆以竹木爲几，冬則以細氈爲繡以覆之，不得加錦繡。」
⑤韓詩外傳：「孔子出遊，有婦人中澤而哭。曰：鄉者刈薪，遺吾著簪，非傷遺簪也。蓋不忘故也。」

⑥三國志周瑜傳注引江表傳：「程顧願以年長敬陵侮瑜，瑜折節容下，終不與校，嘗後自敬服而親暱之。乃告人曰：與周公瑾交，若飲醇醪，不覺自醉。」

⑦劉敬叔異苑：「屬黃國王買得一鸞，欲其鳴，不可致，飾金鬋，嬰珍異，對之愈戚，三年不鳴。夫人曰：昔聞鸞見類則鳴，何不懸鏡照之。王從其言，沖香一盞而絕。」

⑧梁書簡子顯傳：「始預九日朝宴，稱人廣坐，獨受旨云：今靈物甚美，願得不斐然賦詩？」
⑨註見第一篇。

⑩莊子逍遙遊：「大溟濶天。」大溟，大水也。

⑪宋史李常傳：「讀書廬山白石僧舍，既罷第，留所抄書九千卷，名舍曰李氏山房。」

⑫漢書貨殖傳：「各安其居，而樂其業。」

⑬指月錄：「華嚴廣主問大殊和尚曰：禪師何故不許青青翠竹，盡是法身，鬱鬱黃花，無非般若？殊曰：法身無象，應翠竹以成形，般若無知，對黃花而顯象。非彼黃花翠竹而有般若法身。」

⑭爾雅釋詁：「賈方回本山陰人，往姑蘇之臨防橋，有小築在橋壑，嘗往來其間。」

⑮法苑珠林：「佛告阿難，汝取我髮，合六十二莖，我欲造塔，阿難取付世尊，佛告諸羅刹，我施汝二莖，當造七寶頭，及造旛檀塔，盛髻供養，可高四十由旬，餘六十莖，亦隨造頭塔，可高三丈，又告諸羅刹守護，勿使外道惡人，魘鬼，毒龍，妄毀我塔，此塔是汝命根，汝必歸塔。」

⑯史記：「陳武王與甘茂盟於息壤，使將兵伐宜陽，五月不拔，王欲罷兵，甘茂曰：息壤在彼，王曰：有之，因大悉起兵，遂拔宜陽。」

四八 致訓練總監

某某先生勛鑒：選士厲兵，禮經之教也。

明恥教戰，春秋之義也。既繕甲而具卒，亦

練旅而簡徒。敬維

日討軍實。

載纘武功。引歧

駿馱，曷勝臆頌。某某出宰某邑，其地陂陀表海，兼有南北之疆。前清以來，稱爲難治。受事經歲，錯節盤根。祇愼焦勞，幸無蹉跌。今日旱潦，相繼饑饉，薦臻。農村破產之餘，匪患未寧之日，但得良懦，蠱安，疆橫少戢。毋使牛而化虎，羊而化狼。斯亦慰矣。安望鷹之爲鳩，虎之爲狸乎！

先生久在行間，飽歷憂患，小民疾苦，目睹已多，當茲疲敝之秋，定有

慈和^①之實，某某錄錄^②平生，卑無高論^③，恃在舊誼，謹以狀聞，專啓祇候，虔頌

勳綬，惟祈

激照不莊。

註釋

①禮記月令：「孟秋之月，天子乃命將帥，選士厲兵，簡練桀桀。」

②左傳：「明恥教戰，求殺敵也。」

③左傳：「大叔完葦，繕甲兵，具卒乘。」杜氏注：「步曰卒，車曰乘。」

④柳宗元《渠州江運記》：「御史大夫嚴公牧于梁，遷徒練旅，有衆孔武。」漢書刑法志：「五刑爲厲，厲有長。十國爲連，連有帥。三十國爲卒，卒有正。二百一十國爲州，州有牧。連帥比年簡車，卒正三年簡徒，羣牧五歲大簡車徒，此先王爲國立武之大略也。」

⑤左傳：「楚自夔廬以來，其君無日不討國人而訓之，於民生之不易，禍至之無日，戒懼之不可以忘，在軍，無日不討軍實而申敵之於勝之不可保，樹之百克而卒無後。」杜氏注：「討，治也。」

⑥毛詩邶風：「一之日于貉，取彼狐狸，爲公子裘，二之日其同，載櫜武功，言私其縱，獻獠于公。」毛氏傳：「櫜，櫜也。」孔穎達疏：「……因說田獵之事，至二之日之時，君臣及其民，俱出田獵，則繼續武事，年常習之，使不忘戰也。我在軍之士……戰鬪不可以不習，四時而習之，美先公禮教備矣。」

甲 通候類 四八 致訓練總監

④禮記中庸：「寬柔以教，不報無道，南方之強也。君子居之，往金革，死而不厭，北方之強也，而強者居之。」

⑤後漢書：「虞翻爲朝歌長，故舊皆弔，翻曰：『雖者不違，易者不從，不過盤桓窮節，何以別其利器乎！』」

⑥柳宗元爲王叔文陳情表：「以開塞重輕之務，加魚勞憂灼之懷。」

⑦後漢書律曆志：「無有差跌。」差跌，失墜也，亦作蹉跌。

⑧說文：「潦，雨大也。」毛詩大雅：「洞酌彼行潦。」謂路上流水也。

⑨毛詩大雅：「饋贈庶臻。」爾雅釋天：「穀不熟爲饑，饑不熟爲饉。」

⑩荀子修身篇：「偷懦慝事。」漢書兒寬傳：「善屬文，然懦於武。」懦，弱也。

⑪毛詩周頌：「載戢干戈。」又小雅：「駕鸞在梁，戢其左翼。」戢，藏也，斂也。

⑫任昉述異記：「周幽王時，牛化爲虎，羊化爲狼，洛南有隄，復城，云幽王時，羣羊爲狼，食人，故築城遮之。」

⑬羅繼意別傳：「慮遷東平，段丘令，男子原直勇悍有力，榮恃，好犯長吏，慮到官，召醫捕盜，劫謂之云：『令嘗嘗破三軍之衆，不用尺兵，嘗縛暴虎，不用尺繩。』爾豫之氣勢安若宜慎之，復召直子涉，擊門下，將游微，私出入寺門，無所關白，故涉糧之，直走之寺門，吐氣大言，激勸直，能爲子屈，自縛謝令，不則鞭殺其子，直果自縛，意曰：『前告汝曹，縛暴虎不用尺繩，汝自視何如虎自縛耶？』勸獄，植直父子，皆連其頭，對榜之，欲死，操吏陳諫，乃貸之，由是相率爲善，所謂上德之政，應化爲鳩，暴虎成羸，此之謂也。」

⑭史記衛青傳：「青幸得以肺腑待罪行間。」謂在行伍也。

⑮漢書萬石君傳：「慶歷不任職，上書曰：『臣等得待罪丞相，疲爲無以輔治。』疲，勞乏也。左傳襄公九年：『以敝楚人。』敝，罷也，敗也。

⑯左傳：「子罕曰：『凡諸侯小國，晉楚所以兵賦之，畏而後上下慈和，慈和而後能安靖其國家。』晉小國受外侮之激刺，不得不爾心協力，上愛其下，下順其上，上下慈和，以維邦本也。」

①史記平原君傳：「公等錄錄。」漢書何傳：「當時錄錄，未有奇節。」錄錄，言在凡庸之中也。
②漢書張釋之傳：「釋之言便宜事文帝曰：『卑之毋甚高論，令今可施行也。』」

四九 致軍事參議院院長

某某先生勛鑒：孟堅中護，遂刊石於燕然。子羽備兵，亦安瀾於江表。從來諮問，能釋軍國之疑。卽論參懷，實決禦夷之議。今茲懋績，允邁前脩。敬維令聞日著。

景祐時申遙企

英標曷勝馨頌。某某奉命司戎，警備海嶠。此地負嶄巖，而面決瀟。內有崇山。榛莽。外有磐礪。枝岐。潛達幽岫。向爲羣盜鷗視狼顧之區。前此守吏，專以容忍疏通爲事，藉其劫掠之餘，名日報効，或曰罰款，以爲地方保衛經

費之用，此何異奪門夫屨給小奴而有德色！抑亦飲鳩毒而挹盜泉也。某到任，稟承長官方略，一以剿捕肅清為務，期年以來，頗著成效，惟是經費不敷，善後百端，未能着手，斯為憾耳。素承

關注，謹以狀聞，尚乞

時錫教言，資為架護。企幸曷勝，專此奉候，祇頌

勛綏，惟希

朗照不具。

商權

以上三篇，雖同屬軍事機關，但性質各別，蓋首領語，各異其宜，未可移易也。

註釋

○後漢書班固傳：「大將軍覽，出征匈奴，以固為中郎，與參謀。」按班固字孟堅。

○齊房王子都，據侯湯，來弔國，蒙賢，應遣客刺殺湯，發覺，應懼，自求擊匈奴以贖死，會南單于請兵北伐，乃拜駱軍將軍，以統

金吾歐陽爲副，大破單于，蓋登燕然山，刻石勒功，紀漢威德，令班固作銘，事見後漢書。

宋史：「張浚宣撫川、陝，辟劉子羽參議軍事，金人竊江、淮，急子羽命吳玠、楊和尙原守大散關，分兵悉守諸險塞，金人知有備，引去。」

後漢書趙典傳：「朝廷每有疑議，輒諮問之。」

通鑑宋孝武帝大明二年：「上嘗與薄興、尙之、參圍。」胡三省注：「宋齊之間，凡參決機要務，率皆謂之參圍。」

註見第四七篇。

楚辭：「晉晉法夫前備兮！前俗，往昔也。」

張九齡詩：「家在湘源住，君今海嶺行。」謂有海多山之地。

同馬相如上林賦：「崩騰鬱壘。」

馮衍顯志賦：「暨河華之決漲。」決漲，廣大也。

王羲之蘭亭集序：「此地有崇山峻嶺，茂林修竹。」

揚雄反騷：「根棘之榛榛兮！榛榛，梗棘貌。楚辭九章：「陶陶孟夏兮！草木莽莽，雋醴永哀兮！汨徂南土。」莽莽，草深貌。

木華海賦：「竭磐石，相百竅。」尙書禹貢：「夾右碣石，入于河。」說文：「特立之石曰碣。」

木華海賦：「枝岐浮淪，渤澥成汎。」李善注：「管子管子仲書桓公曰：水別於他水入於大水及海者命曰枝。禮天子傳曰：飲於枝。」

待之中。郭璞曰：水岐成待。」

郭璞江賦：「爰有包山洞庭，巴陵地道，清達傍通，幽岫錯雜。」郭璞山海經注：「洞庭地穴，在長沙巴陵，吳縣南太湖中，有苞三。」

山下有洞庭穴道，潛行水底，云無所不通，疑爲地脈，遂水中穴道交通者。」

淮南子：「鵲視鹿顧。」鹽鐵論：「無鹿駭猿顧之憂。」

甲 通候類 四九 致軍事參議院院長

①張藻朝野僉載：「鄭仁凱爲密州刺史，有小奴告以履穿，凱曰：『阿翁爲汝縫鞋，有頃，門夫着新鞋者至，凱疑前檢有鳥糞，遺門夫上樹取其子，門夫脫鞋而絛之，凱令小奴着鞋而去，門夫竟至徒跣，凱有德色。』」此處謂竄盜所劫掠者，百姓之財物也，以門夫鞋喻百姓財物。

②後漢書：「瘵飢於附子，止渴於鴆毒，未入腸胃，已絕咽喉，豈可爲哉！」

③尸子：「孔子適於盜泉，渴矣而不飲，惡其名也。」陸機猛虎行：「渴不飲盜泉水，熱不飲惡木陰。」

④風原離騷：「求寔感之所同。」亦作寔感，謂法度也。

五〇 致中央研究院院長

某某先生勛鑒：研覈是非，而探蹟索隱；

究竟上下，而博考覃思。敬維

卽物窮理，

致遠鉤深。景跂

清暉，曷勝馨頌。某某 上年歸里，省府采及虛聲，猥以圖書館事見委，辭不獲已。受事以來，一以整齊擴充爲務，而經費短絀，添購圖書，大不容易。惟近來出土金

石，往往廉價得之，如鐵山青玉器，崇蘭瓦，自歐趙以來，著錄所未備也，彌足珍異。前者某委員西來，徵求金石，曾以數器奉之。某君請玉請瓦，館人褊心，以爲買菜求益，未之應也。今某君逝矣，緬懷風義，甚悔前愆，卽欲投壁陽侯，懸劍空隴，復何用乎！邇奉

手書，備荷

獎飾。因念此事，益用愴然，尙冀

清誨有加，資爲則儆，幸甚幸甚。專肅祇候，虔頌

勛綬，諸惟

激訥不莊。

商榷

篇首頌語，凡對研究學術之人，皆可耐用。後幅則設論耳。

甲 通候類 五〇 致中央研究院院長

註釋

① 張衡東京賦：「如之何其以溫故知新，研覈是非，近於此惑。」薛綜注：「研，審也。覈，實也。」

② 周易繫辭：「探賈索隱，鈎深致遠，以定天下之吉凶，成天下之亹亹者，莫大乎蓍龜。」

③ 後漢書：「禮樂極盛，上下究竟。」

④ 孔安國尚書序：「於是遂研精覃思，博考經籍，採摭羣言，以立訓傳，約文申義，敷暢厥旨。」

⑤ 大學朱注朱熹曰：「所謂致知在格物者，言欲致吾之知，在即物而窮其理也。」

⑥ 註見本篇①。

⑦ 後漢書：「虛士純盜虛聲。」謂有虛名而無實用。

⑧ 禮天子傳：「天子西征，至于欽閭氏，命欽閭氏供食六師之人于鹹山之下，天子祭于鹹山，祀于郊門。」漢書西域傳：「海軍有鹹山，出青玉。」徐松補注曰：「今葉爾羌河所經之隘爾尙，出青玉。」禮天子傳天子祭鹹山，御覽以爲即遼東鹹山。」

⑨ 郭靈洞冥記：「武帝未誕之時，景帝夢一赤環，從雲中直下，入崇蘭閣，帝寤而坐於閣上，果見赤氣如煙霧，來蔽戶牖，乃收崇蘭閣爲齋爾殿。後王夫人誕武帝於此殿。」

⑩ 集古錄歐陽修撰，集錄金石之文，全爲跋尾，凡四百餘篇，共十卷。

⑪ 金石錄趙明誠撰，以所藏三代彝器，及漢唐以來石刻，仿歐陽修集古錄例，編排成帙，凡跋尾五百二篇，共三十卷。

⑫ 毛詩魏風：「維是褊心，謂狹也，急也。」

⑬ 皇甫謐高士傳：「帝遣安車玄纁，聘光，三反而後至。司徒隴與光素善，欲風光刺隴所與言，遣使西曹屬候子道奉書，光不起，于牀上箕踞抱膝發書，讀訖，問子道曰：君房素誕，今爲三公，能小差否？子道曰：位已鼎足，不礙也。光曰：道猶來何言？子道傳謫言。光

⑭ 皇甫謐高士傳：「帝遣安車玄纁，聘光，三反而後至。司徒隴與光素善，欲風光刺隴所與言，遣使西曹屬候子道奉書，光不起，于牀上箕踞抱膝發書，讀訖，問子道曰：君房素誕，今爲三公，能小差否？子道曰：位已鼎足，不礙也。光曰：道猶來何言？子道傳謫言。光

⑮ 皇甫謐高士傳：「帝遣安車玄纁，聘光，三反而後至。司徒隴與光素善，欲風光刺隴所與言，遣使西曹屬候子道奉書，光不起，于牀上箕踞抱膝發書，讀訖，問子道曰：君房素誕，今爲三公，能小差否？子道曰：位已鼎足，不礙也。光曰：道猶來何言？子道傳謫言。光

⑯ 皇甫謐高士傳：「帝遣安車玄纁，聘光，三反而後至。司徒隴與光素善，欲風光刺隴所與言，遣使西曹屬候子道奉書，光不起，于牀上箕踞抱膝發書，讀訖，問子道曰：君房素誕，今爲三公，能小差否？子道曰：位已鼎足，不礙也。光曰：道猶來何言？子道傳謫言。光

曰：躬言不獲，是非難言耶？天子徵我，三乃來，人主尚不見，常見人臣乎？子道求報，光曰：我手不能書，乃口授之，使者歲少。光曰：實索乎求金也。關封奏其書，帝笑曰：狂奴故態也。」後漢書所傳略同。

◎李商隱哭劉蕡詩：「平生風義罷朋友，不敢同君哭廢門。」

◎張華博物志：「遊監子羽渡河，當千金之璧於河，河伯欲之，至陽侯波起，兩蛟挾船，子羽左操璧，右操劍，擊蛟皆死。既渡，三投璧於河，河伯躍而歸之，子羽裝而去。」

◎劉向新序：「延陵季子將西聘晉，帶寶劍以過徐君，徐君不言而色欲之，季子爲有上國之事，未獻也，然心許之矣。致使於晉，願反，則徐君死，於是以劍帶徐君墓樹而去。」劉陵重答劉琰留書：「懸劍空墮，有恨如何！」

◎毛詩小雅：「君子是則是效。」

五一 致建設委員會委員長

某某先生勛鑒：建置◎弘規，幾於開物成務◎。

設施◎重任，庶乎遺大投艱◎。式觀利用◎之經營◎，益仰平生之事業。敬維

勛華炳蔚◎。

忠盡昭宣。翹首

慶雲，傾心向日。某某僑居北海，久闊歲時，每憶春明，輒思

清令，自惟末學，無階於當世。雖子羽以頭責，發笑而韶之以目耕，自娛。伐木嚶鳴，寧無詠歎。彈冠相慶，亦有情親。慨國家之多難，誠干澤以何心！此所以驥首而低回，長鳴而頓抑也。

先生名位俱崇，與國休戚，伏願

矢厥公忠，拯茲危局。忝附通家之誼，敬馳問候之牋，儻獲

嘉言，啓其蒙惑，企幸曷勝。專肅，祇頌

勛綏，惟希

澈照不具。

註釋

①漢書武五子傳：「略取河南，爲置朔方。」寇置，謂設立也。

①周易繫辭：「夫易開物成務，冒天下之道，如斯而已者也。」韓康伯注：「言易通萬物之志，成天下之務。」

②周易繫辭：「聖人設卦觀象。」孔穎達疏：「吉凶，失得之象，悔吝，憂虞之象，變化，進退之象，剛柔，晝夜之象，是施設其卦，有此諸象也。」朱熹詩：「廟謨參設施。」設施，謂規畫施行也。

③尚書：「予道天授，遠大授猷于朕身。」謂常重大艱難之任。

④隋書文選序：「式觀元始，眇觀玄風。」尚書：「水火，金木，土穀，惟修，正德，利用，厚生，惟和。」孔氏傳：「正德以率下，利用以阜財，厚生以養民，三者和，所謂善政。」

⑤註見第四六篇。

⑥馬融忠經序：「履勛華之德。」抱朴子行品：「躬蔚內結，城闕外御。」

⑦毛詩大雅：「王之蓋臣。」孔穎達疏：「蕪忠愛之篤，進進無已也。」三國志注：「胡濟爲諸葛亮主簿，有忠藎之效。」

⑧禮應圖：「景雲者，太平之應也。一日慶雲，非氣非煙，五色綢繆。」

⑨曹植求通親屬表：「若葵藿之傾葉，太陽雖不爲之迴光，然終向之者誠也。」

⑩註見第八篇。

⑪語林：「有人目杜弘治樞辭甚清冷，初若照怡容無謂，盛德之風，可樂詠也。」

⑫張衡東京賦：「若客所謂末學膚受，貴耳而賤目者也。」薛綜注：「末學，謂不經根本。」

⑬論語：「猶天之不可階而升也。」班固西都賦：「雖輕迅與便狡，猶愕眙而不能階，攀井幹而未中，且尚轉而意迷。」階，梯也。

⑭世說新語：「頭資秦子羽云：子曾不如太原溫翹、潁川荀爽、范陽張華、上邳劉許、襄陽鄒滿、河南鄭詡，此數子者，或嘗喫無宮闕，或尙陋希言語，或淹伊多姿態，或謹諱少智識，或口如含膠餡，或頭如巾襜，而猶以文采可觀，意思詳序，攀龍附鳳，並登天府。」

⑥世說新語：「王韶之家貧，好學，執卷不輟，家人謂之曰：『困窮若此，何不耕？』王徐答曰：『我常日耕耳。』」

⑦毛詩小雅：「伐木丁丁，鳥鳴嚶嚶，出自幽谷，遷于喬木，嚶其鳴矣，求其友聲。」

⑧漢書：「賈馮，鄰人，字少翁，以明經高行，徵為博士。元帝時，累官至御史大夫，數言得失。馮與王吉為友，吉字子陽，世稱王陽在位，賈公彈冠，言其趣會同也。」劉歆廣絕交論：「王陽登則賈公喜，舉生逝而國子悲。」

⑨孟子：「知其不可，然且至，則是干澤也。」干澤，猶言干祿。

⑩後漢書孔融傳：「十歲遭李膺門，曰：『我是李君之通家子弟。』累世相友善者，謂之通家。」

五二 致省政府主席

某某先生勛鑒：旬宣。豈弟。則召虎之功多；

志略深沈。則元龍之譽重。禮萬家之

生佛。頌一路之

福星。敬維

德標素尚。

績懋疆圻。景跋

祥光，無任馨頌。某某杜門。謝事久矣，前者乃辱賜書，猥荷
祓飾，並以治術。見問。

齒頰餘甘。下逮山澤，感何可言。大舉清鄉，在今日誠爲急務。饑饉兵燹之餘，
流亡未輯，將欲疏濯，整齊，譬如牛角紵昔，加以刮磨也。除惡務盡，泄瀉
注下，身非健實，鮮不危殆。昔人有云：豐年治匪，語雖平易，未可忽也。

明公閱議，極所贊同，惟此去秋穫，纔數十日，儻俟籌車，事畢，然後清鄉，不妨農
事一也。衣食羸足，小人庶幾洗心。二也。客匪或資以去境，而無困獸猶鬪之
虞，三也。一孔之見，謹貢。

先生未知有當萬一否也！專復奉候，虔頌。

勛綏，惟祈。

激管不備。

註釋

①毛詩大雅：『王命召虎，來旬來宣，文武受命，召公維翰。』鄭箋：『來，勸也。旬，常作營，宣，循也。王命召虎，女勤勞於經營四方，勤勞于徧，經理衆國。』

②毛詩大雅：『豈弟君子，民之父母。』鄭箋：『豈，樂也。弟，易也。』豈弟亦作愷悌。

③三國志陳登傳：『登，下邳人，字元龍，爲人深沈有大略。許汜與劉備並在荊州牧劉表坐，表與備共論天下人，汜曰：『陳元龍湖海之士，豪氣未除。』』

④宋史司馬光傳：『光，雋，都中及四方，皆遠徠以視。』戴翼賀陳待制啓：『生佛萬家之香火。』殆用光傳耶？

⑤山堂肆考：『宋薛子旒，字子駿，爲浙東轉運使，比行，司馬光曰：『今欲教東土之服，非子駿不可，此一路福星也。』』

⑥任昉王文憲集序：『前郡尹溫，太真，劉貞長，或功銘鼎彝，或德標棠尚。』

⑦左傳桓公十七年：『夏及齊師戰于奚，糧事也。』杜注：『爭糧界也。』又昭公二十一年：『天子之地一圻。』韻會：『千里爲圻。』

⑧通鑑秦紀始皇帝三年：『季牧杜門稱病不出。』胡三省注：『杜門，塞門以拒絕來者。』

⑨讀書高祖紀：『朕君臨區宇，深思治術，欲使生人從化，以德代刑。』

⑩蘇軾徵棧詩：『待得餘甘回齒頰，已輸犀盤十分甜。』

⑪玉篇：『飛，野火也。』兵燹，謂兵亂焚掠也。

⑫郭璞江賦：『灌盪疏風，鼓翅翻翻。』李善注：『疏，遠也。』

⑬周禮冬官考工記弓人：『老牛之角鈇而青。』鄭氏注：『青，謂爲交錯之錯，謂牛角角理錯也。』

⑭韓愈進學解：『爬探剔抉，刮垢磨光。』

① 尚書泰誓：「樹德務滋，除惡務本。」

② 揚子方言：「濯濯爲注下之盛。」

③ 莊子刻意：「聖人休焉，則平易矣。」

④ 漢書揚雄傳：「於時人苦貧之。」前古曰：「芻與忽同，輕也。」

⑤ 史記滑稽列傳：「既寢縮箠，汗邪滲車，五穀蕃熟，穰穰滿家。」

⑥ 周易繫辭：「聖人以此洗心，退藏於密。」關氏易傳：「接物者，言接之而已，非同之也，故洗濯物心，無所滯污，謂之洗心。」

⑦ 左傳宣公十二年：「晉文公曰：得臣猶在，愛未歇也，困獸猶鬪，況國相乎？」

⑧ 禮記中庸：「反古之道。」鄭氏注：「反古之道，謂曉一孔之人，不知今王之新政可從。」孔穎達疏：「孔謂孔穴，孔穴所出，事有多塗，今唯曉知一孔之人，不知餘孔通達，唯守此一處，故云曉一孔之人。」

五三 致民政廳廳長

某某先生勛鑒：威惠並流，而張賢之譽重。

襟宇曠達，則士啓之名高。敬維

分藩壯闊。

布政優和，引企

甲 通候類 五三 致民政廳廳長

勛華，曷勝馨頌。某某越在羈旅，久別家山，前聞

福曜，照臨遠人尤喜。邇日數接鄉賢談及

新政，除苛解嬈，爲本省十數年來僅見之

循良，相與稱歎久之。國難益深，吾儕小民，但得封疆是保，先墓長存，願斯足

矣。

明公乃能嘉惠一方，專以寬厚清靜爲務，此更小民所忻幸者也。某某溫故

自娛，庶幾守拙，鱸魚美酒，非器不勝，自惟疎宕，甚乖世好，頗以獼猩

爲戒也。雅荷

注存，謹白近狀，專牋奉候，敬頌

勛綏，惟祈

朗管不具。

註釋

① 獻徵錄：「張賡爲山西右布政使，威惠並流，遠邇悅服。長子紀，徒步入太原，道經曲沃，曲沃令見其良苦，以一驢送之。既見，驚怪其跼蹐也，詰之，紀具以實對，公怒，痛垂紀，還令賜，仍正其罪。」

② 獻徵錄：「陳士啓爲山東布政司右參政，襟宇曠達，不察察以爲明，不肯急以責我，待下用其所能，舍其小過。」

③ 李學胤送羅大參詩：「分藩忽壯朝延色，開府深懸保障功。」

④ 毛詩商頌：「布政優優，百祿是適。」鄭氏箋：「優，和也。」

⑤ 註見第五一篇④。

⑥ 周禮地官遺人：「野鄙之委積，以待鬻旅。」鄭氏注：「鬻，族，過行寄止者。」

⑦ 馮令南唐書：「後主好音律，舊曲有念家山，王演爲念家山破，其聲焦絕，而其名不詳。」

⑧ 獻徵錄：「殷正爲參政，汝寧江西，聞其再來，多酒酒相慶，都憲三原王恕，素慎許可，至譽爲一道福星。」屬囉，猶云福星。

⑨ 漢書禮儀傳：「除青解纜。」纜，音極，苛也。

⑩ 史記循吏傳：「秦職循理，亦可以爲治，何必威嚴哉？」元史成遵傳：「遵奉使山東，淮北，察守令賢否，得循良者九人。」

⑪ 左傳成公二年：「文王猶用秦，況吾僭乎？」僭，等輩也。

⑫ 漢書循吏傳：「蕭曄以寬厚清靜爲天下師。」

⑬ 禮記中庸：「溫故而知新。」

⑭ 張衡西京賦：「退志究欲，窮歡極娛。」娛，樂也。

⑮ 吳均續齊諧記：「魏明帝遊洛水，水中有白鰲頭，美靜可憐，見人驟去，帝欲見之，終莫能產。侍中徐景山曰：鰲嗜鰓魚，乃不避。」

甲 通候類 五三 政民政廳廳長

死，畫板作兩生鱗魚，懸置岸上，於是靈顯飛逐，一時執得，帝其嘉之。」

⑤蜀志：「封侯有獸曰狻猊，能人語，又知人名，以酒餌之，狻猊死，初暫嘗之，得其味，甘而飲之，終見羸縷也。」黃庭堅詩：「愛酒醉

魂在，能言機事疎。」

⑥北史：「薛澄早孤，躬耕以養祖母，暇則覽文籍，疎宕不拘。」

⑦蘇軾詩：「顏張醉素兩禿翁，追逐世好稱書工。」世好，謂時俗所尚也。

五四 致財政廳廳長

某某先生勛鑒：度隰徹田，而

百事同遂，比要輸籍，則九等時申，敬維

歲成考上。

財阜功多，逖聽

廉聲，無任懽頌。某某上年歸里，於沅水上流勝地，築室種樹，兼課子姪，塵

心少定，斷雲依水，春禽嬉林，臥徐徐而覺于子，視前日人海，沈浮。

真不值雲房①一笑耳。令戚某君司權此間，頗勞過存②。其人甚廉幹，君子之僚③亦

強將之兵④也。某君云，前者因公詣省，

明公詢及鄙狀，且有優渥之言⑤。

謙光下逮，感悚無任。自審疎慵，久謝政事，山澤之癯⑥。未疾侵尋⑦，誠不堪當世用矣。

厚意殷勤，敬銘心曲⑧。專肅祇候，卽頌

勛綏，惟祈

澈照不具。

註釋

① 毛詩大雅：「度其隰原，徹田爲糧。」鄭箋：「度其隰與原田之多少，徹之使出稅以爲國用。」

② 禮記月令：「仲秋之月，易闕市，來商旅，納貨賄，以便民事，四方來集，遠鄉皆至，則財不匱，上無乏用，百事乃遂。」

甲 通候類 五四 致財政廳縣長

①周禮：「小司徒掌邦之教法，頒比法於六鄉之大夫，使各登其鄉之衆寡六畜車墾，辨其物，以歲時入其數，及三年大比，則受邦國之比粟。」鄭氏注：「比要其簿書。」

②文獻通考：「隋高祖魏流元之病，建輪箱之法，於是定其名，輕其數，使人知爲浮客，被強家收大半之賦，爲編比奉公，上糞輕減之征，浮客悉自歸於編戶。隋代戶口之盛由此。」

③山掌錄考：「唐六典凡天下之戶，量其實產，定爲九等，每三年縣司法定，州司覆之，然後法轉而申之於省。」

④唐書盧邁傳：「邁進給事中，俄會考課，固辭上考。」議成註見第一六篇。

⑤註見第一六篇。

⑥歐陽修：「豐磨爲河南右布政使，廉聲大著，風裁振於郡邑。一日行部，有一知縣，筐篋不山，問度至，大懼，以白金爲饋，饋之，隨數日，公謂之曰：汝燭不燃，盡出之，以易可然者，自今無復爾矣！知縣大恐，囊印綬而去。」

⑦傳燈錄：「曹溪在韶州府城東南。梁時，有天竺國僧，自西來，汎舶曹溪，深口，聞異音，曰：上流必有勝地，尋之，窺開山立石，乃云：百七十年，當遇無上法師，在此演法。今六祖慧能南華寺是也。」

⑧隋書閻昂賦：「覽止足之分，庶浮雲之志，築室種樹，逍遙自得。」

⑨張衡山中夜詩：「夜坐塵心定，長吟語力微。」

⑩鄭克己編釋詩：「新雲依水定，薄月帶沙流。」

⑪王褒洞簫賦：「孤鳴寡鶴，娛優乎其下兮，春禽羣嬉，翾翔乎其巔。」

⑫莊子應帝王：「其臥徐徐，其覺于于。」于于，自足之貌。

⑬蘇賦詩：「萬人如海一魚藏。」

⑭史記：「豈若卑論儂俗，與世沈浮，而取榮名哉！」

呂純陽集：「洞宮隱雲房，幽想一肆中。靈房自起執炊，洞窟入夢，僊極富貴，靈藥爲相，數十年，忽被屏詔，籍沒家資，分散妻孥，路直風雪，僕馬俱瘁，一身無聊，方與浩歎，恍然夢覺，靈房炊黃粱尙未熟也。靈房笑曰：子適來之夢，升沈萬態，榮悴多端，五十年間，一頓耳！」

⑤後漢書馮援傳：「援聞至河內，過存伯春。」

⑥蘇愈祭穀員外文：「留守無事，多君子德，罔有疑忌，維其辨遊。」

⑦蘇賦題連公壁：「俗語云：強將下無弱兵，真可信。吾觀安國運公之子孫，無一不好事者，此寺當日盛矣！」

⑧謝靈運雜魏太子鄴中集詩。阮瑀一首序：「管書記之任，故有俗諺之言。」

⑨漢書司馬相如傳：「列仙之儒，居山澤間，形容婁。」

⑩史記：「是歲，天子始巡郡縣，侵尋於泰山矣。」晉灼云：「侵尋，逐往之意。」蓋卽浸淫也。

⑪毛詩秦風：「亂我心曲。」孔氏傳：「心曲，委曲也。」

五五 致教育廳廳長

某某先生勛鑒：櫛栢^① 儲峙^② 瞻

省治之光華，桃李^③ 忻榮^④ 識人文^⑤ 之蔚起，敬維

教澤弘敷^⑥。

實事求是。引詹

霽采，曷馨桑榆。某某猥以輕材，權知劇邑。此地接鄰兩省，姦宄宿猾，內
外相結，素稱難治。前任三年，篤信刑德奇資，專任數術，罷癘不振，隱患益
深。公正士紳，避居謝事；其參與地方公務者，平正固不乏人，而狡黠者陰持兩端，
面譽背毀。去年侵蝕積穀一案，報紙宣傳，目爲大獄。某某於此案雖無直
接責任，失察之咎，則又奚辭！事發之日，固不能無變色於蜂虿，是以有呈請派
員查辦之舉，幸得水落石出，奸蠹亦從此稍稍革面矣。案結之後，求去再三，
終不獲命，昔賢任人，何可及也。至於任力，不敢不勉，特在

舊雨，謹白近況。比聞本省舉行中學會考，想見

賢勞九烈，有知，當亦感

先生之嘉惠，多士也。專此奉候，祇頌

勛綏，惟祈

朗照不具。

註釋

①司馬相如子虛賦：「其北則有陰林，其樹叢相靡。」

②後漢書章帝紀：「所經道上郡縣，無得設階時。」詳具也。

③註見第一九篇②。

④陶潛歸去來辭：「木欣欣以向榮。」欣亦作忻。史記管晏傳：「爲之執轡，所忻慕焉。」

⑤周易：「親乎人文，以化成天下。」

⑥尙書舜典：「汝作司徒，敬敷五教，在寬。」敷，布也。

⑦漢書河間獻王傳：「修學好古，實事求是。」言務得事實，每求真是也。

⑧莊子外物篇：「輕才詭說之徒。」檢量人物也。或曰：輕才，謂卑小之才也。

⑨通鑑漢獻帝建安八年：「以別部司馬黃蓋、韓當、周泰、呂蒙等守關縣令長。」胡三省注：「關，縣也，言其地當山越之要，最爲艱劇也。」

⑩尙書舜典：「寇賊姦宄，汝作士。」

⑪漢書王尊傳：「長安宿猾，東市實萬，城西萬章，實張禁，酒趙放。」

⑫淮南子兵略訓：「明於日月星辰之運，利德奇資之教。」資音該。奇，案，謂陰陽奇助之要。利德，謂五行生剋。史記龜策傳：「明于陰陽，審于刑德。」

甲 通候類 五五 教教育廳編長

⑤通鑑漢成帝河平三年：「太史令尹咸校教術。」湖三省注：「師古曰：教術，占卜之書。」

⑥史記平原君傳：「臣不幸有龍蠹之疾。」

⑦史記鄒陽傳：「何爲首鼠兩端？」

⑧莊子盜跖：「好面譽人者，亦好背而毀之。」

⑨後漢書桓帝紀：「若王侯吏民，有積穀者，一切或得十分之三。」三國志：「若財積穀，而有憂患之虞者，未之有也。」以地方公款，設穀儲倉，以備荒年，是積穀也。

⑩蘇軾夏侯太初論：「人能碎千金之璧，不能無失聲於破釜，能搏猛虎，不能無變色於蜂螫。」

⑪蘇軾後赤壁賦：「山高月小，水落石出。」後人謂事情終須顯白者，曰水落石出。東坡但當境寫物，別無所喻也。

⑫周易革卦：「大人虎變，……君子豹變，小人革面。」又：「小人革面，順以從君也。」孔穎達疏：「小人不能潤色立制，但順從而已。」

⑬說苑：「管子臧治單父，彈琴，身不下堂。巫馬期亦治單父，以星出，以星入，日夜不處，以身親之。而單父亦治。巫馬期問其故。管子曰：我之謂任人，子之謂任方。任方者勢，任人者佚。」韓詩外傳所引略同。

⑭註見第二五篇等。

⑮馮費雲仙雜記：「李固言未第時，行古柳下，聞有彈指聲。面言問之。應曰：香柳神九烈君也。用柳汁染子衣矣。科勢無疑，朱得盡袍，當以搗糕祀我。未幾，狀元及第。」

⑯賈誼用屈原文：「恭承嘉惠兮，敬申先生。」陸厥奉答內兄希叔詩：「嘉惠承帝子，飄飄奉王孫。」

五六 致建設廳廳長

某某先生勛鑒：務材訓農，勤則不匱。

厚生利用，政在養民。敬維

規弘建置。

續懋設施，翹首

英猷，傾心藻頌。某某自去秋話別，遙歸故里，有田一塵，有宅一區，所止雖陋，尚不至絕粒，如范史雲耳。學生十數人，來求補習文史，坐擁皋比，口不絕吟，手不停披，以爲非言不津，非學不傳，不自知其夸志多窮也。棟折榱崩，僑亦不免，亦不自知厥憤之深也。夫道貴從凡，隨時之宜，非不習聞也。慘痛至此，更誰從力疾效命乎！

明公仁政廉聲，一方表率，見說

勤勞之甚，固知憂患之深。山居寡味，竊願

自公退食，聊復相聞。幸甚幸甚。專肅馳候，祇頌

勛綏，惟希

亮鑒。

商權

各省建設廳職掌，大抵實業也，故篇首頌語，多就實業而言。

註釋

○左傳閔公二年：「務材，訓農，通商，惠工。」

○左傳宣公十二年：「民生在勤，勤則不敗。」

○尚書大禹謨：「德惟善政，政在養民，水火金木土穀，惟修，正德利用，厚生惟和。」

○唐書：「願得列戟故里。」

○漢書揚雄傳：「有田一廛，有宅一區。」

○後漢書獨行傳：「范丹，字史雲，桓帝時以爲裝華貴，不到官，賣卜於市，所止單陋，有時絕粒，聞里歌之曰：『甌中生鹽范史雲，釜中生魚范滂。」

④張敬曾生虎皮請易，聽從者甚衆，比見二程，深明易道，徹龜報講，故採子賢有勇，徹卑比三變至道之語，見宋史。

⑤韓愈進學解：「先生口不絕吟于六藝之文，手不停披于百家之編。」

⑥劉勰新論崇學：「道象之妙，非言不泮，津言之妙，非學不傳。」津，澗波待學之意也。

⑦汲冢周書：「夸志多竊，曰武。」蓋武者，誣法之一也。

⑧註見第二篇。

⑨列子湯問：「吳楚之國，有大木焉，其名爲檣，樹碧而冬生，實丹而味酸，食其皮汁，已厥憤之疾。」內經厥論：「陽氣衰於下，爲毒

厥，陰氣衰於下，爲熱厥。」厥者，逆也。下氣逆上，卒乍眩仆，弱者漸蘇，重者不起。陰陽之氣衰于內，故二厥由之而生。

⑩崔邈塗旨：「高樹靡陰，獨木不林，隨時之宜，道貴從凡。」

⑪抱朴子用刑：「是以灸刺慘痛而不可止者，以痊病也。」

⑫晉書：「巨輒力疾將兵，詣洛水浮橋。」

⑬史記：「此乃臣致命之秋也。」謂致命從事也。

⑭後漢書何武傳：「刺史古之方伯，方伯一方表率也。」

⑮尚書仲虺之誥：「縶弱攻昧，昧，闇也，冥也。」

⑯毛詩召南：「退食自公，委蛇委蛇。」

五七 致公安局局長

甲 通候類 五七 致公安局局長

某某先生勛鑒：憲市之令，則司隄。當官。巡市之威，則司稽。察禁。敬維

勛華日著，

景祐時申。引企

英猷，莫名馨頌。某某海外歸來，儵忽數月，始以馳驅塵俗之勞，久闕問

慰。

與居之帖，忝附舊知，定荷

涵宥。省會五方之民，雜居，寇賊姦宄，社鼠稷狐，最難治理。聞

明公蒞事之後，不軌不物，咸爲肅然。雖曰

先聲奪人，亦

廉公有威之效也。比以掃墓回里，兵燹之餘，流亡未集，田園寥落，心乎悵

矣。幸而護餼敦朴，風俗未移，不足爲亂階，斯亦地方之福，可以告慰者也。

專此祇候，敬頌

勛綬，惟希
荃照不宣。

商榷

此篇頌揚之器，亦可施於首都警察廳長，惟會字樣，當刪改耳。

註釋

①周禮地官司徒：「司廛掌憲市之禁令，禁其鬪鬪者，與其鬪鬪者，出入相檢犯者，以屬遊飲食于市者。」

②呂祖謙言：「當官之法有三，曰清、慎、勤。」當官猶云在官。

③周禮地官司徒：「司番掌巡市而察其犯禁者，與其不物者而撻之，掌執市之盜賊以徇，且刑之。」

④楚辭九歌：「儺而來兮忽而逝。」

⑤毛詩鄘風：「載驅載驅，歸唁衛侯。」

⑥孔叢圭北山移文：「焚芟製山毀荷衣，抗塵容而走俗狀。」

⑦沈括夢溪筆談：「唐世搜求前代靈蹟甚嚴，非帛喪問疾，容入內府，士大夫家所存，皆朝廷所不取者，所以流傳至今，皆問慰帖也。」宋帝詩：「曆李，厥子弟，不敢問慰帖。」

⑧李商隱寄彭城公啓：「慎安塵席，勉勵與居。」與居猶言起居。

⑨毛詩小雅：「僭始既猶。」周易解卦：「君子以救過宥罪。」滄容也，宥寬也。

甲 通候類 五七 致公安局局長

①匯書地理志：「臨黃海岱之間，一部會也，其中具五民云。」服虔曰：「土、農、商、工、賈也。」如淳曰：「游子樂安俗，不復歸，故有五方之民也。」

②註見第五五篇。

③說苑：「狐者，人之所攻也。鼠者，人之所懼也。未見穆狐見攻，社鼠見慮也。」

④左傳隱公五年：「君將納民於軌物者也，故講事以度軌量，謂之軌。取材以章物采，謂之物。不軌不物，謂之亂政。亂政亟行，所以敗也。」

⑤左傳昭公二十一年：「先人有奪人之心。」史記淮陰侯傳：「兵固有先聲而後實者。」

⑥清通禮：「歲季食及霜降節，拜掃塋墓，屆期素服詣墓，具酒饌及芟剪草木之器，周匝封樹，剪除荆草，是稱掃墓。」

⑦歐陽修寄李儋詩：「身多疾病思田里，邑有流亡斃俸錢。」

⑧白居易寄兄弟詩：「田園寥落千戈後，骨肉流離道路中。」

⑨毛詩小雅：「心乎愛矣，遐不謂矣。」皮日休傳買誼文：「浮沅波之滄漁兮，或採棹以夷猶，望靈均之沒所兮，覩其心之惻惻。」

惻，悲也，恨也。

⑩列子力命：「穆恆、稽露、隱優、淺許，四人相與遊於世。隱亦作謹，口吃也。恆，謹重貌。」

⑪班固東都賦：「痛乎風俗之移人也。」

五八 致行政督察專員

某某先生勛鑿昔者秦郡卅六，而置守之權尊；漢秩二千，而共治之心重。至于廉使條察，刺史露章，或秉鉞以宣威，或高車以表德。今之損益，固協時宜，卽論風裁，亦同往哲。敬維

儀徵鳳翼。

勛茂隼旗，景歧

英猷，曷勝馨頌。某某以鄉居患匪，移家負郭，日月不居，儵忽經歲，邑人強以地方公益相屬，義不容辭，勉矢恭敬。敝邑雖連年大穫，兵燹之餘，蓋藏已盡，幸免糜斃，而耗數固已甚矣。金鑰不完，則治安可慮，玉卮無當，則泄漏可知。預計明年青黃不接，必更爲敝，邑之深憂，雖相去數百里，民間隱患，當在使君洞鑒之中。前誦

大作，題則秋霖，心則冬日，纏繇豈弟，仁人之言，驟和一章，蚓曲固不

足以協

鳳律，亦微見地方之疾苦也。幸

明公垂覽焉。專啓祗候，虔頌

勳綏，諸惟

敬督不備。

商權

各省行政督察專員分區，大抵沿舊道制，撥行政舉劾之權，兼領保安司令，雖前清兵備，莫與京也。前代刺史觀察使職權，時隆時削，以今視昔，雖不及，削又有餘。其分區多者，管轄地域較小，事權仍大，猶得比之雄郡；損益之間，殆亦有因時制宜之意耶？特首須語，既未能確切比附，亦祇可不脫不粘耳。

註釋

①杜氏通典：「漢置侯國守，分天下為三十六郡。郡置守丞，尉各一人。漢景帝中元二年，更名郡守為太守，皆掌治民事，並監獄。」
除意：常以春行縣，秋冬遺無害吏按訊諸囚，平其罪法，論課殿最。」

②杜氏通典：「漢之太守，秩二千石。」

①漢書：「宣帝嘗稱曰：庶民所以安其田里，而無歎息愁恨之心者，政平訟理也，與我共治者，其惟良二千石乎！」

②合璧事類：「柳公綽爲鄆岳觀察使，至安州，刺史李暉以廢使禮事之。」

③常衮授李西華西觀察使制：「今以刺史條察列郡，西漢成式，厥惟舊儀。」

④杜氏通典：「漢武帝元封五年，乃置郡刺史。成帝綏和元年，以爲刺史位下大夫，而臨二千石，轉重不相準，乃更爲州牧，秩真二千石，號曰刺史，於要州以都督號領刺史，其權益重。隋罷郡，以州統縣，自是刺史之名存而職廢。唐武德元年，改太守爲刺史。」馬端臨文獻通考：「宋置諸州刺史，無定員，無職任。」王圜續文獻通考：「遼南而諸州，各有州刺史，與古之州牧刺史，大小頗異。」

⑤白居易六帖：「何武字君公爲揚州刺史，所舉奏二千石長吏，必先露章。」

⑥周禮：「若師有功則左執律，右秉鉞，以先愷樂獻於社。」

⑦漢書黃霸傳：「霸爲荊州刺史，三歲，宣帝下詔曰：制詔御史，其以賢良高第揚州刺史，關爲潁川太守，秩比二千石，賜車蓋，特高一尺，以章有德。」

⑧論語：「子曰：殷因於夏禮，所損益，可知也。周因於殷禮，所損益，可知也。其或繼周者，雖百世，可知也。」

⑨蘇軾志林：「東坡坦腹問諸婢，我此中何所有？初望曰：公一肚皮不合時宜。」

⑩後漢書李膺傳：「是時朝廷日亂，綱紀頽弛，膺獨持風裁，以聲名自高。」

⑪說苑辨物：「黃帝問天老曰：風儀何如？天老曰：延頸奮翼，五光備舉，光與八風，氣降時雨，此謂風儀。」

⑫半參詩：「車換新刺史，虎劍舊將軍。」

⑬史記蘇秦傳：「使吾有雒陽負郭田二頃，吾豈能佩六國相印乎？」

⑭孔融與曹公書：「歲月不居。」

⑮註見第五七篇。

⑤毛詩小雅：「維桑與梓，必恭必敬止。」

⑥禮記月令：「命百官，謹蓋藏。」謂府庫因倉等，所掩蓄藏之物也。

⑦禮記郊特牲：「恒豆之滫，水草之和氣也。」註：「天子朝事之豆，有昌本糜蕪。」

⑧毛詩大雅：「后稷不克，上帝不臨，耗斁下土，寧丁我躬。」

⑨黃庭外景經：「玉篋金鑰身完堅。」玉篋，齒，金鑰，舌，開口風舌，食母之氣，不修惡言，身保完全也。此云金鑰，謂鐵鑰也。

⑩韓非子外儲說：「堂谿公見昭侯曰：今有白玉之卮而無當，君渴將何以飲？君曰：以瓦卮。堂谿公曰：白玉之卮美，而君不以飲者，以其無當耶？君曰：然。堂谿公曰：爲人主而漏泄其羣臣之語，譬猶玉卮之無當。」

⑪司馬彪續漢書：「郭伋字細侯，拜并州刺史，行部至西河美稷，有小兒各騎竹馬迎伋拜。伋問曰：見何自遠來？對曰：隨使君到，喜故來迎。伋曰：苦詣兒，復送到郭外，問使君何日當還，伋謂從吏計日告之。」

⑫左傳：「趙衰冬日之日也，趙盾夏日之日也。」杜預注：「夏日可畏，冬日可愛。」

⑬淮南子主術訓：「纏絲猶云網緼。」

⑭註見第五二篇。

⑮孟子盡心：「仁言不如仁聲之入人深也。」

⑯崔豹古今注：「蚯蚓善長吟於地中，江東謂之歌女，或謂鳴吻。」段成式支諾舉記：「上都灑殿宅，戟門內一小槐樹，樹有穴，大如錢，每夜月變後，有蚓如巨臂，長一尺餘，白頸紅斑，領數百條如索，緣樹枝條，及曉，悉入穴，或時衆鳴，往往成曲。」

⑰毛詩：「鳳凰鳴矣，于彼高岡，梧桐生矣，于彼朝陽！」鳳律謂鳳鳴爲子律也。黃帝制十二律，以聽鳳凰之鳴，其雄鳴爲六律，雌鳴爲六呂，謂之律本也。

爲六呂，謂之律本也。

五九 致縣長

某某先生勛鑿：清水明鏡，不滓穢，於虛堂。

荆玉南金，無畏難於錯節，敬維

化行俗美。

政通人和，景跋

德暉，莫名馨頌。某某僑居海上，久歷歲時，每憶故園，如涉夢境。近來屢得邑

人書，盛道

明府，廉能彌用忻慰，惟是積穀學田，比年益絀，爲之慨然。向者一二執事，頗有乾沒之嫌，終得賢有司廉察申理，地方攸賴。東坡詩云：雨順風調百穀登，民不飢寒爲上瑞。本邑連年大穫，而詩人有子衿之歎，倉氏無積聚之資，此豈弟君子之深戚也！豈真以瑞爲實哉！以

明府之風裁整肅，今日地方之病，知必

洞見癥結，有以處分。某某越在羈旅，固無責守。可言誠懷敬恭之義，驟

陳直諒，惟冀

鑒原專啓奉候，祇頌

勛綏諸希

朗答不具。

註釋

○翰苑新書：「宋晦庵稱陳良翰行狀：公知溫州瑞安縣，或問公何術，公曰：清水明鏡，不可逃形，心澄亦猶是也。」

○世說：「司馬太傅嘗中夜坐，於時天月明淨，都無纖翳，太傅歎以為佳，謝景軍在座，答曰：意謂乃不如微雲點綴，太傅曰：癩居心不淨，乃復強欲滓穢太傅耶？」

○宋史：「陳良翰紹興五年進士第，知溫州瑞安縣，俗號強梗，吏治尚嚴，良翰獨撫以寬，僅租不下文符，但揭示名物，民競樂輸，認成得其情，或問何術，良翰曰：無術，但公此心，如虛堂懸鏡耳！」

○孫綽孔松園像贊：「君德既純固，基宇高遼，荆玉不及喻其溫，兩金未能方其厲。」

命註見第四八篇④。

⑤毛詩序：「廣德廣所及也。文王之遠，被于南國，美化行乎江漢之域。」張衡西京賦：「因天地以教化，兆人奉上教以成俗，化俗之本，有與推移。」蓋謂教化大行，風俗美厚也。

⑥范仲淹岳陽樓記：「政通人和，百廢俱興。」

⑦柳宗元詩：「憑寄遠鄉夢，殷勤入故園。」

⑧韓維華中雜記詩：「夢境覺來元一際，不勞唇齒語無生。」

⑨登都審舊傳：「關隴爲鷓竹令，有男子壯歲夜行於路，得遺裝，開視，有錦二十四匹，明早送詣吏，曰：『縣有明府君，犯此則慚。』太平御覽：「北齊郡茂除衛國令，時有繫囚二百，茂親自統鞠，數日，釋免者百餘人，歷年詞訟，不詣州者。魏州刺史元暉謂曰：『長史言衛國人不敢申訴者，畏明府耳。』蓋守令之稱明府，由來尙矣。」

⑩史記張湯傳：「始爲小吏乾沒，言接取貨利，沒爲已有，如水蒸涸也。」

⑪蘇軾荔枝歌：「我願天公憐赤子，莫生尤物爲瘡痍，兩風調百穀登，民不飢寒爲上瑞。」

⑫毛詩鄭風：「青青子衿，悠悠我心，縱我不往，子寧不嗣音？」詩序：「子衿，刺學校廢也，亂世則學校不修焉。」

⑬漢書：「孝文時，吏居官者，或長子孫，以官爲氏，倉氏、庫氏，則倉庫吏之後也。」

⑭禮記月令：「孟冬之月，命有司，穿窬竇，修困倉，謹蓋藏，務積聚。」

⑮註見第五二篇①。

⑯史記扁鵲傳：「以此視病，察見五藏癢結。」

⑰蘇仲卿妻詩：「處分適兄意，那得自任專。」處分，猶云處置。

⑱孟子公孫丑：「吾聞之也，有官守者，不得其職則去，有言責者，不得其言則去，我無官守，我無言責也。」

⑲毛詩小雅：「維桑與梓，必恭必敬止。」

甲 遊後類 五九 致縣長

●論語季氏：「友直、友諒、友多聞，益矣。」

六〇 致市長

某某先生勛鑒：司市之官，政刑有典，司徒之職，具體而微。敬維

弘襄治化。

善佐安馴。引企

英標，曷勝馨頌。某某宦遊於外，久違鄉黨。代馬依北風，越鳥巢南枝。喬木

故園，時勞夢寐。屢獲里人書，盛道

廉能。是以近悅遠來。戶口日益，學校農田，水利日起有功。固知

賢者之爲，誠有異乎庸庸也。今日爲政，但從平實二字着手，則布帛菽粟，皆教

養之大端，郵治之常軌。彼夫矯揉造作，花樣翻新，徒耗帑藏而已。何與

於民生。鄙人平生嗜好，敢云正味。竊見

先生設施，似有不約而同之心理，忻幸何如。山川悠遠，把晤未由，專啓奉候，祇頌
勛綏，惟希
朗照不備。

商榷

今日市長職務，謂周官司市所掌，雖充多矣。考地官司徒之職，職師均人，則土地也，師氏保氏，則教育也，廛人泉府，則財政也，司藏司稽，則公安也。故視周官司徒之職，具體而微也。

註釋

①周禮地官司徒：「司市掌市之治教政刑量度禁令，以次敘分地而經市。」陸德明釋文：「司市之官，以次敘二事分地而經之，而以經界其市，使各有處所，不相雜亂也。」

②周禮地官司徒：「乃立地官司徒，使帥其屬，而掌邦教，以佐王安擾邦國。」

③孟子公孫丑：「子夏、子游、子張，皆有聖人之一體，冉牛、閔子、顏淵，則具體而微。」具體而微，謂其有全體，但未廣大耳。

④莊子繕性：「及唐虞始爲天下與治化之流，滾淳散樸。」治化，謂政治化民也。

⑤周禮地官司徒安擾邦國疏：「秦天官教典，鄭注擾爲馴，以其司徒主教，教使馴順，馴亦是安之義也。」

⑥史記司馬相如傳：「吉日長繩久宦遊，不遑而來過我。」

①禮記曲禮：「故州閭鄉黨釋其學也。」

②古詩：「道路阻且長，會面安可知。胡馬依北風，越鳥巢南枝。」齊植朔風詩：「仰彼朔風，用勸魏都。願聘代馬，儻忽北徂。」

③毛詩周南：「南有喬水，喬，上埭也。」

④註見第五九篇。

⑤後漢書鄭顯傳：「陛下本文武之業，黷舜舜之道，播災延廢，變今天下。此誠臣願區區之意，夙夜夢寐，盡心所計，謹條敘前章，其旨趣。」

⑥周禮天官小宰：「一曰廉善，二曰廉能，三曰廉敬，四曰廉正，五曰廉法，六曰廉辨。」

⑦論語：「華公問政。子曰：『近者悅，遠者來。』」被其澤則悅，聞其風則來，然必近者悅而後遠者來也。

⑧董仲舒賢良策：「聖勉學問，則聞見博而知益明，張弛行道，則德日起而大有功。」

⑨左思魏都賦：「超百王之庸庸。」庸庸，凡庸無奇也。

⑩史記封禪書：「文王改制，爰周郵隆。」郵，至也。郵治，猶云至治。

⑪周易說卦：「坎為矯輮。」使曲者直為矯，使直者曲為輮。

⑫唐書柳公權傳：「公權在元和間，書法有名，劉禹錫稱為柳家新樣。」白居易詩：「連枝花樣繼羅襪。」

⑬後漢書鄭弘傳：「人食不足，而蓄藏金幣。」

⑭左傳宣公十二年：「民生在勤，勤則不匱。」

⑮莊子齊物：「民食芻豢，粟食食鷄，鯽蛆甘帶，鴟鴞嗜鼠，四者孰知正味？」

六一 致綏靖主任

某某先生勛鑒：授鉞膺藩，而指撫若定。

建牙。開府，則鎮撫雍容。瞻霽色於寒城。聽雄風於

大纛。敬維

望崇柱石。

勛在疆圻。引企

節樓。傾心藻頌。某某自前歲省垣話別，回里養疾，再歷暑寒。大浸之餘，室如懸磬。但食蛤蜊。不知許事。每聞田水聲。悠然天籟。如撫無弦。場圃作苦。氣喝汗滋。與三數牧豎笑語，野趣橫生。夙疾亦稍稍瘳矣。久不接城市中人。前日有學生來，爲言鄰寇日深。咄咄逼人。蝨處禪中。不覺相弔。節下股肱之任，列蕃具瞻。淵嘿之功，中樞所賴。願聞

展告之遠猷，^①少闡^②田間之愚惑。

雲磨在望，^③跂想无任。專啓祇候，敬頌

勛綬，惟希

亮督不莊。

註釋

① 唐德宗途張建封選德詩：「牧守寄所重，才賢生爲時。宣風自誰句，搜鏡傳蕃維。」

② 杜甫明妃村詩：「伯仲之間見伊呂，指擲若定失關關。」

③ 錢易兩部漸查：「近代通謂府庭爲公衙，字本作牙。詩曰：祈父，予王之爪牙。祈父司馬，肇武備，衆罔黜以爪牙自衛。故軍前大旗，謂之牙旗，出師則建牙。」白居易六帖：「建牙大任，分圖重寶。」

④ 韓翃留別孟都督詩：「平蕪盡色寒城下，美酒百壺爭勳把。」

⑤ 宋玉風賦：「清清泠泠，愈病析醒，發明耳目，寧體便人，此所謂大王之雄風也。」

⑥ 杜氏通典：「唐景雲二年四月，始以實按延闕爲涼州都督，充河西節度使，其後諸道，因同此號，得以軍事專殺，行則建節，府樹

六纛，外任之重，莫比焉。」集韻：「纛，軍中大旗也。」

⑦ 唐書百官志：「節度使入境，州縣築節樓，迎以鼓角。」

⑧ 註見第三〇篇。

④左傳僖公二十六年：「齊侯曰：室如懸磬，野無青草，何恃而不恐？」

⑤南史王融傳：「沈昭略不識融，曰：是何年少？融曰：僕出於拔桑，入於陽谷，何人不知，而猶此問？昭略曰：不知許事，且食蛤蜊。」

⑥馮贛靈仙雜記：「潮陽常聞田水漲，久之，嘆曰：禾稻已秀，翠色染人，時剖胸襟，一洗荆棘，此水適吾胸丈人矣！」

⑦莊子齊物論：「女聞人頽，而未聞地頽，而未聞天頽矣！」

⑧昭明太子陶潛傳：「淵明不解音律，而蓄無絃琴一張，每酒適，輒撫弄以寄其意。」

⑨毛詩幽風：「九月築場圃。」周禮地官：「場人掌國之場圃，而樹之果疏。」

⑩楊柳經孫會宗書：「臣之得罪，已三年矣！田家作苦，歲時伏臘，烹羊炮羔，斗酒自勞。」

⑪杜甫舊詩：「氣喘腸胃融，汗流衣袷汗，苦衰尤拙計，失望築場圃。」

⑫尚書說命：「若藥弗瞑眩，厥疾弗瘳。」瘳，愈也。

⑬左傳僖公十五年：「晉侯謂慶鄭曰：寇深矣，若之何？」

⑭法書要錄：「王羲字伯，善書行，子敬每會脩書，云：嘔吐道人。」

⑮晉書阮籍傳：「籍嘗大人先生傳曰：獨不見羣蟲之虛釋中，逃乎深絃，匿乎壤築，自以爲吉光也。行不敢離縫際，動不敢出繩福，自以爲得繩墨也。然炎丘火流，焦邑灑郊，殫虛窟中，而不能出也。君子之處域內，何異夫蠶之處繭中乎？」

⑯淮南子說林訓：「大庖既成，燕雀相賀，湯沐既具，糜蠶相用。」

⑰王儉褚淵碑文：「寵冠列蕃，越款邦教。」蕃，藩同。

⑱毛詩小雅：「赫赫師尹，民具謂嘏。」

⑲陸機漢高祖功臣頌：「平陽樂道，在稷則題，爰瀟爟，有此武功。」

⑳毛詩大雅：「許謀定命，遠猷辰告。」辰，時也。

甲 通候類 六一 致綬靖主任

◎後漢書班固傳：「厥有氏號，詔天圓譯者。」闕也，闕也。

六二 致勦匪總司令或總指揮

某某先生勳鑒：總戎戡亂，威信著於兼圻。

保大定功，勳庸茂乎當世。

整齊，則君然莫尙。

恢廓，則公瑾無加。敬維

料敵制勝。

邁德振民。景歧

壯猷，無任馨頌。某某去冬奉命督察此區，吏事則水旱之餘，罷弊已甚。防務

則兵燹之後，罅漏尤多，協恭拊循，漸臻安定，而杼柚已空，公私竭蹶。本

區各縣學校、水利、工廠、交通各種事業，已廢者莫興，見存者難繼，且夕籌思，心乎

海矣。猶幸本年雨暘時若，各縣秋穫大半可期。周頌曰：綏萬邦，婁豐年。但得倉廩充實，則民裕而邦綏矣。昔歲

節下部曲，銜枚過境，盜門宇，塵芥不侵，至今地方人士猶謂

召伯所憩，引爲美談，是則此邦近事，想亦

賢者之所樂聞乎。專箋奉候，虔頌

勛綏，惟祈

激督不莊。

註釋

○杜甫諸將詩：「殊勳實爲大司馬，誰或傳播待中詔。」尚書西伯戡黎，孔氏傳：「戡，勝也。」

○後漢書郭伋傳：「招降山賊，餘黨聞其威信，不期俱降。」

○左傳昭公二十一年：「天子之地一圻。」圻，界也。千里爲圻。隋代總督，多兼轄兩省或三省，故謂兼圻。現制，勸匪總司令或總指揮，皆轄區域，大抵兼兩省以上，故亦可用兼圻字樣也。

○左傳宣公十二年：「楚子曰：夫武，禁暴，戢兵，保大，定功，安民，和衆，豐財者也。」

甲 通候類 六二 致勸匪總司令或總指揮

⑥後漢書彭傳：「彭字君然，隸陽人，祖附更始，後從光武平河北。……持軍整齊，欲避無犯。」

⑦三國志周瑜傳：「瑜字公瑾，舒人，有文武籌略，性度恢廓。程普以年長，數凌侮之，瑜終不與競，普後自敬服。」

⑧揚雄趙充國傳：「充國守節，屢奏封章，料敵制勝，威謀靡亢。」

⑨陸機漢高祖功臣錄：「拔奇夷難，邁德提兵，體國垂制，上穆下親。」

⑩周禮秋官大司寇以國土聚教罷民疏：「罷，謂困極罷弊。」

⑪韓愈進學解：「補苴罅漏，張皇幽渺。」

⑫尚書皋陶謨：「同寅協恭，和衷哉。」

⑬漢書蕭何傳：「拊循勉百姓。」拊循，慰安也。

⑭毛詩小雅：「大東小東，杼柚其空。」杼柚，織具也。杼受經，柚受緯。

⑮尚書洪範：「曰雨曰暘。……曰肅時寒若，曰乂時暘若。」孔氏傳：「雨以潤物，暘以乾物。」

⑯毛詩周頌綏萬邦靈應年箋：「綏，安也。靈，吸也。」

⑰漢書李廣傳：「廣行無部曲行陳。」續漢書百官志：「將軍領軍皆有部曲。」

⑱歐陽僧敏聲賦：「又如赴敵之兵，銜枚疾走，不聞號令，但聞人馬之行聲。」

⑲宋史岳飛傳：「飛征羣盜，追虜虜，託宿慶市，質明，爲主人汎屠門宇，洗滌益益而去。郡守供饋饒別於郊，師行將絕，謂未爲通，問大將軍何在，殿者云：「已雜僞裨去矣，其殿廟如此。」

⑳毛詩召南：「湛湛甘棠，勿剪勿敗，召伯所憩。」

六三 致軍長或師長

某某先生勛鑒：風雷氣奮，固知盪寇之功。

守禦壁堅，從識將軍之略。

勛庸以勒金石。

精銳以靜塵氛。敬維

譽昭戎肅。

績茂師貞。景跋

英暉，無任藻頌。去冬都門話別，勞燕分飛。某某馳回差次，歲聿云暮矣。比得
敵族公函云，某君辦理民團，獲罪一二人，橫爲軍詞所陷。拘繫本邑駐軍某團
本部，因歷舉某君平日行事，質直認真，尙無大過，囑爲轉懇釋放，抑或提訊，以期
水落石出等語。敵邑公益事業，某某向未過問，某君雖是族人，並無深交，惟知其

人不失爲鄉黨自好^①之士。辦團旣屬公舉，負責亦非一人，若以平日營求^②不遂，即便吹毛求疵^③，危言呈控，擠人廁牖^④，良足嗟歎！今日地方抗弊^⑤，幾成通病，敵邑何獨不然。質直認真，皆足府怨^⑥。某君之繫，或亦由此。某某久忝外役^⑦，不知茲事底裏^⑧，聞敵邑士紳暨族人，已經分別逕呈，想蒙垂察，某君應付才短，止謗^⑨，未能咎亦相若。

先生兼司警備，法紀嚴明，願得

平亭^⑩，豈惟某君度屣^⑪，抑亦地方之幸福也。專肅奉候，敬頌

勳綏，惟祈

朗照不宣。

註釋

① 冊府元龜：「張遼爲蓋將軍，從征袁術於柳城，卒遇敵，遂勦太臚，戰氣甚奮，太臚壯之，自以所持鐵授遼，遂擊大破之。太臚輸諸將功，曰：『登山履峻險，以取闕成，蓋遼功也。』」

①後漢書：「陳俊爲強弩將軍，光武與五鼓驥於安次，五鼓退入滎陽。俊言於光武曰：宜令輕騎出賊前，使百姓各自堅守壁，以絕其食，可不戰而殄也。光武然之，賊至無所得，遂散敗。軍還，光武謂俊曰：困此寇者，將軍策也。」

②李商隱送戶部李郎中充昭義攻討詩：「早勒勳庸灑石上，符光綸綬漢廷中。」又韓偓詩：「愈拜恭首蹈且舞，金石刻畫巨龍爲。」

③杜甫觀安西兵過赴關中待命詩：「四鎮富精銳，推鋒皆絕倫，漫聞獻士卒，足以靜風塵。」

④晉書陶侃傳：「戎政齊肅，士卒無私。」

⑤周易師卦：「師貞，丈人吉，无咎。彖曰：師，衆也。貞，正也。能以衆正，可以王矣！」

⑥古樂府：「東飛伯勞西飛燕，黃姑織女時相見。」

⑦毛詩唐風：「蟋蟀在堂，歲聿其莫。」莫，暮也。

⑧後漢書鄧騭傳：「朱龍上疏，追訟騭曰：伏惟和熹皇后聖善之德，爲漢文母，兄弟忠孝，同心愛國，當享積善應祿之福，積爲宮人，單詞所陷。」

⑨孟子：「鄉黨自好者不爲。」

⑩北史柳惲傳：「衣不過適體，食不過充饑，孜孜營求，徒勞思慮耳。」

⑪漢書十三王傳：「今或無罪，爲臣下所侵辱，有司吹毛求疵，」疵，病也。

⑫史記石室神農圖註：「呂謂曰：鑿器也，鑿惡之穴也。」

⑬史記平準書：「中外騷擾而相奉，百姓抗弊而巧法。」抗弊，頑戾也。

⑭左傳：「吾不爲怨府。」

⑮盧湛上劉琨書：「事與願違，當悉外役，遂去左右，取迹府朝。」

甲 通候類 六三 致軍長或師長

②後漢書龐參傳：「口陳肝膽，自以底裏上露，長無顧介。」

③三國志汪瓘傳：「救寒莫如重裘，止謗莫如自修。」

④漢書酷吏傳：「張湯平亭疑法。」亭，平也，均也。

⑤玉燭寶典：「元日至晦日爲醮食，度水，士女悉灑髮，將酒漿於水，謂之度厄。」度厄，猶云解厄。

六四 致領軍將校

某某先生勛鑒：揚兵擣壘，羣知蕩寇之勳。

和衆安民，咸頌貞師之吉。敬維

驂騑開道。

鵬鷲乘時，翹企

英標，無任藻頌。某某乃以菲薄，忝攝縣政，懷物情之未洽，慨時事之多艱。

綆短汲深，常懷惕厲。懷崩棟折，彌用憂危。上年邂逅

牙旗，飲聞

偉論，欽遲。

心呂，尤佩。

蓋籌列御寇云：有大壑焉，實惟無底之谷，其下無底，名曰歸墟。蓋長鯨之所窟，

毒龍之所宅也。凶逆滔天，吞噬無饜，誠如

尊信，非有沈舟破釜之決心，斬蛟屠龍之勇氣，不足以挽劫運而拯滅亡。

每味斯言，神爲之王，時日害喪，固知

先生之摩厲以須也。專此奉候，祇頌

勛綏，惟希

激答。

商權

是篇爲應酬普通現役軍官而擬，施於師旅團長均可。

註釋

甲 通候類 六四 致領軍將校

○唐書郭子儀傳：「子儀討史思明，盡揚兵，夜擣賊，賊不得息，賊忿老，乃與光弼等擊賊嘉山，斬首四萬級，獲人馬萬計。」

○李商隱舊將軍詩：「雲裏高懸正紛紛，誰定當時蕩寇勳。」

◎註見第六二篇◎

◎註見第六三篇◎

◎杜甫贈鮮于京兆詩：「驛國別道路，驛驛塵風塵。」

◎杜甫送郭中丞詩：「鸚鵡乘時去，驛驛願主鳴。」

◎論語：「非飲食而致孝乎鬼神。」何晏註：「非，薄也。」

◎南史張率傳：「瘴東南物望，朕夙昔所聞。」物望，即民望，物情，猶曰民情。

◎尚書大禹謨：「好生之德，洽于民心。」

◎古今樂錄：「時運多艱，言宣皇帝討吳，有征無戰也。」

◎莊子至樂：「綆短不可汲深。」言才小任重也。

◎周易乾卦：「九三，君子終日乾乾，夕惕若厲，无咎。」

◎註見第一篇◎

◎毛詩鄭風：「邂逅相遇，適我願兮。」

◎李商隱重有感詩：「玉帳牙旗得上遊，安危須共主君憂。」

◎註見第三九篇◎

◎念就緒注：「太岳爲萬心岳之臣，故封岳侯，以尊身有普岳骨也。」

◎文見列子湯問篇。

⑤洛陽伽藍記：「西方不可依山甚寒，冬夏積雪，山中有池，毒龍居之。昔有商人，止宿池側，值龍怒，兇殺商人。」智度論：「菩薩本身，曾作大力毒龍，若衆生在前，身力弱者，眼視便死。身力強者，氣往而死。是龍一日受戒而睡，形狀如蛇，獵者以刀割其皮，爲持戒故，一心受割，諸小蟲來食其身，爲持戒故，不復敢動，身乾命終，卽生第二忉利天上，爾時毒龍，釋迦文佛是也。」

⑥尙書堯典：「濬濬滔天。」

⑦史記項羽本紀：「羽殺鉅鹿，悉引兵渡河，皆沉船，破釜，燒廬舍，持三日糧，以示士卒必死，無一還心。」

⑧水經注：「滎塞子羽齋壁渡河，波起，兩蛟夾舟。子羽曰：吾可以義求，不可以威劫，操劍斬蛟。」

⑨莊子：「朱泚泚學屠龍於支離益，殫千金之家，三年技成，而無所用其巧。」

⑩莊子養生主：「神雖王，不善也。」王，盛也。

⑪尙書湯誓：「時日害喪，予及女偕亡。」害，何也。

⑫左傳昭公十二年：「子產曰：靡厲以須，王出，吾刃將斬矣！」莊氏注：「以已噓鋒刃，欲自靡厲，以斬王之淫慝。」靡厲，通用。須，待也。

六五 致駐外大使或公使

某某先生勛鑒英蕩。奉使以國家之利爲先，原隰皇華，咨禮義之宜爲度。

敬維

甲 通接類 六五 致駐外大使或公使

張旌^①亮節^②

致館^③來儀^④遙想^⑤

風標^⑥曷勝摛揆^⑦某某陳力^⑧中樞媿無埤補^⑨九垓汗漫^⑩久矣相期世故

紛紜縮頸^⑪不得日遷月化^⑫坐此因循今日視

先生真神仙中人^⑬也時事更不堪問矣爲之奈何報紙記

先生在華僑歡迎會席上演說懇切詳明義形于色^⑭中外聳然今日局勢固非

張脈僨興^⑮外彊中乾所能有濟亦非忍辱含垢^⑯勁氣內涵所能了事蝮蛇蠱

手壯士斷腕^⑰誠如

偉論非有十分決心不足起死回生也聞有請假回國之意邇日

使星^⑱與歸邪^⑲並耀翹瞻天際曷罄欽遲專肅馳候敬頌

勛綏諸惟

朗照不備

註釋

○註見第九篇。

○公羊傳莊公十九年：「聘禮大夫受命不受辭，出境，有可以安社稷利國家者，則專之可也。」何休註：「外事不案辭，不豫設，故三不受辭也。」

○毛詩小雅：「皇皇者華，于彼原隰。」毛傳：「皇皇，猶煌煌也。高平曰原。下濕曰隰。忠臣奉使，能光君命，無遠無近，如華不以高下易其色。」

○毛詩小雅皇皇者華：「韋韋毳毳，周爰咨度。」傳：「咨，禮義所宜為度。」

○儀禮聘禮：「使者及境，張旛，誓，乃謁關人。」賈公彥疏：「及境，張旛，明所聘之事在此國。故張旛以表其事。」禮，旌旗屬也。庚信將命至鄆詩：「大國脩聘禮，親鄰自此敦。張旛事原隰，負辰報成言。」

○註見第九篇。

○左傳昭公二年：「叔弓聘于晉，報宣子也。晉侯使鄭勞。辭曰：寡君使母來繼舊好。聞曰：女無敢為，實命於執事，隨邑弘矣。敢辱郊使，請辭致館。辭曰：寡君命下臣來繼舊好，好合使成，臣之祿也，敢辱大館。」

○尚書益稷：「霜潔九成，鳳皇來儀。」

○北史魏彭城王勰傳：「風標才華，實足軌範。」

○班固答賓戲：「馳辯如濤波，摘露如春華。」韋昭曰：「摘，布也。左思蜀都賦：「幽思梅道德，摘露挾天庭。」摘，露也。舒也。光矣也。摘，謂摘露其光采也。」

○論語季氏：「周任有言曰：陳方就列，不能者止。」

甲 通候類 六五 致駐外大使或公使

①毛詩鄘風：「政事一埽益我。」埽，厚也，增也。

②淮南子：「若土曰：吾與汗漫期於九孩之上，不可以久駐，乃舉臂而歛身，遂入雲中。」

③晉書佛圖澄傳：「石季龍造太武殿，初成，圖畫自古賢聖忠臣孝子烈士貞女，旬餘，頭悉縊入屑中，惟冠髮髻露微出。」蘇賦江

上值雪致歐陽體詩：「縮頸夜眠如凍鷄，雪來唯有客先知。」

④楞嚴經：「豈惟年變亦變月化，何直月化，兼又日遷，念念之間，不得常住，故知我身，終從變滅。」

⑤晉書：「王恭嘗披鶴氅，涉雪而行。孟昶見之曰：此真神仙中人！」

⑥公羊傳桓公二年：「孔父正色而立於朝，則人莫敢過而致難於其君者，孔父可謂義形於色矣！」

⑦左傳僖公十五年：「亂氣發憤，陰血周作，張脈憤興，外彘中乾。」杜預注：「氣發憤於外，則血脈必周身而作，隨氣張動，外雖有

張形，而內實乾竭。」

⑧李陵答蘇武書：「故每橫臂忍辱，輒復苟活。」左傳宣公十五年：「國君含垢，天之遺也。」

⑨漢書田儼傳：「腹竊手，則斬手，竊足，則斬足。」又嚴助傳：「南方暑濕，近夏，瘴熱暴發，小居，腹蛇蠱生。」蠱，螫也。

⑩後漢書李鄴傳：「和帝分遣使者，徵服單行，各至州縣，覈探風謠。使者二人，當到益部，投李鄴候舍。鄴問曰：二君營京師時，寧知

朝廷遣二使耶？二人問：何以知之？鄴云：有二使星，向益州分野，故知之耳。」

⑪漢書天文志：「如星非星，如雲非雲，名曰歸邪，歸邪出，必有歸國者。」邪音馳。

六六 致駐外總領事或領事

某某先生勛鑒：赤子如保。

仁宇。覆乎僑民；白蓋。同儀賓筵。亞于使節。

錄風俗物宜。而入告。

縮懋遷。經濟以勞來。敬維

勛華日著。

景祐時申。

嚳采。遙詹頌忱曷既。某某自去歲暮春回國。經營墾殖。羸具規模。奈時局日趨惡化。少數股東。意存觀望。不無沮格耳。平生志略。思以游民闢曠土。豈惟興利。亦遏亂源。世變紛乘。終虛此願。往在南洋羣島。以一手一足。作苦二十年。稍致薄產。因而生活者數十萬人。今日事難於昔。氣銳於前。成敗利鈍。誠不可逆覩。而騎虎之勢。欲罷不能。惟有奮鬪到底耳。邇者

先生重蒞新加坡。僑胞鼓舞。可想而知。某某亦舊部也。下風遜聽。懽頌同深。專

此馳候，祇頌

勛綬，惟希

激督不備。

商權

公使爲一國政治上之代表，領事則計謀僑民之利益，而爲國家經濟上之機關也。故篇首頌詞，不可迴避；惟使領在交際上，原屬一致，不過對方待遇不同耳。所謂白蓋黃筵，皆指交際言也。

註釋

○尚書康誥：「若保赤子，惟長其康父。」孔穎達疏：「子生赤色，故言赤子。」

○沈約文：「惟聖仁字，實化滑融。」

○司馬彪續漢書：「大使車五乘，駕駟，赤帷……小使車赤轡，白蓋。」

○毛詩小雅：「賓之初筵，溫溫其恭，其未醉止，威儀反反。」毛傳：「反反，言重慎也。」

○孔氏六帖：「唐洪饒使西突厥，册拜可汗，會用兵，道頓三年不得歸，饒奏錄所過諸國風俗物產，比還，太宗問外國事，即上其書。」

○尚書益稷：「懋遷有無化居。」孔傳：「懋勉其民，徙有於無，交易變化其所居積之貨也。」

○註見第一七篇②。

◎西京雜記：「雲三色爲活。」

◎三國志：「勸墾殖之勳，爲備乏之教。」

◎史記：「持兩端以觀望。」

◎唐書張說傳：「宇文融獻策，括天下游戶，及籍外田，置十道勸農使，分行郡縣，說長其擾，數沮格之。」

◎後漢書班超傳：「超爲官備警，投筆歎曰：大丈夫無他志略，猶當效傅介子、張謫，立功異域，以取封侯，安能久事筆研間乎！」

◎禮記王制：「無曠土，無游民。」

◎禮記：「后稷天下之爲烈也，豈一手一足哉！」

◎註凡第六一篇。

◎諸葛亮後出師表：「臣鞠躬盡瘁，死而後已，至子成敗利鈍，非臣之明，所能逆觀也。」

◎隋書獨孤皇后傳：「后使人譖高祖曰：大業已然，騎虎之勢，必不得下，嬖之。」

◎論語：「欲罷不能。」

◎尚書大傳：「鑿乎鼓之，斡乎舞之。」

六七 致校長或教授

某某先生大鑒：化民成俗，固知教學爲先。○ 虛往實歸。○ 自是人倫之表。○ 敬維

智泉 ○ 疾學 ○

甲 通候類 六七 致校長或教授

主善^① 道尊^② 景跋^③

清暉，無任私淑。舍弟書來，盛稱

教化之美，深耕時耔，勤以朝夕。高鄉老叟之談種藝^④，言雖粗劣^⑤，亦培植人材之至理也。往者狡險之士，固結黨援，嘗以青年爲芻狗^⑥，土苴^⑦矣。踐履之不足，又從而戕賊之。流毒^⑧所被，知

賢者之必能廓清^⑨也。甚頌甚休，疆寇披猖^⑩，遂至於此。日有百里之蹙^⑪，時無九服之歸^⑫。嗟夫，板蕩之疾威^⑬，實是神人所同嫉^⑭。祇懷

亮節，必更

憂勞。某某近居海上，勉事撰述，日月逾邁^⑮，志業無成。視

先生之大叩大鳴^⑯，有體有用，不可幾已。一別數年，曷勝懸系。專箋奉候，敬頌

道綏，惟希

激警不備。

註釋

○禮記學記：「君子如欲化民成俗，其必由道乎！玉不琢，不成器。人不學，不知道。故古之王者建國，君民教學為先。」

○莊子德充符：「常季問於仲尼曰：『王骀，兀者也，從之游者，與夫子中分魯，立不教，坐不議，虛而往，實而歸，固有不言之教，無形而心成者耶？何人也？』仲尼曰：『夫子，聖人也。丘直後而未往耳，丘將以為師，而況不若丘者乎！奚假魯國！丘將引天下而與從之。』」

○世說新語：「太傅東海王越，鎮許昌，以王安期為記室參軍，雅相欽重，較世子皓曰：『……王參軍人倫之表，汝其師之。』」

○韓詩外傳：「智如泉源，行可以為儀表者，人之師也。」

○呂覽勸學：「聖人生於疾學，不疾學而能為魁士名人者，未之嘗有也。疾學在於尊師，師尊，則言信矣。道論矣。」

○尚書咸有一德：「德無常師，主善為師。」

○禮記：「凡學之道，嚴師為難，師嚴，然後道尊，道尊，然後民知敬學。」

○柳宗元龍城錄：「余南遷，度高鄉，道逢老叟，與年少於路坎，講明種藝，其言深耕滋種，時新時紓，卻牛馬之踐履，去螟蝗之殺害，動以朝夕，滋之蠶土，而有秋矣！余感此言，將書諸紳，實於治民者，以為至言也。」

○荀子正名：「故愚者之言，勃然而粗。」荀音忽，無知之貌。

○老子：「天地不仁，以萬物為芻狗。聖人不仁，以百姓為芻狗。」芻狗，喪家送葬之物，常用而需之，時過而棄之。

○莊子讓王：「其土直以治天下。」土直，蓋蕞草也。

○尚書：「有夏桀弗克若天，流毒下國。」

○陸贄文：「一鼓而兇徒折北，再駕而京邑廓清。」廓清，猶謂肅清。

○集韻：「波，猶，飛，鷗也。」亦作披猖。

甲 西 候 類 六 七 致 校 長 或 教 授

珠代交際尺牘大全 上編

◎毛詩大雅：「今也日蹙國百里。」

◎李商隱有盛詩：「九服歸元化，三靈叶眷圖。」九服，侯、甸、男、采、衛、蠻、夷、鎮、藩也。見周禮。

◎毛詩大雅：「上帝板板，下民卒瘁。」又：「蕩蕩上帝，下民之辟，疾威上帝，其命多辟。」

◎陸賈王爲徐敬陳討武氏檄：「神人之所同嫉，天地之所不容。」

◎尚書泰誓：「日月逾邁。」

◎禮記：「善待問者如撞鐘，叩之以小者則小鳴，叩之以大者則大鳴，待其從容，然後盡其聲，不善答問者反此。」

六八 上業師

夫子大人函丈，元覽淳和，師資固由於主善，彥真沈靜，道德惟重夫可成。

音旨親承。

泉源在潤，溯懷

陶冶，義篤在三，伏想

興居，定多佳勝，某棲遲黃嶽，遂乃期年，夙疾幸瘳，體氣未復，醫囑靜攝，回滬

尚須時日也。前過安慶，喜見諸郎人物，豈惟芝蘭玉樹，直是九色鳳雛。

小兒與之同校，譬如金銀之殺銅錫，賢不肖相去遠矣。惟通家之誼，奕葉相輝，忻榮曷既聞。大世兄本學期畢業後，意欲東渡，以求深造，蘭根白芷，豈可漸之溺中。愚意不若西行爲愈，費用稍巨，收穫較豐也。時艱至此，有佳子弟力學，亦足以申眉頭。吾

師明德，卷而未舒，後有達人，固其宜也。某某近在山中，仍事撰述，編有國際政治攬要一書，正在斟酌之中，一俟脫稿，當即專足恭呈。誨正也。肅賤奉候，虔頌

道綏，伏維

垂督。

商榷

凡畢業所受，皆謂業師，是篇之擬，蓋以師弟之間，道德學術，講習之日較深者用之。

註釋

甲通候類 六八 上業師

○魏收後魏書：「梁越字元發，新輿人，少而好學，博綜經傳，無所不通，性淳和篤信，言行無撓，魏初，為禮經博士。」

◎註見第六七篇。

◎崔鴻前燕錄：「劉震字彥真，平原人，經學博通，為世純儒，非禮不動，慕容廆重其德學，使太子晃師事之。」

◎禮記文王世子：「樂正司業，父師司成，一有元良，萬國以貞。」鄭氏注：「司，主也。」孔穎達疏：「成，謂成就其德行。」

◎晉太傅同馬越與阮瞻書：「學之所入者淺，體之所安者深，諷誦遺言，不知親承音旨，小兒所無令淑之質，不聞道德之風，望諸君時以閒暇，用旋誨接。」

◎註見第六七篇。

◎蔡邕陳仲弓碑序：「仁愛溫柔，足以孕育羣生，廣大寬容，足以包覆無方，剛毅強固，足以威暴矯邪，正身體化，足以陶治士心。」

◎崔鴻後燕錄：「初姚泓之為太子，受經於太學博士淳于岐，岐在家，泓以師者，人之表範，傳先聖之訓，加在三之義，不可以不重，親詣音病，拜于牀下。」國語：「民生於三，事之如一，父生之，師教之，君食之。」

◎毛詩陳風：「衡門之下，可以棲遲。」

◎晉書劉琨傳：「殷好臧否人物，王公貴人，望風懼之。」北夢瑣言：「唐末，朝士中有人物者，時號玉筍班。」前者言一般人士，後者言秀美也。

◎晉書謝安傳：「安嘗戒約子姪，因曰：子弟亦何預人事，而正欲使其佳？諸人莫有言者，玄答曰：譬如芝蘭玉樹，欲使其生於庭階耳！」

◎郭憲別國洞冥記：「建元二年，武帝親騰光臺，以望四遠，於臺上持碧玉之盤，吹霜條之鏡，唱來雲依日之曲，方朔再拜於帝前曰：臣東遊萬林之野，獲九色風羅，西過洞經，得治淵虬子。」

◎漢書食貨志：「錯作錢布，皆用銅，故以連錫。」說文：「般，相雜錯也。」

①漢書董仲舒傳：「賢不肯湛滯。」

②曹植王仲宣誄：「伊君顯兮，奕葉佐時，入管機密，朝政以治。」

③孟子：「君子深造之以道，欲其自得之也。」深造，謂達於深微之域也。

④荀子勸學：「闢根與白芷，漸之滫中。」滫，澆也。

⑤南史王玄謨傳：「聽啓學武，具陳本末，帝答曰：七十老公，反欲何求？聊復爲笑，愆足以申痾眉頭耳！玄謨性嚴，未嘗妄笑，時人言玄謨眉頭未曾申，故以助爲戲。」

⑥左傳昭公七年：「臧孫紇有言曰：聖人有明德者，若不當世，其後必有達人。」

⑦陳琳大荒賦：「雖遊目於西極兮，大道卷而未舒，仍皇靈之彼揚兮，爰稽余之所求。」

六九 致報館主筆

某某先生大鑒：經綸世務，盡達民心。

論議指陳，四方風動。敬維

卮言日出。

大道時中，天下之人，式瞻

甲 通候類 六九 致報館主筆

英氣。昔徐幹中論。長統昌言。既匡世而牖民。亦風行而帥儂。今茲
偉業，殆庶幾乎。景跋

高標，曷勝嚮往。下走海外歸來，儵忽經歲，嚴親衰病侵尋，不忍再違膝下。
晦迹里門，從事撰述，亦頗自適。鄉先輩某君，久主上海某報，近亦謝事歸里，其人
冲澹安素，禪悅更深，每與清談，怡然動色。夫味厚者毒久，色銳者盲
目，平易無奇，可與久處，亦猶

先生平日持論，不詭不激，宣導輿情，而納之軌物也。國難至此，普天痛憤，
邇日必多

震聳發聵之文，願

示一二，以作鄉人之氣，幸甚。專此奉候，祇頌

著祺，惟希

激答。

註釋

①論語序解正義：「論者，給也……以此書可經給世務，故曰論。」

②文中子問易：「雖其盡天下之心乎！」

③尚書：「四方風動。」言如風鼓動，莫不靡然。

④莊子齊音：「厄言日出。」郭象註：「厄，酒器，滿則傾，空則仰，比之于言，因物隨變也。」

⑤禮記中庸：「君子之中庸也，君子而時中。」鄭氏注：「君子而時中者，其容貌君子，而又時節其中也。」

⑥舊唐書禮學等傳論：「歐陽州之政決，如驚鳥逐雀，英氣動人。」

⑦隋書經籍志：「徐氏中論六卷，列於儒家。」

⑧後漢書仲長統傳：「每論說古今及時俗行事，恒發憤嘆息，因著論，名曰昌言。」

⑨毛詩大雅：「天之靡民。」毛傳：「靡，道也。」孔疏：「靡與誘通，故以為導也。」

⑩論語顏淵：「君子之德風，小者之德草，草上之風，必偃。」三國志注：「平定三郡，風行草偃。」

⑪周易繫辭：「顏氏之子，其殆庶幾乎！」

⑫史記武帝紀：「天子始巡郡縣，侵尋於泰山。」

⑬潘岳閒居賦：「太夫人在堂，有羸老之疾，尚何能遠賡下色養，而府曆從斗骨之役乎！」

⑭宋史樂志：「德厚重閭，冲澹粹稷。」

⑮宋史高僧傳：「命為大理評事，俾固辭，仁宗嘉其守，號安素處士。」

⑯雜錄：「維摩詰雖復飲食，而以禪說為味。」

甲 雜候類 六九 致報館主筆

④ 陳世南孔子廟堂碑：『怡然動色，似聞鸞語之響。』

⑤ 漢書五行志：『味厚者，臘久也。味厚者，爲毒久也。』

⑥ 老子：『五色令人目盲，五音令人耳聾。』言，瞽也。目注心移，視乃不明，故曰盲。謂迷眩如瞽也。

⑦ 爾雅釋詁：『平易也。』史記：『平易近長。』

⑧ 後漢齊世祖傳：『國之序事，不激詭。』李賈註：『激，揚，義，發也。』

⑨ 晉書：『宣大遠，豫州界，蓋，隨其所歸而宣導之。』

⑩ 左傳隱公五年：『君將納民於軌物者也。故諱事以度軌量謂之軌。取材以章物采謂之物。不軌不物，謂之亂政。亂政亟行，所以敗也。』

七〇 致公司董事或經理

某某先生大鑒：懋遷有無，奇贏盈散。

實事求是，業精於勤，敬維

與時俯仰。

經世惠通，引企

吉暉^①曷勝馨頌。弟前歲海外歸來，目擊^②時艱，獨居深念^③。從政既非夙懷，教學亦無多術^④。遂乃招集股款，創設農民銀行。區區之願，欲爲本省農村經濟調劑^⑤之資。開辦以來，尙稱順利，差足告慰故人耳。

貴公司鴻業^⑥恢張^⑦，信孚遐邇。分公司在敝省者，亦甚豐贍^⑧。儻得紹介，阜財通貨^⑨，相與有成，豈惟敝行之幸！閩省農業，實利賴焉。專此祗候，敬頌籌綬，惟祈朗照不具。

註釋

①尙書益稷：「懲遷有無化居。」孔氏傳：「懲勉其民，徙有於無，交易變化，其所居積之貨也。」

②漢書食貨志：「商賈大者，積貯倍息，小者坐列販賣，操其奇贏，日遊都市，乘上之急，所賣必倍。」

③羅隱市癡：「齊侯幸晏子所止，引目長視，曰：彼也，何哉？如蜂如蟻，萬貨叢集，百工填委……晏子對曰：貨盈則盈，貨散則散，貨愚

甲 通候類 七〇 致公司董事或經理

並置，善惡相混。』

◎註見第二〇篇。

◎韓愈進學解：『業精于勤，荒于嬉，行成於思，毀於隨。』

◎史記貨殖傳：『關中富商大賈，大抵悉諸田……皆與時俯仰，極其贏利。』

◎左傳閔公二年：『通商惠工。』

◎周易未濟：『君子之光，其暉吉也。』

◎莊子田子方：『仲尼曰：若夫人者，目擊而道存矣。』

◎史記：『諸呂擅權，欲劫少主，危劉氏，右丞相陳平患之，力不能爭，恐禍及己，嘗燕居深念。』

◎孟子告子：『教亦多術矣！予不屑之教誨也者，是亦教誨之而已矣。』孫卿子：『師術有四，尊嚴而擇，可以為師，善艾而信，可以為師，諱說不凌，可以為師，知德而論，可以為師。』

◎淮南子：『煎熬熇炎，調劑和之，適以窮荆，吳，甘酸之變。』

◎班固兩都賦序：『與廢絕，濁色滂濫。』

◎宋史：『宣張張爽，舜之道，以佐明主，不應以利為先。』

◎漢書：『張謫通漢國，獨買間出，私物豐贖。』

◎周禮地官司徒：『司市掌市之治教刑政量度禁令……以商賈阜財而行布，以量度成價而徵買。』又：『太宰以九職任萬民，六曰商賈，阜通貨賄。』又：『任商以市，通財貨。』

七一 致銀行 事或經理

某某先生大鑒：靈山珍饈，而滋液。光騰。泉府。紫標。則休明道煥。固散斂之多術，實

輕重以相權。敬維

道存利物。

用足養民。景歧

吉暉，曷勝忻頌。弟忝膺疆寄，久別中樞，前者述職入都，道經海上，喜班荆而話舊。佐

旨酒以嘉穀，載笑載言。既優既渥，豪情逸興，雖景宗之耳後風生，鼻端火出，無以過也。日月不居，遂移物候。溯江樓之高會，望天末之

停雲。神契之旨，想復同之。涕綆短汲深，常懷祗懼，內憂外患，彌惕傾危。媿無定命之評謨，惟有矢誠於捍禦。夙承注念，驟用相聞。專牋祗候，卽頌簪綬，惟希朗照不備。

註釋

○李贄詠銀詩：『色帶長河色，光浮滿月光。靈山有珍寶，仙國屬君王。』瑞應圖：『王者宴不及醉，刑罰中人，不爲非，則銀錢出。』

○孝經援神契：『神氣滋液，有銀錢，不汲自滿。』

○地鏡圖：『銀之氣夜正白，流散在地，撥之，隨手散復合，此是也。』王韶之始興誌：『宋元嘉元年，夏霖雨，小首山崩，自嶺及巖，崩處有光若星，居人聚觀，皆是銀錢，鑄得銀也。』

○周禮地官：『泉府掌以市之征布，斂市之不售貨之滯於民用者，以其買賣之物，揭而書之，以待不時而買者，買者各從其抵，訖鄙從其主國人郊人，從其有司，然後予之。』

○梁書：『武帝弟蕭宏，錢百萬一聚，黃榜標之，千萬一聚，挂一葉標，如此三千餘間。』

○後唐書：『朱守嚴奏，積善坊得古文錢，進之，敕曰：凡窺奇異，盡繫休明，所獲錢文，式昭元脫，道煥一時，事光千載。』

④續文獻通考：「檢官宗貞簡中，監察御史田迴劾言：錢幣欲流通，必散散有術，輕重相權而後可。」

⑤周易乾卦：「元者，善之長也，亨者，嘉之會也，利者，義之和也，貞者，事之幹也，君子體仁，足以長人，嘉會，足以合禮，利物，足以和義，貞固，足以幹事。」

⑥尚書大禹謨：「德惟善政，政在養民。」續文獻通考：「元仁宗初即位，諭太府監臣曰：財用足，則可以養民，給軍旅。」

⑦毛詩：「蔽我疆土。」論語：「可以託六尺之孤，可以寄百里之命。」經寄者，言與守封疆，寄託之任甚重也。

⑧孟子：「諸侯朝於天子曰述職，述職者，述所職也。」孫虞疏：「謂述己之所職，如春朝以圖天下之事，夏宗以陳天下之讓，秋覲以比邦國之功，冬遇以協諸侯之遠是也。」

⑨左傳襄公二十六年：「伍舉將奔晉，筮子將如晉，遇之於鄭郊，班荆相與食而言復故。」杜氏注：「班，布也，布荆坐地，共饌歸楚事。」李昌符詩：「微涼堪語燕，移榻晚風前。」語舊，與久別之友，敘述舊事也。

⑩毛詩小雅：「爾酒既旨，爾殽既嘉，豈伊異人，兄弟既他。」鄭箋：「旨，嘉美也。」

⑪毛詩衛風：「既見復關，載笑載言。」鄭箋：「則笑則言，喜之甚。」

⑫毛詩小雅：「既優既游。」說文：「游，樂也。」

⑬南史曹景宗傳：「景宗謂所親曰：我昔在鄉里，騎快馬如龍，與年少輩數十騎，折弓弦作霹靂聲，箭如餒鷹叫，平澤中逐鹿，敬肋射之，鴉飲其血，飢食其肉，甜如甘露漿，聳耳後生風，鼻端出火。」

⑭國語：「文姜曰：日月不居，人誰不安。」

⑮杜審言和晉陵陸丞早春遊望詩：「獨有宦遊人，偏驚物候新。」唐物候應節候而至，故曰物候。如鴻雁來，玄鳥歸之類。

⑯漢書：「取羽美人貨賄置酒高會。」

⑰杜甫天末懷李白詩：「涼風起天末，君子意如何。」

甲 通候類 七一 致銀行董事或經理

◎陶潛停雲詩序：「停雲，思親友也。」其詩曰：「露霏停雲，淅淅時雨。」

◎郭璞贈溫燾詩：「爾神余契，我懷子情。」

◎莊子至樂：「短短者不可以汲深。」

◎毛詩大雅：「許讓定命，遠猷辰告。」

七二 致留學畢業初歸者

某某先生足下：乘風破浪，數萬里瀛壖。初迴

關術際瀾，百廿國寶書。能讀識

歸舟於天際，極學海之津涯。

英聲茂實，咸企

風標。

燕頷，鳶肩，相看火色。每懷

令器，彌切欽遲。不佞忝居三事，施效未弘，亮采謨明，實爲寡昧。進

慚台鼎^①之任，退有棖棟^②之憂，苟補過^③之在人，惟思皇之多士^④。國家之厄，痛於往古，板蕩上帝^⑤，亦徒勞夫叫閭^⑥。木石寃禽，又何足以填海^⑦！夫惟一乃心力，庶幾克殄^⑧鯨鯢^⑨，側席^⑩旁皇，髮爲之白。

足下卓躒^⑪廣淵^⑫，志氣堅定，東南之美^⑬，屬望^⑭何窮，尤願

深蓄道德，精研學術，山藪韞玉而增輝，川澤涵珠而益潤^⑮。所謂君子藏器待時

而用^⑯也。因風寄意^⑰，不盡所懷，敬頌

時綏，惟希

澄簪。

商榷

今日修明政治，安內攘外，必以儲才爲急務。而留學歸來，察造有得者，有司亦當善爲登選，毋使感風群鱗，委諸草野，是篇之擬，意欲當世虛心實腹，旁求俊乂，共濟艱難。故先之以謙敬之懷，繼之以期待之意，使賢者知所奮勉而獨事功，世有君子，儼獲同情。

註釋

①南史：「宗鑑字元幹，南國人，少時叔父少文問其所志，隱答曰：願乘長風破萬里浪。」

②謝靈運遊赤石進帆海詩：「周覽倦瀛壖，況乃凌窮髮。」

③任昉王文獻集序：「劉劭罕窺其術，觀海莫際其淵，宏覽載籍，博游才藝。」窺亦作闕。

④註見第九篇①。

⑤左傳昭公十二年：「王曰：是良史也，子善視之，是，能讀三墳、五典、八索、九丘。」

⑥謝朓之宣城出新林浦向板橋詩：「天際識歸舟，雲中辨江樹。」

⑦揚子法言：「百川學海，至海，丘陵學山，不至山。」言百川晝夜流行不息，故至海，丘陵止而不進，故不至山，以喻學上進則成，自

止不進則不成也。」

⑧元史：「韓性博綜羣籍，自經史至諸子百氏，靡不極其津涯，究其根柢。」

⑨商史文學傳論：「文章者，蓋性情之風標，神明之律呂也。」

⑩後漢書班超傳：「燕領虎頭，飛而食肉，此萬里侯相也。」

⑪唐書馬周傳：「薦肩火色，騰上必速。」謂人之肩上疎似鷹也。

⑫晉書石苞傳：「植子備，少有名譽，鑿者稱爲令器。」令器，謂人有美材也。

⑬註見第三九篇④。

⑭毛詩小雅：「三事大夫，莫肯夙夜。」孔疏：「三公雖無職，而外與六卿之事，故謂之三事。」

⑮王褒聖主得賢臣頌：「夫賢者，國家之器用也，所任賢，則趨舍者而功施，器用利，則用力少而就效衆。」又曰：「進仕不得效。」

⑯尚書舜典：「使宅百揆，亮采惠疇。」孔氏傳：「亮，信、惠、順也。」王儉褚淵序文：「亮采王室，每懷沖虛之道。」

⑤尚書皇陶錄：「允迪厥德，讓明弼諧。」孔氏傳：「謀廣聰明。」

⑥註見第九篇⑥。

⑦註見第二篇⑥。

⑧周易：「无咎者，善補過也。」左傳：「進思盡忠，退思補過。」

⑨毛詩大雅：「思皇多士，生此王國。」毛傳：「皇，天也。」鄭箋：「思，願也。願天多生賢人於此邦。」

⑩註見第六七篇⑥。

⑪揚雄甘泉賦：「選巫咸兮叫帝閭，開天庭兮延羣神！」此處引用，謂申訴於國際聯盟也。

⑫任昉述異記：「昔炎帝女溺死東海中，化為精衛，自呼其名。每銜西山木石，填東海，偶海燕而生子，雌者狀如精衛，雄者如海燕。」

⑬一名宛禽，又名志鳥。」

⑭說文：「珍，護也，絕也。」

⑮左傳宣公十二年：「取其鯨鼈而封之。」杜氏注：「鯨，鯨魚名。以喻不義之人，吞食小國。」

⑯後漢書隱逸傳：「先武側席幽人，求之若不及。」側席，即虛左以待之意。

⑰孔融薦禰衡表：「淑質貞亮，英才卓犖。」卓犖，絕異也。

⑱左傳文公十八年：「齊望廣淵，明允篤誠，天下之民，謂之八世。」

⑲爾雅：「東南之美，有檜楛之竹箭焉。」王勃滕王閣序：「鸞隲枕夷夏之交，賓主盡東南之美。」

⑳遼史：「文妃生晉王，最賢，國人皆屬望。」

㉑左傳宣公十五年：「高下在心，川澤納污，山藪藏疾，瑾瑜匿瑕，國君含垢，天之道也。」陸機文賦：「石韞玉而山輝，水懷珠而川媚。」

●周易繫辭：『君子藏器于身，待時而動。』

●李陸答蘇武書：『時因北風，復惠德音。』

七二 致家居者

某某先生大鑒：聞之遠性風疎者，則忻玩水石；棲心物表者，則眷戀松筠。敬想

抱道懷真，

潤身移氣，翹瞻

霽采，曷罄欽遲。夫四體不動，思慮不用，老氏之旨，雖曰無爲，而魁然廓然，離世異俗，獨善而已。斯豈

君子濟物之心乎！時勢至此，真有覆巢之象，

先生衡門之下，偃仰棲遲，酒甕多於步兵，黍田廣於彭澤，誠所謂名教之外，

別有風猷。但遠近之人，企踵相期。

出為霖雨，民所屬望。遠亦不祥，且當天崩地坼之日，縱欲自全，豈可得耶！此

鄭僑所以有將壓之懼也。願

崇往烈，弘濟艱難。幸甚幸甚。專此奉候，祇頌

時綏，惟希

激譽。

商權

此篇受者，須為有德望學術之人。

註釋

①後漢書邊氏傳贊：「江海冥滅，山林長往，遺性風疎，逸情雲上。」

②南齊書明僧紹傳：「僧紹弟慶符為青州，僧紹之糧食，隨慶符之鬱洲，住拿嶺山，栖雲精舍，欣玩水石，不一入州。」

③晉書索襲傳：「宅不編畝，而志忽九州，形居塵俗，而棲心天外。」唐書元德秀傳：「結廬山阿，彈琴讀書，陶陶然遺身物外。」物表，猶云物外。

甲 通候類 七三 致家居者

⑤南齊書宗潤傳：「性同麟羽，愛止邱壑，春戀松筠，經迷人路。」

⑥三國志：「管寧抱道懷真，潛翳海隅。」

⑦禮記大學：「宮潤屋，德潤身。」

⑧孟子盡心：「居移氣，養移體，大哉居乎！」

⑨禮記中庸：「見乎者變，動乎四體。」四體，四肢也。淮南子修務訓：「故自天子以下，至於庶人，四取不動，思慮不用，專治求聘者，未之聞也。」

⑩老子：「是以聖人處無為之事，行不言之教。」又：「為無為，則無不治。」

⑪漢書東方朔傳：「世之處士，翛然無徒，靡然獨居。」

⑫莊子：「刻意尚行，離世異俗，此山谷之士，避世之人也。」

⑬北史高允傳：「志在兼濟，豈伊獨善。」

⑭周易繫辭：「知周萬物，而道濟天下。」濟，調教也。

⑮世說新語：「孔融被收，中外惶怖，時融兒大者九歲，小者八歲，二兒故琢釘戲，了無遑容。融謂使者曰：『冀罪止於身，二兒可得全。』」

⑯毛詩陳風：「衡門之下，可以棲遲。」又小雅：「或棲遲偃仰，或王事鞅掌。」

⑰王筠遊北山賦序：「南山故情，若而彌篤，東坡餘業，悠哉自寧，酒壘多于步兵，桑田廣于彭澤，皇甫臨之心事，剛敵終焉，仲長統之規模，園林幸足。」

⑱南史隱逸傳序：「道義內足，希微兩忘，翫景窮廣，微名愚谷，解桂楫于仁義，示形神于天壤，則名教之外，別有風猷。」

⑲尚書說命：「若歲大旱，用汝作霖雨。」孔氏傳：「霖雨救旱。」

①錢謙益投筆集：「地狹天窮桂樹林。」言明未出藩之亡也。

②註見第二篇。

③尚書顧命：「用敬保元子劄弘濟于艱。」

七四 致未晤面者

某某先生大鑒：昔南州冠冕，東海清士，并有美譽，爲世所稱。側聞

明練簡至。

識鑒精通，比之龐徐，未容軒輊。引企

徽猷，無任馨頌。前在日內瓦，識

介弟，於廣坐之中，神采奕奕，有如鶴立雞羣。適有公事，往復會商，因

得訂交，欽爲國寶。季方若此，

元方可知。信夫

棠棣之華，故是東南竹箭也。下走前月歸國，暫息春申。日內當返嘉興，省親

故里。④ 去歐之日，

介弟以家書一封，屬爲代達，謹先郵致，敬乞

訖收，三數月後，當詣都門，容俟造

廬，藉聆

教益，專緘奉候，祇頌

時綏，惟希

激照。

商榷

凡對德望甚崇，職位甚高，未經晤面者通候，當稱其人身分事業，善爲措辭。前此各篇，均可參酌。茲篇受者，名位猶未顯也。在位在野，皆可用。

註釋

④三國志龐統傳：「同馬胤有知人鑒，統戴冠，往見共語，胤甚異之，稱統當爲南州士之冠冕，由是漸顯。」

①世說新語：「庾公爲護軍，席桓廷尉寬一佳吏。桓後見徐寧而知之，遂致於庾公曰：人所應有，其不必有，人所應無，已不必無。真海岱清士。」劉孝標注：「徐江州本亦曰徐寧字安期，東海郡人。」

②列子：「夫子嘗謂伯昏瞀人，吾側聞之。」側聞，猶謂從旁聞之也。

③魏志：「司馬文王與陳泰親友，武陔亦與泰善，文王問陔曰：元伯何如其父？陔曰：雖雅博暢，諾以天下聲教爲己任者，不如也，明綽爾至，立功立事，過之。」

④唐書：「太宗謂王珪曰：卿設譬精通，復善談論。」

⑤註見本條①。

⑥後漢書馬援傳：「援上疏曰：夫居前不能令人驚，居後不能令人厭。車前高曰軒，後低曰軒。凡議論有所抑揚，亦曰軒。駘。」

⑦毛詩小雅：「君子有微猷。」微者，美善也。

⑧左傳襄公二十六年：「王子圍尊君之黃介弟也。」

⑨國策：「衆人廣坐之中。」謂羣衆列席之所也。

⑩毛詩魯頌：「新廟奕奕。」奕，美也。

⑪世說新語：「嵇紹字延祖，康之子，有人語王戎曰：嵇延祖卓卓如野鶴之在雞羣。」

⑫桓寬題鐵論：「大夫曰：前議公事，實良文學，稱引往古，頗乖世務。」

⑬禮記大學：「楚國無以爲寶，惟善以爲寶。」晉書：「王戎曰：山濤如樂玉，薄金，人皆欲其寶，莫知名其器。」

⑭世說新語：「陳元方子長文，有英才，與季方子季先各論其父功德，爭之不能決，咨於太丘。太丘曰：元方難爲兄，季方難爲弟。」

⑮毛詩小雅：「棠棣之華，鄂不韡韡，凡今之人，莫如兄弟。」

⑯爾雅：「東南之美，有會稽之竹箭焉。」

甲 通儀類 七四 致未晤面者

◎許棠詩：「故里方洲外，殘春旬服中。」

七五 致同學

某某學兄大鑒：飭躬粹學，往深敬夫研精。

達識宏襟，今彌欽其致用。比維

勛華日懋，

景福時申。翹企

英猷，無任藻頌。在昔營道同術，治學合堂，相觀而善，相得益彰。龍亢之

於閔弘，河汾之有房魏。歷世則傲，以爲美談。言念

風標，允符往昔，而同門之舊，猶有不才。董遇三餘，已慚彌曠。仁山

五味，纔得其酸，驟用自陳。聊申

笑樂。去歲仲春，適忝外役，暑假期近，始返津門。主者方當積極進行，事變紛紜，

經費銳減，餼羊告朔，^①難與分羹，^②同人去之者大半，弟以經手事件頗繁，未結已前，不忍言去，然而廣文先生官獨冷，^③矣。素承顧念，謹以狀聞，專啓祇候，虔頌勛綬，惟希朗答不具。

註釋

① 鄭曉晉集解：「辟瓊粹學節躬，進無所求，退無所畏，實君子之儒。」

② 後漢書：「賈逵博雅疏通，常懷朝廷制度未備，晝夜研精，沈吟轉思，寤則懷扣筆札，行則誦習文書，當其舍至忘所之適。」

③ 韓休蘇頌傳序：「疑辭老之年，去朝有問，卜管侯之疾，訪史莫知，莫不取揆宏禮，詢謀遠識。」

④ 周易繫辭：「精義入神以致用也。」

⑤ 禮記儒行：「儒有合志同方，營道同術，並立則樂，相下不厭……其友有如此者。」

⑥ 莊子：「申徒嘉兀者也，而與鄭子產同師於伯昏瞀人，與合堂同席而坐。」

⑦ 禮記學記：「相親而善之謂厚。」

甲 通候類 七五 致同學

①王褒聖主得賢臣頌：『聚精會神，相得益彰。』

②後漢書桓榮傳：『每朝會，輒令榮於公卿前敷奏經書，帝稱善。會歐陽博士缺，帝欲用榮，榮讓曰：『臣經術淺薄，不如同門生郎中彭闓、揚州從事卓弘，帝曰：『俞往汝詣，因拜榮爲博士，引闓、弘爲隣。』按桓榮，龍亢人。

③唐書王通傳：『隋末，通設教河汾，門人自遠而至者千餘人。房玄齡、魏徵、李靖、程元、賈敏、薛收、賈瓌、溫大雅、陳叔達等，皆親受業。人才稱盛，世號之曰『河汾門下』。』

④毛詩小雅：『君子是則是效。』做法也。

⑤北史魏彭城王勰傳：『汝風標才器，實足軌範。』

⑥晉書夏侯湛傳：『才高位卑，往哲收歎。』

⑦後漢書盧植傳：『植少事馬融，與鄭康成同門相友。』

⑧左傳成公三年：『臣不才，不勝其任。』

⑨三國志注引魏略：『董遇言爲學當以三餘，謂冬者歲之餘，夜者日之餘，陰雨者晴之餘也。』

⑩劉楨贈五官中郎將詩：『自夏涉玄冬，彌曠十餘旬。』杜預左氏傳注：『彌，遠也。』蒼顏集：『曠，疎曠也。』

⑪元史：『李謙受業金履祥之門，隱祥語之曰：『士之爲學，若五味之在和，醴醢既加，則醴鹹頓異。』按金履祥蘭谿人，字吉父，所居在仁山下，學者稱仁山先生，五味始見禮記王制，此篇不引王制而引仁山之語，仁山以五味論學故也。』

⑫盧諶上劉琨書：『事與願違，當奈外役。』

⑬論語八佾：『子貢欲去告朔之餼羊，子曰：『賜也，爾愛其羊，我愛其禮。』朱注：『古者天子，常以季冬，頒來歲十二月之朔於諸侯，諸侯受而藏之祖廟，月朔則以特羊告廟，請而行之。餼，生牲也。魯自文公始不視朔，而有司猶供此羊，故子貢欲去之。』

⑭史記項羽本紀：『爲高祖置太公其上，告漢王曰：『今不急下，吾烹太公。』漢王曰：『吾與項王俱北面受命懷王，曰約爲兄弟，吾翁即

若翁必欲去而翁則幸分我一杯羹」

●杜浦贈鄭處詩「請公裘裘登臺省，廣文先生官獨冷」

七六 致同鄉

某某先生大鑒：風猷。邁往，宜廣機械之章，氣類平生，喜共枌榆之社。吾土之

湖山信美。

高標。爲靈秀所鍾。敬維

望實允集。

福祿攸同。

鑿采翹詹，頌忱曷極。弟前年應聘入蜀，專主理科，講授實驗，日不暇給。會友輔

仁。徒存涉想。自

賢使君來，而後西南得朋矣。豈惟漸摩

仁義，亦得執訊，鄉親，方忻。

塵教，之長承，何意驪歌，之遽作，雖天衢

龍躍，喜直中樞，而石棧蠶叢，益孤吾道，每思

嘉會，輒復低回，暑氣逼人，假期將屆，會當東下，暨息匡廬，仍擬入都，藉謀良

覲。

台華遠耀，嚮往無任，專啓奉候，祇頌

勛綬，惟希

朗照不具。

註釋

①謝朓和隨王詩：「風猷冠滌，鄴社席鳩，棧。」

②毛詩大雅：「芄芄，棧，薪之烈之。」毛傳：「芄芄，木盛貌，棧，自棧也，棧，抱木也，棧，棧也……賢人衆多，國家得用善與。」

③漢書地理志：「高祖，棧，揚州。」析榆，鄉名，漢高立社于此也。

④王粲登樓賦：「雖信美而非吾土兮，曾何足以少留。」蘇軾夏日望湖樓詩：「我本無家更安住，故鄉無此好湖山。」

⑤唐書王義方傳：「高自標樹。」

⑥漢書高帝紀：「雖日不暇給，規摹弘遠矣。」給，足也，日不暇足，言衆事繁多，常汲汲也。

⑦論語顏淵：「君子以文會友，以友輔仁。」

⑧何遜文：「孃前微笑，涉想猶存。」

⑨周易坤卦：「西南得朋，東北喪朋，安貞吉。」

⑩漢書董仲舒傳：「漸民以仁，摩民以誼。」誼與義同。

⑪左傳文公十七年：「鄭子家使執訊而與之書，以告趙宣子。」杜注：「執訊，通訊問之官。」

⑫晉書皇甫謐傳：「其摛親勸令應命，謐爲釋勸論以通志焉。」

⑬晉書王衍傳：「衍始善玄言，唯談老莊爲事，每捉玉柄麈尾，與手同色。」名苑：「麈尾所轉而往，古之談者揮焉。」

⑭遊詩：「驪駒在門，僕夫具存，驪駒在路，僕夫整駕。」

⑮漢書儒林傳：「客歌驪駒，主人歌客毋庸歸。」驪駒者，豎告別之歌也。

⑯孔融薦禰衡表：「如得龍躍天衢，振翼雲漢……足以昭近署之多士，增四門之禮穆。」

⑰宋史李穀傳：「在樞府，專務革濫賞，抑僥倖，人以爲得職。」中樞，蓋謂中央樞府也。

⑱揚雄蜀王本紀：「蜀王之先，名竊遠，是時人民椎髻厲言，不曉文字。」李白蜀道難詩：「地崩山摧壯士死，然後天梯石棧相鉤連。」又送友人入蜀詩：「見說嘉陵路，崎嶇不易行，山從人面起，雲傍馬頭生。」

⑲論語里仁：「德不孤，必有鄰。」家語：「楚昭王聘孔子，孔子往，陳蔡發兵圍孔子，孔子曰：詩云：匪兕匪虎，率彼曠野，吾道非乎？吾奚爲至於此！」

⑳史記孔子世家：「低回留之不能去。」

甲 通候類 七六 致同瘡

◎晉書顯愷之傳：「桓玄時與愷之同坐仲堪坐，共作了語，復作危語……有一參軍云：盲人騎瞎馬，夜半臨深池。仲堪眇目，驚曰：此大道人！」

◎春秋莊公二十四年：「大夫宗婦，競用幣。」公羊傳：「競者何？見也。」

◎左傳莊公二十二年：「光遠而自他有耀者也。」



中華民國二十五年十月初版

(21208A)

現代交際尺牘大全 上一冊

每冊實價國幣捌角

外埠酌加運費匯費

著者 游 省 園

發行人 王 雲 五
上海河南路

印刷所 商務印書館
上海河南路

發行所 商務印書館
上海及各埠

版 權 所 有
翻 印 必 究

四四四二上

張

(本書校對者陳敬衡)

肆

